


ANG IKALIMANG SELYO

 Iduko nato ang atong mga ulo karon alang sa pag-ampo.

² Maloloy-ong Langitnong Amahan, ang Dios nga Makagagahum-sa-tanan, Nga nagbanhaw kang Jesus Cristo gikan sa mga patay, ug gipresentar Siya nganhi kanamo niining kaulahiing mga adlaw, sa Gahum sa Balaang Espiritu, mapasalamaton kami tungod niining gamhanang mga pagduaw sa imortal nga Dios. Ug karon, Amahan, nagaatubang kami sa usa na usab ka oras, usa ka oras nga mahimong mao'y mousab sa Eternal nga kapaingnan sa daghang mga tawo.

³ Ug sa pagduol niini, Ginoo, kami wala gayu'y kasarang. Tungod kay, anaa man kini sa Kasulatan, nga, “Gikuha sa Cordero ang Basahon ug giablihan ang Mga Selyo.”

⁴ Oh Cordero sa Dios, dumuol Ka, nagaampo kami. Nagatawag kami Kanimo, Ginoo, ang halangdong Manunubos. Dumuol Ka ug ipakita kanamo ang Imong plano sa katubsanan nga gililong sulod sa daghang mga katuigan, ablihi kining Ikalimang Selyo para kanamo karong gabhiona, Amahan, ug ipadayag kung unsa ang anaa sa ilalum niana nga Selyo para kanamo; aron manglakaw kami ingon nga mas maayo na nga mga Cristohanon kay sa kung unsa kami karon, og mamahimong mas angayan alang sa buluhaton nga anaa sa umalabot. Ginapangamuyo namo kini sa Ngalan ni Jesus. Amen.

Makapanglingkod na.

⁵ Maayong gabii, mga higala. Ginaisip ko kini nga usa ka dakung pribilihiyo nga maania karong gabhiona, niining dakung buluhaton. Wala ako'y hingsayran og unsa mang dapit kon diin mas maayo ang gabation ko, kay sa ang maanaa sa buluhaton sa Hari. Ug karon mianhi kita ilabina niining mga pagtuon nga ato gayud gipaabot; kung dili man Niya ipadayag Kini kanako, dili ko pud maihatag Kini kaninyo. Dili ko usab ginasaluyang gamiton ang unsa man sa kaugalingon kong panghunahuna o unsa man; basta kung unsa lang ang ginahatag Niya kanako. Husto kana. Ug ako—sigurado ko, kung dili ko gamiton ang kaugalingon kong mga panghunahuna, ug moabot gyud Kini sa angay'ng paagi nga moabot Kini. Ug sa tibuok kong kinabuhi wala pa gayud Kini nahimong sayup sukad-sukad. Dili gihapon Kini mahimong sayup niining higayona.

⁶ Karon, kita'y mahimayaon kaayo ug hilabihan, ka mapasalamatong gayud tungod sa Iyang gibuhay para kanato, ang gamhanang mysteryosong kamot sa buhi nga Dios! Unsa pa ba ang mas daku nga butang, ang mas mapribilihiyo nga mga

tawo, kay sa ang maanaa sa atong presensiya ang Hari sa mga hari, Ginoo sa mga ginoo?

7 Mahimo natong patingogon ang mga pito ug—ug ipataas ang mga bandila, ug ibukhad ang mga karpet ug tanan na, alang sa Presidente sa nasud pagmoabot sa atong siyudad. Apan, hunahunaa lang, okey lang man kana, ug usa kana ka kadunganan para sa siyudad.

8 Apan hunahunaa ninyo. Dinhi sa atong gamay'ng, ubos nga tabernakulo, karong gabhiona, ginadapit nato ang Hari sa mga hari, ang Dios. Ug wala kita . . . Wala gani Siya nagatinguha og mga karpet nga maibukhad, ug uban pa. Ang ginatinguha Niya mao ang mapainubsanong mga kasingkasing nga maipresentar, aron magamit Niya kini nga mapainubsanong mga kasingkasing ug maipadayag kanila ang—ang mga maayong butang nga gikatagana na Niya para kanilang tanan nga nahigugma Kaniya.

9 Karon, gihangyo nato . . . Ug aduna ko'y usa ka testimonyo nga gusto kong—kong ihatag. Karon, kung sayup man ko niini; nadungog ko lang man kini, ug tingali'g sayup ako niini. Apan tungod nga ania man ang mga tawo, ug napahinungod kanila kini nga testimonyo.

10 Ug dayon, pipila pa lang ka adlaw ang milabay, niadtong atua ako sa akong balay, didto—didto sa Arizona, nakadawat kami og—og tawag nga nag-ingon nga may usa kono ka batang lalaki nga adunay rheumatic fever. Ug napadulong na kadto sa kasingkasing. Ug siya gayu'y usa ka . . . Ang iyang amahan ug inahan mga suod ko kaayong, bililhon nako nga mga higala. Kana'y atong . . . usa sa atong mga diyakono dinhi, sa iglesia, si Igsoong Collins. Ang iyang batang lalaki, ang gamay'ng si Mikey, nga kadula ni Joe, nagaantus sa rheumatic fever sa kasingkasing. Ug gipapauli na siya sa mga doktor, gipahigda na lang siya sa katre, ug giingnan ang mga ginikanan nga dili gyud siya pabangonon, ni iisa ang iyang ulo, pag moinom og tubig. Kinahanglan niyang moinom pinaagi sa usa ka estro; tungod grabe na kaayo siya. Ug ang maong mga ginikanan, nga matinud-anon, nagatambong mismo sila sa tabernakulo dinhi, ug nagatoo.

11 Ug pipila ka gabii ang milabay, aron dili na maghulat pa, nagpahibalo na kami nga adunay mga panerbisyo alang sa pagpang-ayo pagka-Dominggo. Apan, ingon nga nakita natong kinahanglan diay natong tubagon ang mga pangutana, mao nga kinahanglan 'sa natong i-kansela ang maong panerbisyo sa pagpang-ayo.

12 Ug niadtong panahona adunay gamay'ng butang nga ginatago ko lang sulod, sa akong kasingkasing.

13 Ug gustong mahibaloan sa inahan ug amahan kung puede ba nilang dalhon ang bata ngadto sa—sa lawak. Ug gidala nila

ang gamay'ng bata didto, ug gideklara sa Balaang Espiritu nga siya'y giayo na.

14 Ug busa, ang mga ginikanan, ingon nga nagtahud niadto, gidala nila pauli ang bata ug gipaeskwela na nila siya, basta gipaeskwela lang nila siya.

15 Nahibaloan kadto sa doktor, busa wala gayud nalipay ang doktor niadto. Busa, gisultihan niya ang inahan nga ang bata kinahanglan nakahigda ra sa higdaanan, unta. Ug busa giestoryahan niya ang doktor sa nahitabo. Ug sa nagtoo ko ang maong tawo usa ka, sa nahibaloan ko, usa ka magtotoo nga Cristohanon, sa usa ka denominasyon. Usa—usa ka Sabadista, ang maong doktor. Ug busa miingon siya, “Bueno, imo unta . . . panahon na para sa bata, nga eksaminon ko siya.” Ingon pa, “Angay unta, bisan pa man, nga gipa-eksamin mo siya.”

Ingon ang inahan, “Sige.”

16 Gidala niya ang bata didto, ug gieksamin sa doktor, ang dugo, kon diin makita ang rheumatic fever. Ug akong nahibaloan nga nangangha kaayo ang doktor nga wala na siya kahibalo kung unsay buhaton. Ang maong bata bug-os na gyud nga normal, himsog ug naayo na, wala na'y ni usa ka . . . ? . . . ang hingkaplagan.

17 Karon, ania ba dinhi ang mga Collins? Tingali'g sayup ang pagka-estorya ko niana. Gusto kong . . . Husto ba kana, Igsoong babayeng Collins? Oo. Okey. Oo. Mao kana ang batang si Mikey Collins, nga mga unom, pito ka tuig ang panuigon.

18 Ug nahitabo kadto mismo sulod sa maong lawak, mga tulo na ka gabii ang milabay. Oh, sila . . . Siguradong Aduna gyu'y sulod niadtong lawak gawas pa sa tawo! Ang—ang halangdon ug gamhanan Kadto nga si Jehovah, husto kana, nga miabot aron pasidunggan ang Iyang Pulong. Ug ako—mapasalamaton kaayo ko nga madungog kana. Kita n'yo? Kabalo ko nga mapasalamaton kitang tanan. Dili lamang ako, kondili ang tanan gayud, tungod kay unsa kaha kung ang—ang inyo kadtong anak nga lalaki o kaha akong anak nga lalaki?

19 Ug, hinumdumi, nga nagahatag ako og testimonyo, sama nianang usa, ug nagapili lang ko og usa dinhi ug usa dinha. Nagakahitabo man kini bisan asa, mao nga ginapahibalo ko lang kaninyo nga—nga ang tinuod kong ministerio mao ang Balaanong pagpang-ayo. Apan inyong . . . Ania ako para niining Mga Selyo. Tungod, pagkataudtaud, masabtan ra ninyo kon nganong kinahanglan kong buhaton kini. Ug, busa, dili ako usa ka magtutudlo, dili ako usa ka teologo. Ako—ginaampo ko lang ang mga may sakit, ug gihigugma ko ang Ginoo. Ug karon, karon bahin niini, bisan pa, nga . . .

20 Kagabii naghatag pud kita og testimonyo mahitungod sa batang babaye . . . Nakuha ko na ang iyang ngalan. Ug nadala pud ni Billy karon dinhi, sa kon asa man, ang ginikanan

ug kung si kinsa sila. Ug kining batang babaye anaa na sa katapusang hugna sa leukemia, mga halos. . . Grabe na kaayo nga dili na nila siya mapakaon pinaagi sa baba; kinahanglan na siyang. . . abunohan og dugo pinaagi sa mga ugat. Ug usa siya ka matahum nga batang babaye. Gamay ra siya para sa iyang pangidaron, morag sama ra niining gamay'ng gining dinhi, siguro. Apan siya'y mga *ingon-niini* ka taas, grabe. . . Sila'y sama ra sa kadaghanan kanato. Masulti mo na sa binistihan pa lang sa maong bata, nga. . . ug sa mga ginikanan, nga sila'y kabus gyud kaayo, kabus gyud kaayo, ug, ingon niana, apan mga matinahuron gayud. Ug gideklara sa Balaang Espiritu kadto nga bata nga naayo na.

²¹ Karon, hunahunaa n'yo kana, nga may leukemia, kadtong luoy nga bata. Ug naggrabe na kaayo ang iyang dugo nga dili na nila mapakaon siya pinaagi sa baba. Kinahanglan na siyang maabunohan, moadto sa ospital ug abunohan og dugo, o abunohan pinaagi sa mga ugat, aron mapakaon siya; sa hunahuna ko, og glucose, o unsa man. Wala ko kabalo kung unsa ang pang-medisina nga termino para niana nga sakit, apan, bisan pa man, kinahanglan siyang pakan-on sa ingon niadto nga paagi. Ug sa wala pa migikan ang bata sa maong lugar, nangayo pa kini og hamburger.

²² Ug ang mga ginikanan, human nga madungog nila ang Balaang Espiritu, ang bahin sa MAO KINI ANG GINAINGON SA GINOO, kita n'yo, sila. . . Ug, sila'y, mga estranyo, nga wala pa sukad nakatambong dinhi. Apan sila. . . Usa—usa ka maayong tigulang nga magtiayon ang naghatag sa ilang lingkoranan dinhi para kanila, pipila ka minutos ang milabay, si Igsoong lalaki ug Igsoong babayeng Kidd, gitudloan sila kung unsay buhaton, ug kung unsay angay'ng paminawan. Ug nakakaon na ang bata sa iyang mga pagkaon sa ilang pagpauli.

²³ Duha o tulo ka adlaw human niadto, nakaeskwela na kini. Ug miadto sila sa doktor, ug nangangha gyud kaayo ang doktor! Ingon siya, “Wala na gyu'y bisan usa ka tipik sa leukemia nga makaplagnan sa bata.” Kita n'yo? Karon, kana'y sa gilayon, eksakto gayud, nga Gahum sa Dios nga Makagagahum-sa-tanan, aron kuhaon ang nagadagayday nga dugo ug limpyohan kini, mismo nga sama niana, ug—ug ibalik ang pitik sa—sa bag-ong kinabuhi. Tungod, ang inyong—ang nagadagayday ninyo nga dugo mao man ang inyong kinabuhi, nga mortal. Ug aron magmugna og bag-ong mga selula, ug limpyohan ang daan! Ug—ug kung unsa man kana, kana'y bug-os gayud. . . Isulti ko kini, usa kana ka mamugnaon nga buhat sa Dios nga Makagagahum-sa-tanan; nga kuhaon ang—ang nagadagayday nga dugo nga kontaminado na sa kanser, hangtud nga ang luoy'ng batang babaye, dalag ug nanghupong na, ug, sulod sa pipila lang ka gutlo, aduna na'y bag-ong nagadagayday nga dugo!

24 Nagatoo ko . . . Dili ko isulti kini diha sa Iyang Ngalan; isulti ko kini sumala sa akong . . . sumala sa kapadayagan sa akong pagtoo, kung unsay nahitabo didto sa Sabino Canyon niadtong miaging adlaw. Nagatoo ko nga ang panahon nagasingabot na, sa diha nga mahimo nang ibalik ang nawala nga mga bitiis, ug ang mahimayaong Gahum sa Magbubuhat. Ako—nagatoo ko, nga kung mahimo Niyang magpatungha og usa ka squirrel, nga walay . . . Ania ang lalaki o babaye, nga adunay usa ka bahin nga nawala. Ug bug-os na kini karon nga linalang, sa kaugalingon niini. Dios gayud Siya. Ako—gihigugma ko Siya.

25 Bueno, karon, hinayhinay na akong naghisgot niana nga mga hilisgotanan, ug sige ta gihapon sa paghisgot. Ug nagatindog lang ang mga tawo dinha sa mga dingding, ug may mga nagatindog pud diha sa mga pasilyo ug sa mga lawak, ug uban pa, busa modiretso na ko mismo sa Mensahe.

26 Ug gusto kong isulti kini, ug gusto kong magpasalamat Kaniya Nga mao'y anaa sa tanang dapit. Ug, tungod, karong adlaw, ingon nga wala ako'y hingsayran ni usa ka butang mahitungod nianang Ikalimang Selyo, miabot Kini sa mao gihapong misteryoso nga paagi, kaganinang buntag, mga usa ka oras sa wala pa nagbanagbanag, sa dihang nag-ampo ako. Ug karong adlaw . . .

27 Gigahin ko gayud kining ulahing lima o unom ka adlaw, nga maanaa lang sulod sa usa ka gamay'ng lawak, nga walay si kinsa mang gipakigkitaan. Igo lang ko mogawas aron mokaon uban ang usa—uban ang usa ka higala, uban ang pipila sa akong mga higala dinhi. Ug, siyempre, kabalo na mo kung kinsa kana nga higala, kana'y si Igsoong lalaki ug Igsoong babayeng Wood. Oo. Ug—ug kabalo mo, ug miadto ko didto ug—ug nagpabilin uban kanila, ug maayo gyud sila kanako. Ug walay unsa man, kondili . . .

28 Ginapaningkamotan kong magpabilin mismo sa Mensahe niining Mga Selyo. Mahinungdanon Kini. Nagatoo ko nga kini'y—mao na kini ang panahon sa pagpadayag Niini, ang kapadayagan Niini.

29 Ug karon gusto kong masigurado gyud ninyo karon, samtang sayo pa, sa dili pa, kamo makahimo, pagsulat sa inyong wala-masayri nga mga pagsabot mahitungod—mahitungod niining Pito ka mga Selyo, kung aduna man kamo niana, ug ibutang kana sa ibabaw sa lamesa. Ug siguro si Igsoong Neville o si kinsa man basin puedeng magbutang og usa ka kahon sa ibabaw dinhi. [Adunay nagaingon, “Aniay kahon.”—Ed.] Oh, ania—ania, nakita ko na kini karon. Maayo kana. Mas maayo man gud nga makuha ko na ang mga niini karong gabhiona, aron matunan ko pa ang mga niini sa makadiyut, para sa Dominggo sa buntag. Karon, ayaw ninyo, niining higayona, niining higayona mismo, ayaw ninyo himoa kana nga mga pangutana, moingon,

“Ingon *niini* ba ang ebidensiya sa Espiritu Santo?” Kita n’yo? Ako—gusto kong mahibaloan ang mahitungod, sa kung unsay akong gitudlo kaninyo, nakita n’yo, aron masabtan nato kining usa ka hilisgotanan (sama sa mga kapanahonan sa iglesia) nga klaro, kita n’yo, tungod kay mao man kana ang atong ginapahinungdan karon.

³⁰ Karon, sama ra pag iampo nato ang mga may sakit, kung ingon-ana magkinahanglan kana og usa—usa ka lahi nga pag-ampo. Ug dinihogan ka, nga mianha para sa ubang butang, kabalo na mo. Ug ginapangita mo ang Dios, aron mahibaloan, “Aduna ba kaha’y usa ka tawo didto karong gabhiona, Ginoo?”

³¹ “Oo, usa kana ka tawo nga nagasul-ob og dalag nga bisti, nagalingkod diha sa tuo nga bahin. Ug pag tawgon mo siya, tawga siya nga *ingon-niini*. Ug isulti ang *ingon-niini* ug ang *ingon-niini* nga iyang nabuhat. Ug aduna siya’y *ingon niini-ug-ingon niana*.” Dayon pag-adto mo didto ug matikdan mo, ug atua mismo siya. Kita n’yo? Mao kana, kita n’yo. Lahi kana. Kita n’yo?

³² Ug sa niining bahin, ang ginaampo ko, “Ginoong Jesus, unsa ma’y interpretasyon Niini? Ipadayag Kini kanako.” Amen.

³³ Karon kuhaon nato ang atong—atong mga Espada pag-usab karon, ug, ang Pulong.

³⁴ Ug ginapasalamatan ko ang espirituwal nga suporta ni Igsoong Neville, ang iyang inigsoong gugma usab, ania siya sa akong luyo, nga nagaampo para kanako. Ug kaninyong tanan dinha, usab. Ug, karong, gabhiona ingon nga Biyernes sa gabii, paningkamotan natong, himoon lang kini nga . . . atong . . .

³⁵ Dili mo man gud mahimong mahisgotan ang tanang butang. Imong . . . Tungod, mahimo mo man hisgotan Kana, ang usa lang nianang Mga Selyo, ug magpabilin dinha, nga—nga ginabasi Kana sa Kasulatan, mismo. Kita n’yo? Modugay ka man Dinha og mga binulan, ug sa gihapon dili pa ninyo mahuman Kana, tungod kay ang—ang Selyo Mismo nagkasumpay-sumpay sa tibuok Kasulatan, gikan sa Genesis hangtud sa Pinadayag, ang usa ra ka Selyo Niini.

³⁶ Busa ang ginapaningkamotan kong buhaton, mao ang, likayan nga mapahilayo Niini, busa ginasulat ko ang Kasulatan, o—o duna ko’y gamay’ng sinulat dinhi, ug ginalikayan nga . . . Sa pagpabilin ko nianang usa ka butang, kinahanglan kong magbantay, tungod, usa ko lang ka . . . Pagmaghisgot na ko, nagahisgot ko pinaagi—pinaagi sa . . . Ako—nagalaum ko nga mao kini ang hustong pagdihog. Ug dayon sa dihang akong—sa dihang ako nang tan-awon aron hibaloan ang . . . Ug ako—pagmagsugod na kong maghisgot, ug mabati ko nga nagapahilayo na ko sa hilisgotanan, mobalik ako, mangita og laing paagi, aron makakuha og usa na usab ka Kasulatan,

aron hisgotan kana balik, nakita n'yo, aron medyo maiklaro og diyutay kana nga bahin, imbis nga magpadayon niana.

³⁷ Ug busa karon tun-an nato karong gabhiona, pinaagi sa grasya sa Dios, pinaagi sa Iyang tabang, ang—ang Ikalimang Selyo. Ug mubo ra Kini. Medyo kini mas hataas lang kay sa usa pa. Ang upat ka mga mangangabayo, ha, adunay duha ka bersekulo kada usa, ug dunay tulo ka bersekulo niining usa. Karon, magsugod ang Ikalimang Selyo, sa ika-6 nga kapitulo sa Pinadayag, sa ika-9 nga bersekulo.

³⁸ Ug, karon, kung pananglitan usa—usa ka ka bag-o lang nakatambong nga wala pa makapatalinghug bahin niining upat ka mga mangangabayo, bueno, imong. . . Kita n'yo, usahay imong—imo gayud balikan ug—ug medyo hisgotan ang usa ka butang, ug, pag mahisgotan na nimo, nagalaum ka nga masabtan Kini sa mga tawo. Busa kung aduna ma'y diyutay'ng butang nga wala ninyo masabti, bueno, medyo pasensyahi na lang ninyo. O kaha, pagkuha mo og teyp niini ug patalinghugi Kini, ug—ug sigurado ko nga kamo—makakuha gyud mo og panalangin gikan Niini. Napanalanginan man ako. Ako—nagalaum ko nga kamo—nga kamo usab.

³⁹ Karon, mag-andam ang tanan, gikan sa ika-9 nga bersekulo ha hangtud sa ika-11, o lakip na ang ika-11.

Ug sa pag-abli niya sa ikalimang selyo, nakita ko sa ilalum sa halaran ang mga kalag sa mga gipamatay tungod sa pulong sa Dios, ug tungod sa pagpamatuod nga ilang gihimo:

Ug sila nanagsinggit sa makusog nga tingog, nga nanag-ingon, Unsa ba ka dugay, Oh Ginoo, balaan ug tinuod, ang dili pa nimo. . . paghukom sa mga nagapuyo sa yuta ug pagpanimalus batok kanila tungod sa among dugo?

Ug ang matag usa kanila gihatagan og maputi ug tag-as nga bisti; ug giingnan sila, nga managpahulay una sa—sa diyutay nga panahon, hangtud nga ang laray sa ilang isigkaulipon. . . ang ilang mga kaigsoonan, matuman na, nga pagapatyon usab maingon kanila.

⁴⁰ Karon, medyo mysteryoso kini. Ug karon alang sa mga nagapaminaw sa teyp, ug mga ministro ug mga magtutudlo nga nagalingkod dinhi, karon, kung aduna kamo'y lahi nga pananaw bahin Niini; ako man kaniadto, usab. Apan ginabasi ko lang Kini gikan sa dihog kanako, nga mao'y bug-os nag-usab sa akong panghunahuna mahatungod Niini. Kita n'yo?

⁴¹ Ug dayon hingsayran ko, maingon sa inyong pagkakita nga napadayag kini, nagabalik Kini mismo ug ginatakdo ang mga kapanahonan sa iglesia ug ang mga Kasulatan, ug ginakonekta Kini. Kita n'yo? Ug mao kana'y hinungdan nga nagatoo ko nga nagagikan Kini sa Dios. Karon, naamgo nato kana.

42 Ug ginahunahuna ko nga usahay nagadepende ra kita sa kung unsay gisulti sa kung kinsang bantugang magtutudlo mahitungod Niini. Kita n'yo? Ug kana'y—okey lang man kana. Dili ko ginasaway ang maong magtutudlo, dili sa unsa mang pamaagi. Ug dili ko usab ginasaway ang si bisan kinsa. Ginasaway ko lang ang sala, ang dili-pagtoo; dili ang si kinsa man.

43 Ug miingon ang ubang tawo, “Ginasaway mo man ang mga organisasyon.” Dili, dili ako nagapangsaway. Ako—ginasaway ko ang sistema sa organisasyon; dili ang mga tawo nga anaa dinha, ang grupo sa mga tawo nga nagalangkob sa organisasyon, kabalo na mo. Kondili ang sistema nga nagadumala kanila, mao kana ang akong ginasaway, Katoliko ug Protestante, pareho ra. Grabe! Akong . . .

44 Ngani ang pipila sa pinakasuud nga mga higala nga—nga— nga akong kaila, mga Katoliko, man . . .? . . . Naamgo n'yo ba . . . Ug ang maong tawo tingali'g ania dinhi karong gabhiona, siguro. Ang bugtong paagi nga natukod nato kini nga tabernakulo, mao'y tungod sa usa ka Romano Katoliko nga mibarug sa korte didto, ug miadto sa atubangan para kanako, ug, aba, gibuhat mismo ang dili mahimong buhaton ni kinsa man. Husto kana. Ug wala nila kadto nabalibaran. Husto kana.

Ug miingon, “Nagbanabana sila nga, ‘Daghan kaayong mga tawo.’”

45 Ingon siya, “Oh, dili na man gani makapasulod og otsenta pa kana nga simbahan, mga ingon niana.” Miingon, “Dugay nang natukod kana nga simbahan dinha.” Miingon, “Ako—kaila ko ang pastor, ug tanan na.” Ug miingon, “Kana nga iglesia dugay na kanang anaa dinha.” Miingon, “Kon ang uban gani kaninyo puedeng magdugang, nan nganong sila dili?” Usa siya ka Romano Katoliko, nga buutan kong higala. Kita n'yo? Oo, sir.

46 Usa—usa pud ka lalaki nga—nga Katoliko, usa ka tinuod nga minahal kong higala, ang nakig-estorya kanako. Aduna siya'y usa ka tindahan nga hardware; sa wala pa ako migikan. Ingon siya, “Billy, ako—kabalo ko nga dili ka nagatoo sa sistema sa among relihiyon.” Ingon siya, “Apan sultihan ta ka karon mismo,” miingon, “Gipasidunggan gayud sa Dios ang imong mga pag-ampo para kanamo! Nagatoo ko, nga kung magkaproblema ka man sa bisan asang bahin sa nasud,” miingon, “ang matag Katoliko sa nasud motabang gyud kanimo.” Busa, nakita n'yo, kana'y . . .

47 Ingon siya, “Ang tanan nga nagapas-an og krus,” mao ang tawag niya niadto. Isulti ko lang kini sa paagi nga pagkasulti niya. Siyempre, ginaangkon nila kana tungod kay ang nahaunang mga Cristohanon kono nagpas-an man og mga krus sa ilang mga likod. Hingsayran nato kana pinaagi sa kasaysayan. Ug ginaangkon nila nga sila kono ang nahaunang Cristohanon,

nga sila gayud, apan ang sistema lang ang nagpasimang kanila gikan niana nga dalan, nakita n'yo.

48 Ug sila nga mga tawo, Katoliko, o Judio, o bisan unsa man, sila'y mga tawo nga naggikan sa mao gihapong punoan nga atong gigikanan. Kita n'yo? Husto kana. Sila'y—sila'y mga tawo nga nagahigugma, ug nagakaon, ug nagainom, ug nagakatulog, ug sama gayud ni kinsa man. Ug busa kinahanglan dili kita maghukom og kinsa man nga indibiduwal, wala, walay si kinsa man, kita n'yo. Ug, dili gyud kita maghukom og kinsa man nga indibiduwal.

49 Apan, ingon nga usa ka ministro, kinahanglan kong bunalan kana nga serpente dinha, nga nagapaak nianang mga tawo, nakita n'yo. Ug dili ko—ug dili ko gani. . . Para kanako, ug sa kaugalingon ko lang, dili ko buhaton kana kung dili kana sugo gikan sa Dios, nga obligado akong buhaton kana, kita n'yo. Ug kinahanglan kong sundon kana ingon nga matitud-anon ug matinumanon.

50 Apan kung ang usa ka Katoliko, Judio, o bisan unsa man siya, motambong dinhi; kung siya'y usa ka Mohammedan, Griyego, o Orthodox, o unsa man siya. Kung motambong man siya dinhi aron magpaampo, iampo ko siya sa ingon ka matinuuron gayud sama sa ginabuhat ko sa mga akoo. Husto kana. Oo, tungod kay usa man siya ka tawo. Ug nakaampo na ako para sa mga Buddhist, ug mga Sikh, mga Jain, mga Mohammedan, ug—ug sa tanan nang matang, nakita n'yo, sama niana. Ug dili ko na sila ginapangutana pa; ginaampo ko lang sila, tungod sila'y tawo man, usa ka tawo nga gustong mamaayo, ug ginapaningkamotan kong himoon ang kinabuhi nga medyo dili mabug-at para kanila diha sa ilang panaw.

51 Karon nahibalo kita, nga, dinhi, ug daghan kaninyo dinhi nga akong kaila, ngani adunay dili mominus sa duha o tulo ka tinuod nga mga eskolar ang nagalingkod dinhi. Ug—ug mga maantigo sila, ug nakabasa na sa—sa mga doktrina sa ubang mga tawo mahitungod niining hilisgotanan. Ug gusto kong mahibaloan niini nga mga kaigsoonan nga ako—wala ako nagahukom niini nga mga kalalaken-an. Ginapahayag ko lang kung unsay ginapakita sa Ginoo kanako. Ug kana lang ang aduna ako.

52 Karon, dili gayud nato hunahunaon nga, tungod kay ang usa ka babaye yano ra nga labandera o—o ang usa ka lalaki yano ra nga magdadaro, dili na makadawat og kapadayagan gikan sa Dios. Tungod, nakita man ninyo, kana. . . ang Dios, sa tinuod lang ginapadayag Niya ang Iyang Kaugalingon diha sa kayano. Kana'y, nahisgotan na nato kana niadtong Dominggo, sa pagsugod niini, kung ginaunsa Niya pagpadayag ang Iyang Kaugalingon diha sa Iyang kayano. Mao kana ang nakapahimo Kaniya nga halangdon.

53 Karon tugoti—tugoti lang ko. . .Tugoti lang ko ninyo nga balikan kana sa makadiyut. Ang nakapahimong halangdon sa Dios, mao’y tungod nga mahimo Niya ang Iyang Kaugalingon nga yano kaayo. Mao kana’y nakapahimo Kaniya nga halangdon. Halangdon ang Dios, ug mahimo Niya ang Iyang Kaugalingon sa ingon ka yano nga porma nga ang mga manggialamon niining kalibutana dili makakita Kaniya. Dili gayud nila Siya makita, tungod ginahimo man Niya ang Iyang Kaugalingon nga yano kaayo. Karon matikdi. Ug kini, mismo, mao ang misteryo sa kapadayagan ni Jesus Cristo. Kita n’yo? Kini, mismo, ang. . .Wala na’y. . .unsa man nga mas halangdon pa kay sa Dios. Ug dili n’yo mahimo ang unsa mang butang nga ingon ka yano sama sa Iyang gihimo sa Iyang Kaugalingon. Kita n’yo, mao kana’y nakapahimo Kaniya nga halangdon. Kita n’yo?

54 Karon, ang usa ka halangdon nga tawo, mahimo lang siyang halangdon diyutay, o siguro mahimo siyang magpaubos ug moingon, “Kumusta ka?” nganha kanimong, kita n’yo, o mora’g ingon niana. Apan dili niya mapaubos ang iyang kaugalingon. Aduna gayu’y butang mahitungod kaniya. Siya’y tawo. Dili gayud niya mapaubos ang iyang kaugalingon. Tungod kay, pag mahimo siyang ubos na kaayo, nan, mahibaloan mo na lang, kinahanglan na niyang mopahinungod sa kung unsay gibuhathat ni kinsa pa man, ug ingon niana. Ug mao nga hinayhinay niyang ipataas ang iyang kaugalingon pag-usab, nakita n’yo.

Apan, ang dalan paitaas mao’y paubos, diha sa Dios. Oo.

55 Ang mga manggialamon sa kalibutan nagapaninguha, pinaagi sa ilang kaalam, nga makaplagan Siya. Nagapahilayo lang hinoon sila gikan Kaniya, sa pagbuhathat niana. Kita n’yo, sa mga manggialamon sa kalibutan, kung ginapaningkamotan man ninyong isaysay ang usa ka butang pinaagi sa kung unsa nga matematika o unsa man. Hinumdumi, gibutang Niya gani. . .Sa Biblia, sa Pinada- . . .Dili diay, pasayloa ko ninyo.

56 Sa Isaias 35, nagatoo ko nga mao kana, nga kini’y yano—kini’y yano ra kaayo nga bisan ang usa—usa—usa ka burong nga tawo makasabot gani Niini. Kita n’yo? Oh, “Bisan ang usa ka hungong dili mahisalaag niini.”

57 Wala gayud kana makit-i sa mga manggialamon, tungod sa ilang kaalam, mas napahilayo pa hinoon sila gikan Kaniya, tungod sa pagpaningkamot nga makita Siya pinaagi og kaalam. Karon, ayaw n’yo kalimti kana. Iga-teyp man kana, kita n’yo. Ang mga manggialamon, tungod sa ilang kaalam, sa kung asa na napaingon sa pagpaninguha nga makita Siya pinaagi sa ilang kaalam, wala na hinoon nila Siya makit-i, kita n’yo. Kung magmahimo lang silang ingon ka daku nga mamahimong yano ra, makaplagan unta nila Siya. Kung magmahimo ka lang unta

og ingon ka daku nga mamahimong yano ra! Nasabtan n'yo ba kana? Ug, kabalo mo, kana—mao gayud kana ang Kamatuoran.

⁵⁸ Nakabisita na ako og mga tawo, sa ilang mga opisina, ug uban pa, nga mga tawong, bantugan gayud, mga hari, kita n'yo, ug mga gamhanan, mga monarka, ug kasagaran sila'y mga bantugan nga tawo. Dayon, nakaadto pud ko sa mga lugar kon diin may mga tawo nga aduna na'y pangpuli nga mga bisti, tingali usa ka ministro nga gustong makiglantugi kanako kadali, ug kung mosulti imong—mahunahuna mo nga dili na makatuyok ang kalibutan kon wala siya, kita n'yo. Ug kana—kana ang tawong midaku ang ulo, kita n'yo. Apan, ang usa—usa ka daku nga tawo, ang usa gyud ka daku nga tawo molingkod lang kana ug magpahunahuna kanimo nga ikaw ang mao'y daku nga tawo. Kita n'yo? Kita n'yo, mahimo niyang ipaubos ang iyang kaugalingon.

⁵⁹ Ug, nakita n'yo, ang Dios ingon ka daku kaayo hangtud nga mahimo Niyang ipaubos ang Iyang Kaugalingon, sa punto, nga ang tawo dili makapaubos nga ingon-ana, nakita n'yo. Kana lang. Ug sa ilang. . .

⁶⁰ Ug ginapaningkamotan nilang makaplagan Siya. Karon tanawa. Ginapaningkamotan nilang makaplagan Siya pinaagi sa pagpaeskwela sa mga kabatan-onang lalaki, aron makakuha og digri sa Bachelor of Art. Ug—ug ginapaningkamotan nilang hibaloon Kini pinaagi sa pang-teologong terminolohiya sa—sa—sa—sa Biblia. Ug ginapaningkamotan nilang makaplagan Siya pinaagi sa mga programang pang-edukasyon, ug pinaagi sa mga programang pang-organisasyon, ug pinaagi sa pagpanindot sa mga butang, ug gapaningkamot nga makakaplag. Wala Siya dinha, wala gayud. Ginabatokan n'yo lamang ang hangin, kana lang. Kamo—nagapahilayo na diay kamo Niini.

⁶¹ Magmahimo silang ingon na ka daku nga mamahimong—nga mamahimong yano gayud, aron mahikaplagan nila Siya sa ingon-niana nga paagi, pinaagi sa pagkahimong yano. Apan samtang nagapaingon ka sa kaalam, nagapahilayo ka usab Kaniya.

⁶² Karon tugoti kong iklaro kana aron dili ninyo masayloan kana. Samtang ginapaninguhaan n'yong mahikaplagan ang Dios pinaagi og kaalam, sama kaniadto sa tanaman sa Eden, sama sa mga adlaw ni Moises, sama sa mga adlaw ni—ni Noe, sama usab sa mga adlaw ni Cristo, sa mga adlaw ni Juan, sa mga adlaw sa mga apostoles, ug hangtud niining panahona! Sa diha nga ginapaninguhaan n'yong sabton Kini, ug gapaninguhang makaplagan ang Dios pinaagi og kaalam, nan mas nagapahilayo lang kamo gikan Kaniya sa tanang panahon. Ginapaningkamotan n'yong sabton Kini. Wala gayu'y paagi nga mahimo n'yo kana. Dawata lamang Kini. Kita n'yo? Toohi lamang Kini. Ayaw n'yo paninguhaang sabton Kini.

63 Dili ko man pud masabtan, gani, bueno, ang daghang mga butang. Dili man daghang mga butang ang akong nasabtan o mahimong masabtan. Dili ko masabtan kung unsa nga kining batan-ong lalaki nga nagalingkod dinhi nagakaon pud sa mao rang pagkaon nga akong ginakaon, ug—ug, ania siya, nga aduna pa'y kumpleto nga buhok, og wala na'y akoo. Dili ko kini masabtan. Ang ingon nila kanako nga calcium kono ang hinungdan niini; ug dili ko gani malikayan nga sigeng putlan ang akong mga kuko, apan wala na'y buhok nga maputol. Ako—dili ko masabtan kana. Sama sa karaan nang panultihon, ako . . .

64 Dili ingon nga aron usabon ko, ang pagkaseryoso nato karon; apan, seryoso Kini, pero wala ko pa man gud nahisgotan ang maong Selyo.

65 Kung unsa nga ang itum nga baka nagakaon og lunhaw nga sagbot, ug nagahatag og puti nga gatas, nga nagakahimong dalag nga mantekilya! Ako—siguradong dili ko maisaysay kana, kita n'yo. Tungod, nakita n'yo, ang matag usa nianang produkto nagagikan sa usa pa. Ug kon sa unsang paagi nga nagakahitabo kana, dili ko maisaysay kana.

66 Dili ko usab maisaysay kon unsa nga ang duha ka lirio nagatubo, o ang duha ka bulak, nga mao ra nga matang, ug ang usa pula, ug ang usa pa dalag, ug ang usa kapihon, ug ang usa bughaw. Dili ko masabtan kana. Mao ra man unta nga adlaw ang nagasidlak kanila. Asa kaha nagagikan ang kolor? Kita n'yo? Ako—dili ko maisaysay kana, apan bisan pa niana kinahanglan mong dawaton kana.

67 Aduna lang unta og maayong teologo nga magpasabot kanako kon giunsa niining kalibutana sa pagpabilin sa orbit niini. Aduna unta'y siyentipikong pamaagi nga makalabay kamo kanako og bola diha sa hangin, nga nagatuyok, ug pasagdan kana nga mohimo og ikaduhang pagtuyok, sa mao ra nga puwesto. Dili n'yo mahimo kana. Ug bisan pa niana hingpit nilang nakalkulo ang oras hangtud nga masulti nila ang pag-eclipse sa adlaw nga ingon ka eksakto, baynte ka tuig gikan karon. Wala sila'y relo o unsa man nga orasan, o unsa man nga makinarya, nga ingon-ana ka eksakto. Ug bisan pa niana nagapabilin kini nga nagbitay dinha. Ug, dayon, nakakiling kini. Unsa kaha kung medyo motul-id kana? Oo. Ginahimo n'yo lang hangal ang inyong kaugalingon, nga sulayan kana, kita n'yo.

68 Busa, nakita n'yo, ayaw paninguhaang makaangkon kamo og kaalam, aron makasabot. Toohi lamang kung unsay Iyang ginasulti. Ug kung magmahimo kamong mas yano, nan tan-awa, makaplagaan ninyo Kini. Karon, mapasalamaton kaayo ko tungod niana, mapasalamaton nga Iyang, gihimo ang Iyang Kaugalingon nga yano. Karon, nakita na nato, ang ika-6 nga kapitulo ug ang ika-9 nga bersekulo. Mosugod na ko karon.

Ug sa pag-abli niya sa ikalimang selyo, nakita ko sa ilalum sa halaran ang mga kalag sa mga gipamatay tungod sa pulong sa Dios, ug tungod sa pagpamatuod. . . nga ilang gihimo:

⁶⁹ Himatikdi, wala na'y gisulti dinhi og usa na usab ka Mananap, o usa ka buhing—buhing Binuhat, sa niining pagmantala sa Ikalimang Selyo. Karon hinumdumi, nga adunay mananap, sa Ikaupat nga Selyo. Aduna pud, sa Unang Selyo, sa Ikaduha, Ikatulo, ug sa Ikaupat, apan wala na dinhi. Kita n'yo?

⁷⁰ Karon, kung namatikdan ninyo, basahon lang nato pag-usab, ang usa sa Mga Selyo. Balikan sa nato ang Ikaupat nga Selyo, kita n'yo. Ug kana'y sa ika-7 nga bersekulo.

Ug sa pag-abli niya sa ikaupat nga selyo, nadungog ko ang tingog sa ikaupat nga buhing binuhat nga nagaingon, Umari ka. . . tan-awa.

. . . sa iyang. . . pag-abli sa ikatulong selyo, nadungog ko ang tingog sa—sa ikatulong buhing binuhat nga nagaingon, Umari ka ug tan-awa.

. . . ang ikaduhang buhing binuhat. . . Umari ka. . . tan-awa.

. . . ug ang unang buhing binuhat nagaingon, Umari ka ug tan-awa.

⁷¹ Apan pag-abot nato sa Ikalimang Selyo, wala na'y Mananap. Karon matikdi lang.

Ug sa pag-abli niya sa ikalimang selyo, nakita ko sa ilalum sa halaran. . .

⁷² Dihadiha mismo! Kita n'yo, walay—walay Mananap dinha. Ug ang Mananap nagarepresentar og gahum. Nasayod kita niana, kita n'yo. Wala na'y buhing Binuhat.

⁷³ Karon, ang usa niana nga mga Binuhat, nahibaloan nato, sa pagtuon nato mahitungod sa—sa—sa kapadayagan sa mga iglesia, nga ang usa kanila. . . leon; ug ang usa pa—usa pa mao'y laking-baka; ug ang usa pa usa usa ka tawo; ug ang usa pa mao'y agila. Nahibaloan nato, sa mga kapanahonan sa iglesia, nga kining upat ka Binuhat, nagakahulogan og upat ka gahum, nga nakapalibot sa Mga Buhat sa Apostoles, sama sa kung unsa kini kaniadto ang—ang atua sa tabernakulo didto sa kamingawan. Ug nasabtan na man ninyo kana, tungod dili na ko mogahin pa og oras aron maghisgot niana. Gidrowing na nato kana dinhi, ug gipakita sa ingon ka eksakto! Gibantayan nila Kini, ang Cordero ug ang Pulong, nga ipamuhat ang Pulong sama sa gibuhat nila sa—sa arka sa pakigsaad nga atua sa Balaan nga Dapit didto sa kamingawan kaniadto, ug uban pa.

⁷⁴ Karon, gipakita pud nato sa klarong pagkahan-ay, pinaagi sa mga kolor sa banay sa Israel, ug pinaagi sa. . . Pila man ang nakapatalinghug sa pito—sa pito ka mga kapanahonan sa

iglesia? Siguro halos, tanan, duha-sa-tulo kaninyo. Himatikdi, nga bisan ang kinaiyahan sa Mananap usa mismo ka simbolo sa banay, nga ang upat . . . napahimutang ang dose ka banay, upat sa matag bahin, o—o tulo ka banay sa matag bahin. Ug ang upat ka Binuhat naglingkod ug nagbantay, niini nga mga banay, gikan sa upat ka direksiyon.

⁷⁵ Ug, sa dihang, atong gihisgotan ug nasabtan ang mga Ebanghelyo, ug gipakita nato sa ingon ka eksakto. Pagmosulod ka paadto sa arka, nagabantay sila sa arka, ang pakigsaad. Ug dayon hingsayran nato nga ang pakigsaad sa bag-ong Iglesia, ang representante Niini sa yuta, mao ang Balaang Espiritu. Gipadala sa Dugo, nganhi kanato, ang Espiritu Santo. Ug girepresentar ang upat ka Mananap, ug sama sa—sa dose ka banay sa Israel, nagabantay kini. Ug hingsayran pud nato nga ang ilang mga kinaiyahan, ug gitan-aw nato kanang mao ra nga kinaiyahan ug gitakdo kana ngadto sa matag usa nianang upat ka mga Ebanghelyo, nga eksakto, eksaktong pareho gayud. Ang usa nagpakig-estorya ngadto sa leon, ang usa na usab ngadto sa laking-baka, ug ang usa pa . . . Ang upat mismo ka mga Ebanghelyo! Mao kana. Ang upat ka mga Ebanghelyo mao ang proteksyon sa Balaang Espiritu. Amen.

⁷⁶ Kanunay ko gayud ginahunahuna . . . Dili ko man gud kini malimtan. Karon, mga unom na ka tuig, siguro, sukad niadtong nadungog ko ang usa ka inilang tawo nga miingon nga kono ang . . . “Ang Mga Buhat sa mga Apostoles mao’y mga katukoranan lamang.” Nadungog ko nang gisulti kana sa makadaghang higayon. Apan ang madungog ang usa ka tawong adunay ingon-anang kaarang, ingon nga magwawali ug usa ka magtutudlo, nga nakapagsulat pa og pipila ka ilado nga mga libro nga ginabasa sa mga tawo sa bisan asa, ug moingon siya nga ang Mga Buhat kono sa mga Apostoles dili gayud angay alang sa pagpanudlo sa Iglesia!

⁷⁷ Nga unta, ang Mga Buhat sa mga Apostoles mao man ang pinaka-pundasyon Niini; dili ang katukoranan. Kondili ang pundasyon mismo! Tungod, ginaingon man sa Biblia nga ang—ang—ang—ang pundasyon sa Dios “natukod diha ibabaw sa Doktrina sa mga apostoles,” oo, “si Cristo, ang Pangulo, nga Bato sa pamag-ang.”

⁷⁸ Ug sa dihang mibarug kini nga tawo didto ug nagpahayag niana, ako—ako—ako—ako gayu’y . . . Nahugno gayud ang akong kasingkasing. Ug nakahunahuna ko, “Dili ikatingala.” Bueno, nakita ko karon, diha sa Mga Selyo. Kini’y wala pa gayud nahipadayag. Kana lang. Kita n’yo?

⁷⁹ Busa, ingon-ana, atua sila, nagatindog didto, apan aduna gyu’y nagsulti niana. Karon, matikdi, nanagbantay sila.

⁸⁰ Karon, sa dihang gihisgotan nato ang Mateo 28:19, ug gisubay kana nga butang sa tibuok Mateo, nga nagrepresentar sa

leon. Ug sa paghisgot, niana, nahibaloan nato sa eksakto gayud kon nganong nanagbautismo sila sa Ngalan ni Jesus Cristo. Ug atua Siya, nagatindog didto uban kana mismo nga Kasulatan, aron bantayan ang sagrado nga sugo mahatungod sa bautismo, sa Ngalan ni Jesus Cristo. Oo. Bueno, mobiya na ako sa mga kapanahonan sa iglesia karon.

⁸¹ Himatikdi. Apan, dinhi, sa pag-abot nato niining Ikalimang Selyo karon, walay—walay—walay mangangabayo nga mitungha, ug walay Mananap nga nagmantala Niini. Basta si Juan. . . Giablihan Kini sa Cordero, ug nakita Kini ni Juan. Walay si kinsa man dinha nga miingon, “Karon umari ka, tan-awa. Umari ka, tan-awa.” Matikdi, walay gahum nga iya sa buhi nga Binuhat. O walay. . .

⁸² Ug sa Ikaunom nga Selyo, wala usab og Mananap nga nagamantala Niini. Ug sa Ikapitong Selyo, wala gihapon og Mananap nga nagamantala Niini. Walay mga gahum nga nagamantala Niini. Kita n’yo, walay si kinsa man ang nagamantala niana. Diha sa. . . Tan-awa. Diha sa. . . Human sa Ikaupat nga Selyo, wala na’y pagmantala sa unsa mang gahum sa Mananap, gikan sa Ikalima, Ikaunom, o Ikapitong Selyo, wala gayud.

⁸³ Karon matikdi. Gusto ko kini. Sama sa mga panahon sa mangangabayo sa upat ka kabayo, ang maong mangangabayo (usa ra) sa upat ka nagkalainlaing mga kabayo, adunay Mananap nga nagamantala sa maong gahum. Sa matag higayon nga mosakay ang maong mangangabayo sa usa na usab ka kabayo ug motungha aron mangabayo, usa ka laing matang sa Mananap ang motungha ug magmantala niini, “Ingon niana ang dakung misteryo.” Kita n’yo? “Mao kana ang misteryo.” Ngano man? Pagmantala kana sa maong misteryo.

⁸⁴ Ngano kaha nga wala ma’y usa dinhi sa Ikalimang Selyo, aron magmantala Niini? Ania kini, sumala sa kapadayagan nga gihatag ni Ginoong Jesus kanako karong adlaw, kita n’yo, o kaganinang buntag, sa sayo. Kana’y, tungod nga, ang misteryo sa mga kapanahonan sa iglesia tapos na, niini nga panahon. Ang misteryo sa anticristo nahipadayag na, niini nga panahon. Misakay na ang anticristo sa iyang ulahi nga pagpangabayo, ug nakaplagaan nato siya sa niining maluspad nga kabayo, nga giusa na ang daghan niyang mga kolor, ug nagapangabayo hangtud ngadto sa pagkalaglag.

⁸⁵ Hisgotan nato kana diha sa mga Trumpeta, ug uban pa, pag itudlo na nato kana. Pagmaghisgot ko niana karon, mapahilayo lang kita sa hilisgotanan na usab. Ug kita—moadto na kita. . . nagapangabayo siya. . .

⁸⁶ Mao kana’y hinungdan nga wala na’y usa dinha. Karon, wala ta’y makitang nahisulat nga hinungdan, pipila ka hinungdan para sa maong butang. Karon, hinumdumi ninyo, nga sa una pa,

sa sinugdanan, ingon ko nga dili mahimong magkaaduna og unsa mang butang nga walay hinungdan. Nadumduman n'yo ba ang diyutay nga tulo sa tinta? Kita n'yo? Karon kinahanglan mong hibaloon ang hinungdan. Bueno, aduna gyu'y hinungdan nga dili na nila kinahanglan nga aduna pa'y Mananap, o usa ka gahum, aron magmantala niini nga Selyo nga giablihan. Ug ang Dios lang ang makapadayag kon ngano, kana lang, tungod kay anaa man Kini tanan—tanan diha Kaniya.

⁸⁷ Apan ang hinungdan nga Iyang ginapadayag Kini, sa nasabtan ko, kini mao'y tungod nga ang misteryo sa Basahon sa Katubsanan, ingon nga napadayag na ang anticristo; ug sa mao ra nga panahon, gisakgaw na ang Iglesia, ug kining mga butanga dili na magakahitabo sa kapanahonan sa iglesia, dili gayud. Husto kana. Sila'y—sila'y wala na sa kapanahonan sa iglesia. Ang Iglesia bug-os na gayud nga Gisakgaw, nianang panahona. Mikayab na ang Iglesia, diha sa ika-4 nga kapitulo sa Pinadayag, ug wala na mibalik hangtud nga magabalik Kini uban ang Hari Niini, diha sa ika-19 nga kapitulo. Apan ginapadayag niining Mga Selyo dinhi kung unsay nahitabo, kung unsay nagakahitabo, ug kung unsay magakahitabo. Kita n'yo? Ug, karon, kung unsa ma'y mahitabo sa kapanahonan sa iglesia, gipadayag na sa niining Mga Selyo. Ug karon matikdi kung unsay mahitabo Niini.

⁸⁸ Ang—ang upat ka hugna sa iyang mangangabayo napadayag na. Ang upat ka hugna sa anticristo, nga nagapangabayo, napadayag na man nianang panahona, busa wala na sila magkinahanglan og unsa pa man.

⁸⁹ Ug adunay upat ka buhing Binuhat ang Dios, aron imantala ang maong mangangabayo samtang nagapangabayo kini. Ang upat ka Binuhat mao ang upat ka mga gahum. Karon, nasayod kita nga ang *Mananap*, sumala sa interpretasyon sa mga termino sa mga simbolo sa Biblia, nagakahulogan og, “gahum.” Karon, sabton nato kini og ayo. Ang upat mao'y mga Mananap, sa Biblia, nga nagarepresentar og gahum sa taliwala sa mga tawo.

⁹⁰ Karon, kung atong tan-awon, sama ni Daniel, sa dihang nakakita siya og usa ka nasud nga mibangon, usa kadto tingali ka oso nga may bitbit og usa ka gusok sa kilid niini, ingon nga simbolo. Dayon nakakita siya og usa na usab ka gahum nga mitungha, usa ka kanding. Nagrepresentar kadto og usa ka butang. Dayon nakakita siya og usa na usab ka gahum nga mitungha, ug—ug usa kadto ka leopardo nga adunay daghang mga ulo. Nagrepresentar kadto og usa ka gingharian. Dayon nakakita na sab siya og usa pa nga mitungha, usa ka dakung leon nga may mga ngipon, ug—ug miyatak sa mga nahibilin. Nagrepresentar pud kadto og lahi nga gahum, mismo. Ang usa mao ang—ang gingharian ni Nabucodonosor; ug ang usa pa, medyo usa—usa ka damgo. Nakakita si Daniel og usa ka panan-

awon; nagdamgo pud si Nabucodonosor. Apan gihubad ni Daniel ang iyang damgo, ug tukma gayud sa maong panan-awon.

⁹¹ Amen! Whew! Oh! [Ginapalampak ni Igsoong Branham ang iyang mga kamot sa makausa—Ed.] Kung kahibalo lang mo kung unsay nahitabo! Unsa ma’y nahitabo sa wala pa kita mibiya dinhi? Nasabtan n’yo ba? Aba, unom ka sunod-sunod nga mga damgo ang miabot nga eksaktong tukma sa panan-awon. Amen. Kita n’yo? Ang damgo, pag gihubad, usa ka panan-awon. Tungod kay ang tawo ingon nga wala gipanganak nga adunay ilalum-nga-panimuut aron, nga bisan nagmata ra makita niya kini, kung ingon-ana misulod ang Dios sa niining ilalum-nga-panimuut ug nakigsulti kaniya. Diin, gisaad na Niya kana, nga pinaagi sa mga damgo, sa kaulahiang mga adlaw, Iyang pagaduawon ang mga tawo, ug pinaagi usab sa mga panan-awon. Kita n’yo?

⁹² Karon, ang panan-awon mao’y sa diha nga nagmata ka lang, nagatindog mismo nga sama niini, ug aduna na’y mga butang nga ginapahayag. Ug magatindog ra, nga ginasulti mismo kanila ang mahitungod niini; kung unsay nakita nga nahitabo, ug unsay magakahitabo pa lang, ug uban pa.

⁹³ Apan, karon, ang damgo usab mao’y sa diha nga nahikatulog ka, ug dili-aktibo ang imong lima ka mga sensya, ug ikaw—anaa ikaw sa imong ilalum-nga-panimuut. Anaa ikaw sa kon asa man, tungod kay, pagmibalik na ka, mahinumduman mo man kon diin ikaw gikan, og mahinumduman mo kana sa tibuok mong kinabuhi. Kita n’yo? Busa, ang imoha kanang ilalum-nga-panimuut. Dayon aron nga, kita n’yo. . .

⁹⁴ Sumala sa ginaingon ni Kongresman Upshaw kaniadto, “Dili ka mamahimong usa ka butang nga dili man ka ingon niana.” Ug husto kana, kita n’yo.

⁹⁵ Ug, dayon, kung gipakatawo ka man ingon nga usa ka magtatan-aw. Karon, nakita n’yo, aron mahimo kana, kanang duha ka panimuut kinahanglan nga magkauban mismo; dili nga ang usa *dinhi* uban ang lima ka mga sensya, aktibo, og ang usa pa *dinhi* pagnahikatulog ka uban ang lima ka mga sensya, dili-aktibo. Apan, nakita n’yo, pag gipakatawo ka, nga kanang duha, puedeng mag-aktibo og dungan, nan dili kinahanglan nga tulog ka. Puede kang moadto gikan sa usa ngadto sa usa pa, nga sama—sama niana. Dili kinahanglan nga tulog ka. Wala na man gud panahon nga kinahanglan tulog ka. Ug dili mo mahimo ang imong kaugalingon nga ingon niana.

⁹⁶ Busa, “Ang mga gasa ug mga pagtawag gibuut-nang-daan sa Dios.” Sila’y—sila’y mga gasa sa Dios ug mga pagtawag, nga “walay pagkabakwi,” ingon sa Biblia. Kita n’yo? Sila’y gihatag-nang-daan sa wala pa ang pagkatukod sa kalibutan. Kita n’yo?

⁹⁷ Karon, karon, hingsayran nato nga ang. . . Ang mananap, diha sa Daniel, nagkahulogan kadto og gahum nga motungha sa

taliwala sa mga tawo. Oo. Ug—ug ang mga panan-awon ni Juan dinhi, usab, nagapakita nga kadto mao'y mga gahum, mga nasud nga magatungha. Sama, sa Estados Unidos nga makita diha sa Pinadayag 13, ingon nga usa ka cordero. Ug dayon kung gusto n'yong mahibaloan, ang lahi . . .

Moingon mo, “Bueno, kana, nagahisgot man kana mahitungod sa pang-nasudnon nga gahum.”

⁹⁸ Nagarepresentar kini og balaan nga gahum, usab, ang usa ka mananap. Nahibalo ba kamo niana?

⁹⁹ Himatikdi n'yo si Rebekah; sa diha—sa diha nga ang—ang alagad ni Abraham, nga si Eliezer . . . Sa pag-adto niya aron kuhaon si Rebekah, ang maong babaye . . . Gipasakay niya siya sa usa ka kamelyo, sa mismong kamelyo nga iyang gipainom. Ug misakay siya niini nga kamelyo, aron tagboon ang iyang wala-pa-nakita nga pamanhonon. Ang mismong butang nga iyang gipainom, mao usab ang butang nga nagdala kaniya ngadto sa iyang umalabot nga panimalay ug bana.

¹⁰⁰ Ug mao sa gihapon kini sa karon, kita n'yo. Ang mismong butang nga ginabisbisan sa Iglesia, mao kana ang Binhi, ang Binhi sa Pulong. Kini'y ang mismong Pulong nga nahimong buhi ug magadala kanato ngadto sa atong wala-pa-nakita nga Pamanhonon. Kita n'yo? Kita n'yo?

¹⁰¹ Ug tan-awa kung unsa ka eksakto. Mibiya si Isaac sa balay, ug miadto sa kaumahan, nga halayo sa iyang panimalay, sa dihang nakita siya ni Rebekah.

¹⁰² Ug pagatagboon pud sa Iglesia si Cristo diha sa kawanangan, ug dayon dalhon Niya Siya balik ngadto sa Panimalay, sa Panimalay sa Amahan, kon diin nahilandam na ang mga puloyanan. Gikuha pud ni Isaac si Rebekah sa mao gihapon nga paagi.

¹⁰³ Ug, matikdi, nga gugma mismo kadto sa una pa lang nga pagkit-anay. Oh, grabe! Midalagan gayud si Rebekah aron tagboon ang si Isaac.

¹⁰⁴ Ug sa ingon-anang paagiha usab pagatagboon sa Iglesia si Cristo, diha sa kawanangan, ug makauban na Siya hangtud sa kahangturan.

¹⁰⁵ Karon, sa mga termino sa Biblia, kini nga mga Mananap mao'y mga gahum. Matikdi. Gusto ko, karon, gusto kong himatikdan ninyo.

¹⁰⁶ Ang yawa aduna siya og iyang upat, ka nagausab-usab, nga de-kolor nga mga mananap, aron masakyan. Aduna siya'y upat ka mananap. Ang tulo niini, gihimong usa na lang ka kolor, ug gihimo kanang usa na lang og usa—usa ka maluspad nga kabayo; gikan sa usa ka puti nga kabayo, pula nga kabayo, og itum nga kabayo. Ug hingsayran nato, nga ang matag usa niining mga kabayo mao'y usa ka hugna sa iyang ministerio, usa ka hugna sa nahaunang iglesia kaniadto nga

nahimong usa ka denominasyon, didto sa Nicaea. Ang orihinal nga iglesia ng Pentecostal, nga kaniya gibubo ang Espiritu Santo, mikanaug, midawat og anticristo nga espiritu, nagtukod og usa ka organisasyon, ug nanganak og mga anak nga babaye nga mga organisasyon. Giusab-usab ang iyang gahum, sa makatulo ka higayon, ug gihiusa ang mga niini ngadto sa usa na lang, ug nahimong usa ka maluspad nga kabayo. Ug dayon gihatagan og ngalan nga gitawag og Kamatayon, ug gisakyan kini paingon sa Eternidad. Ingon gayud kini ka tataw! Karon, karon matikdi, gihatagan siya og ingon niini—niini nga kabayo, ug ginasakan niya kini.

Ang Dios, ang Dios aduna, usab, sama sa matag panahon . . .

¹⁰⁷ Karon matikdi. Sa diha nga mitungha ang anticristo, sa unang higayon, sa unsa man siya mitungha? Puti nga kabayo. Kita n'yo, aba, inosente kaayo, usa pa lang ka doktrina sa iglesia. Gusto nila og pagpakig-fellowship. Ang inyong pagpakig-fellowship anaa lang kang Cristo. Apan gusto nila og usa ka pagpakig-fellowship. Dili nila mapugngan kana, gusto nilang makabaton og . . .

¹⁰⁸ Bueno, kabalo na mo, sama ra sa gagmay'ng mga grupo-grupo nga manungha sa iglesia. Kamo, kabalo na mo niini, kamong mga pastor. Kita n'yo? Sila, sama sa ginaingon nila, "Mga langgam nga managsama ang balahibo." Apan kung kita'y natawo na pag-usab, mga igsoon, kana—dili na ingon niana ang taras. Dili. Karon, kita—kita—kita . . .

¹⁰⁹ Kung aduna man kita'y makita nga sayup sa atong mga kaigsoonan, iampo lang nato ug sa Dios lang kana ipahibalo, ug higugmaon kana nga tawo hangtud nga madala nato siya mismo nganha sa Presensiya sa Dios. Kita n'yo? Ingon niana gayud, ang tinuod nga paagi sa pagbuhat niana.

¹¹⁰ Kabalo na mo, miingon si Jesus. "Magkaadunay mga bunglasyon dinha," tungod kay giingon man ni Jesus nga magkaaduna gayud, "apan ayaw ninyo sila pang-ibta; tingali'g maibut ninyo pag-apil ang trigo." Kita n'yo, "Pasagdi lamang sila." Iyang buhaton . . . Pasagdi ninyong Siya ang mobuhat sa pagpanglain pagmoabot na ang panahon. Kita n'yo? Pasagdi ninyo kanang tanan nga managtubo pagdungon.

¹¹¹ Himatikdi, sa diha nga mitungha ang mananap, mitungha usab ang anticristo diha sa usa ka mananap, nga iyang gahum.

¹¹² Oh, gusto ko kini! Hinay-hinay ko nang gibati ang pagkarelihiyoso karon, kita n'yo, tingali'g ang kadasig mismo. Matikdi, sa diha nga ang anticristo . . . Oh, kanang—kanang mga kapadayagan, diha sa Presensiya mismo nianang bola sa Kalayo nga nagpaibabaw didto sulod sa usa ka lawak! Hangtud nga . . . Oh, igsoon! Bisan og nakita ko na Kana, sukad niadtong bata pa ako, sa matag higayon nga mopaduol Kini kanako, nagapahadlok Kini kanako. Halos maipahimutang Niya ako sa

kawalay-panimuut nga kahimtang. Dili ka gayud maanad Niini, dili mo mahimo. Sagrado kaayo Kini.

113 Matikdi, sa diha nga mitungha ang anticristo (sa upat) sa iyang mga mananap nga ministerio, nakasakay dinha, nagpadala pud ang Dios og Mananap aron pakigbatokan kini. Kita n'yo? Karon matikdi. Dayon, sa matag higayon, (ang maong mapintas nga mananap nagasakay) sa iyang kabayo, ang anticristo nga nakasakay sa iyang kabayo, sa iyang mananap, aron imantala ang iyang ministerio; ginapadala sa Dios ang Iyang Mananap, usab, ug anaa Siya mismo Niana, aron imantala pud ang Iyang pagpakigbatok niini.

114 Karon, nagaingon ang Kasulatan, “Sa diha nga nagaabot ang kaaway maingon sa usa ka baha, magpatungha ang Espiritu sa Dios og usa ka pangbatok niini.”

115 Ug busa sa dihang mitungha ang kaaway ingon nga usa ka anticristo; nagpadala ang Dios og usa ka partikular nga matang sa gahum aron atubangon siya. Ug dayon sa dihang sila . . .

116 Mitungha siya pag-usab, ingon nga usa ka mangangabayo sa pulang-kabayo, lahi na pud nga kolor, usa na usab ka gahum, og usa na usab ka ministerio; nagpadala pud ang Dios og usa pa nga nagsunod kaniya, aron pakigbatokan kana, og aron maprotektahan ang Iyang Iglesia.

117 Gipadala niya ang ikatulo; usab, gipadala pud sa Dios ang Iyahang, ikatulong Mananap nga mitungha ug nagmantala niadto.

118 Gipadala niya ang ikaupat; gipadala pud sa Dios ang Iyang ikaupat. Ug dayon natapos ang anticristo, ug ang mga kapanahonan sa iglesia natapos, usab, nianang panahona. Matikdi. Karon, oh, maayo kaayo kini!

119 Karon, makita nato nga nagausab-usab ang yawa, upat-upat ka mananap, nga nagkahulogan kung unsa nga gahum sila gikapahayag ngadto sa . . . o kung unsa nga gahum ang iyang gipahayag sa kalibutan, ug kung giunsa nga natapos sila ngadto niining maluspad, “kamatayon” nga kabayo.

120 Karon atong tan-awon ang mga gahum sa Dios, sa niining mga Mananap, nga nakigbatok kanila.

121 Ang unang Mananap sa Dios, nga Iyang gigamit aron atubangon ang anticristo, ang anticristo nga espiritu sa dihang anaa pa lang kini sa iyang pagpanudlo. Karon hinumdumi, sa unang pagsakay sa anticristo, anaa siya sa usa ka ministerio sa pagpanudlo. Ang anticristo nagsakay, una, diha sa usa ka ministerio sa pagpanudlo. Karon matikdi ang usa nga mitungha aron atubangon siya: ang leon, ang Leon sa banay ni Juda, nga mao ang Pulong. Sa diha nga migawas ang iyang mini nga pagpanudlo, mitungha pud ang tinuod nga Pulong aron atubangon siya.

122 Mao kana'y hinungdan nga aduna kita'y usa ka Irenaeus, ug usa ka Polycarp, ug—ug—ug ingon niadto nga mga tawo, usa ka San Martin.

123 Sa dihang nagasakay kanang anticristo uban sa iyang mini nga pagpanudlo; gipadala pud sa Dios ang Iyang Pagpanudlo, ang Pulong, ang Leon sa banay ni Juda, nga mao ang Pulong nga nahipadayag diha sa Balaang Espiritu. Ug ang Balaang Espiritu, atua usab, aron ipadayag ang Iyang Kaugalingon, nga mao ang Pulong!

124 Mao kana'y hinungdan nga ang nahaunang Iglesia kaniadto adunay mga pagpang-ayo, ug mga milagro, ug mga pananawon, ug gahum, tungod kay mao man kadto ang buhi nga Pulong, diha sa porma nga Leon sa banay ni Juda, nga miadto didto aron pakigbatokan kadto. Amen! Karon nasabtan n'yo ba kana? Gipadala niya ang iyang gahum, ang anticristo; gipadala pud sa Dios ang Iyaha, ang Pulong. Ang anticristo, mini nga pagpanudlo; ang tinuod nga Pagpanudlo mitungha usab, aron pakigbatokan kadto! Karon, mao kana ang pinaka una. Karon, kadto mao ang unang Iglesia, nga apostolikanhon, ang mitungha aron atubangon siya.

125 Karon, ang ikaduhang mananap nga gipadala sa anticristo, mao ang usa ka pula nga mananap, nga mao'y...nga iyang gisakyan, aron sa pagwagtang sa pagdinaitay (ug) gikan sa yuta, ug—ug aron makiggubat.

126 Karon, ang ikaduhang mitungha aron makigbatok kaniya, mao ang laking-baka nga Mananap. Ang laking-baka nagakahulogan og pagpangabudlay, usa ka Mananap alang sa lulan.

127 Ug karon kung mahimo mohunong 'sa kita sa makadiyut. Tugoti ako, oo, tugoti lang ko, aron masigurado gayud nga masabtan ninyo kini karon. Karon, mao kana ang matang nga medyo makapalibog kaninyo. Apan atong basahon ang Tiatira dinhi. Matikdi ug tan-awa kung dili ba kini usa—usa—usa ka nagahago nga Iglesia, nakita n'yo.

Ug ngadto sa manulonda sa iglesia sa Tiatira isulat mo; Kining mga butanga nga gipamulong sa Anak sa Dios, kinsang mga mata sama sa nagasiga nga kalayo, ug ang iyang mga tiil sama sa tumbaga nga nagasidlak;

Nasayod ako sa imong mga buhat, . . .

128 Kita n'yo, ang tanan nahimong mga pagpamuhat karon, kita n'yo, kay tungod man kana sa nagasakay nga kabatok niya.

. . . ug sa imong gugma, ug pag-alagad, (kita n'yo, ang tanan niini gayu'y . . .) ug pagtoo, ug . . . pagpailub, ug ang imong mga buhat (na usab, makaduha, “ang imong mga buhat”), ug ang ulahi nga labaw pa kay sa mga nahauna.

¹²⁹ Kita n'yo, nagapakita kana nga, ang Kapanahonan sa Tiatira, human nga nakapahiluna ang anticristo ug misulod sa Kapanahonan sa Tiatira, ang luoy'ng Iglesia wala gayu'y unsa man nga mahimo kondili ang—ang maghago gayud.

¹³⁰ Ug ang usa pa ka butang, ang laking-baka, usab, usa ka Mananap nga panghalad. Kita n'yo? Gitugyan ra nila ang ilang mga kinabuhi sa ingon ka matugtanon nga mahimo nila, niadtong mangiub nga mga kapanahonan, sulod sa usa ka libo ka tuig kaniadtong gikontrolar sa Katolisismo ang kalibutan. Ug masinugtanon sila nga nanagtugyan, oo man o dili. Wala sila nahadlok nga mamatay. Bisan kamatayon pa, okey lang. Matugtanon silang nangadto ug namatay, bisan pa man. Ngano man? Ingon-niadto man ang mismong Espiritu sa maong kapanahonan!

¹³¹ Mao kana'y hinungdan nga ingon niana sila, mao kana'y hinungdan nga ingon niana si Irenaeus, mao kana'y hinungdan nga ingon niana si Polycarp, si Juan, si Pablo, kadtong halangdon ug maisogon nga mga lalaki kaniadto, sa ilang pagpakigbatok niadtong butang!

¹³² Nakita na kana ni Pablo. Miingon siya, “Ako nahibalo, nga tapos sa akong paggikan, pagasudlon kamo og mga lobo, mga igsoon, nga managpanudlo og mga butang nga balitad, ug magabira kini kaninyo palayo.” Tan-awa n'yo kanang estrikto, gamay'ng, tigulang nga apostoles nga nagatindog didto, gipusposan ang iyang likod og napuno sa mga labod, ug nagaluha ang iyang mga mata. Apan mas halayo ang iyang makita kay sa ilang. . . kanang teleskopyo nga gigamit nila, nga makita nila kono ang usa ka gatus ug baynte ka milyon nga light years sa light space. Mas makakita siya diretso mismo sa Eternidad. Ingon-ana siya. Ug iyang gisulti nang daan kini ug miingon nga ingon niana ang mamahitabo. Ug miingon, usab, nga mamaingon niana kana ngadto sa ubang kapanahonan nga moabot. Karon matikdi, mao kana si Pablo.

¹³³ Sunod, human kaniya, si San Juan nga nabuhi og pinakadugay. Ug sa dihang gipanguhaan ni Juan nga tipunon ang tanang sagrado nga mga Sulat, nga dinihogan sa Espiritu Santo, ug hiusahon kini ug himoon nga Biblia, gidakup siya sa imperyong Romano ug gitambog siya didto sa Isla sa Patmos. Atua siya didto sa Isla sa Patmos tungod sa Pulong sa Dios. Ngani gitabangan siya ni Polycarp nga hubaron kadto.

¹³⁴ Nabasa ko, niadtong miaging adlaw, ang sulat nga gisulat mismo ni Maria ngadto kang Polycarp. Ug gikasab-an. . . wala siya gikasab-an. Kondili gidayeg siya tungod sa iyang pagkamaisogon nga tawo nga mahimong motudlo ug dawaton ang pagtulon-an ni Jesus Cristo, nga Kinsang gipanganak niya, gikan sa Dios. Ang mismong hamubong sulat ni Maria nga iyang gisulat ngadto kang Polycarp.

135 Gipakaon si Polycarp ngadto sa mga leon, kabalo na mo. Wala, gisunog diay siya. Ulahi na—na man kaayo para kanila kaniadto nga buhian ang usa ka leon sulod sa arena, ug busa nagguba na lang sila og usa ka lawak-ligoanan, usa ka karaan nang bilding-nga-ligoanan didto, ug gibalhog siya sulod sa—sulod sa—sulod sa maong arena ug—ug gisunog siya.

136 Ug sa naglakaw na siya, padulong didto, naglakaw siya nga nakaduko ang iyang ulo. Miingon ang Romanong centurion, “Usa ka na ka tigulang nga tawo, ug gitahud og ayo. Nganong dili mo man isalikway kana nga butang?”

137 Padayon lang siya nga nagahangad ngadto sa Langit. Ug usa ka Tingog ang misulti gikan sa kon asa man. Wala pud sila mahibalo kon asa dapit. Ang ingon, “Polycarp, ayaw’g kahadlok. Ako’y kauban nimo.” Uh-huh. Ngano man? Gibarugan man niya kadto nga Pulong.

138 Ug sa gisugdan na nilang ipangtapuk ang mga tabla diha kaniya, aron sunogon siya, dihay usa ka Langitnong musika nga mikunsad. Ug—ug ang mga pag-awit sa pipila ka Langitnong linalang sa kon asa man ang nanag-awit sa maong alawiton. Wala gayud bisan usa ka higayon nga namilok siya ngadto sa mga mayubiton.

139 Ingon-niana ang maisogon nga mga tawo. Ingon-niana ang mga kalalaken-an nga makabarug. Ang mga martir sa tanang mga kapanahonan, kaniadto, nanag-antus gyud og ayo. Apan unsa man sila? Sila’y napailalum sa inspirasyon, sa Espiritu sa Dios, sa gahum. Ako . . .

140 Ayaw n’yo kalimti kini, iglesia. Ug kamong mga kaigsoonan, nga nagapaminaw sa teyp, gusto kong susihon ninyo kini. Unsaon man pagbuhat sa maong mga kalalaken-an og unsa mang butang nga sama niadto gawas lamang sa gahum sa Dios nga gikahatag kanila? Ibutang ko kini nga kahon sa itaas dinhi, aron ihulagway kana. Kung magpadala man ang Dios og usa ka partikular nga Espiritu sa taliwala nila, nan kana lang ang bugtong butang aron makapamuhat sila, pinaagi sa Espiritu nga nagapamuhat diha kanila. Karon atong pamatud-an kaninyo, pinaagi sa kasaysayan sa Iglesia, ug pinaagi sa—sa pag-abli sa Mga Selyo, ug sa mga gahum nga gikapadala; ug matikdi, eksakto, ang pagpamuhat sa Iglesia sumala mismo sa—sa maong dihog, ug wala sila nanagbuhat og laing uban pa.

141 Karon, ang una mao kanang leon nga nagnulob, kanang putli, walay-sambog nga Pulong.

142 Ang ikaduha, diha sa Tiatira, mao ang laking-baka. Ug usa—usa Kadto ka gibug-atan nga . . . usa ka Mananap alang sa lulan. Pasayloa ko. Ug usa usab Kadto ka panghalad nga Mananap. Ug dili ba eksaktong mao kadto ang kabus, og luoy’ng Iglesia kaniadto? Naghari kaniadto ang Roma, sulod sa usa ka libo ka tuig sa mangiub nga mga kapanahonan, ug ang

bisan unsa man nga dili magpahayag kaniadto nga nagapasakup sa iglesiang Romano pagapatyon dayon. Ug kinahanglan nila kaniadto nga magpangabudlay, magbalhin-balhin gikan sa usa ka lugar ngadto sa usa ka lugar.

143 Kamong mga Mason, awhagon ko ang inyong pagtagad. Mahinumduman ba ninyo ang ilhanan sa krus? Karon kamo—kabalo na mo kung unsay akong ginahisgotan.

144 Karon matikdi. Karon, kung inyong—kung inyong namatikdan, kana mao’y pagpas-an ug pagpreserba nianang Biblia. Kita n’yo? Ug kinahanglan nilang manglimbasog alang sa usa’g usa. Mao kana, ang laking-baka. Ug sa miabot na ang panahon. . . Gibasa nato kana kagabii. Kita n’yo, sa diha nga mitungha na ang maong butang, ug miabot ang halad, ug kinahanglan na nilang mopanaw.

Miingon Siya, “Ayaw pag-unsaa ang bino ug Lana.”

145 Unsa ma’y gibuhath nila? Kinabubot-on silang miadto didto ug namatay. Dili kadto igsapayan kanila, tungod kay ang Espiritu sa Iglesia niadtong panahona mao man ang paghalad, og pagsakripisyo. Ug miadto sila didto sa ingon ka matugtanon nga mahimo nila, nga dinihogan sa tinuod nga Espiritu sa Dios niadto nga kapanahonan, ug nangamatay ingon nga mga bayani, ingon nga halad; linibo ka pilo, saysenta’y-otso ka milyon kanila ang anaa sa listahan.

146 Ang laking-baka, ingon nga halad! Oh, grabe! Nasabtan n’yo ba kana? [Nagaingon ang kongregasyon, “Amen”—Ed.] Okey. Maayo. Karon, ang halad, pagpanglimbasog lang ang mahimo nila niadto nga kapanahonan, aron pakigbatokan ang dakung kabatok para niadtong usa ka libo ka tuig.

147 Karon, ang ikatulong mananap nga migula gikan sa yawa, mao kining itum nga kabayo. Kita n’yo?

148 Karon, ang ikatulong Mananap pud nga migula, usa ka gahum nga gikan sa Dios, aron pakigbatokan siya, aron pakigbatokan ang mga gahum sa itum nga kabayo; mao ang tawo, maalisto, utokan, may kaalam sa Dios. Kabalo mo, mas utokan ang tawo, kay sa bisan unsa man nga mga mananap. Kita n’yo? Siya’y mas utokan, tungod mahimo man niyang pildihon siya sa kaalisto, halos. Siya’y utokan gayud, og maalisto. Kita n’yo? Ug siya. . .

149 Ang—ang panahon, sa mangiub nga kapanahonan, migula kini niadtong mangiub nga kapanahonan kaniadto; karon, niining pikas nga bahin, nagapangabayon kining itum nga kabayo, sa diha nga nagapabayad sila para sa ilang—ilang—ilang—ilang mga halad ug para sa tanang butang nga gibuhath nila. Ug kuwarta mismo ang. . . Oh, kabalo na mo kung unsa ang nahitabo kaniadto.

150 Karon, ang sunod nga butang nga migula, aron mabatokan kana, mao ang Mananap nga adunay dagway sa tawo; utokan, edukado, maalamon, buutan, og dinihogan sa maong Espiritu niadtong panahona. Namatikdan n'yo ba kana? Karon, mitungha kini aron pakigbatokan siya, pinaagi sa pagkaalisto nga iya sa kaalam sa Dios diha kaniya. Mao kana ang kapanahonan sa repormasyon, ni Martin Luther, ni John Wesley, ug uban pa. Kita n'yo, mao kana ang repormasyon. Si Zwingli, ug, oh, kinsa pa, si Knox, si Calvin, ug silang tanan, kita n'yo, nga nanggula kaniadto. Pagkamaalamon kadto. Ug karon, matikdi ninyo, eksakto gikan sa mangiub nga kapanahonan, gikan sa repormasyon, niadtong mga panahon, matikdi, kadto mao ang pagkamaalamon sa tawo.

151 Kung puede ablihan sa ninyo ang inyong mga bintana og diyutay! Nagtoo ko nga medyo giigangan na ang mga tawo, oo, siguro, dinha. Kung puede ablihan lang sa ninyo ang mga bintana og diyutay! Tungod, nasayod ko, nga kung ako gani nga nagtindog dinhi nga nagawali, giigangan na, nasayod ko nga kamo usab, dinha.

152 Bueno, himatikdi, kadto mao ang pagkamaalamon sa tawo. Karon, nasabtan ba ninyo?

153 Ang ikatulong mananap nga gipadala ni Satanas, nahimo kining maliputan, usab. Matikdi, “Usa ka litrong trigo sa usa ka denario. Tulo ka litrong cebada sa usa ka denario.” Kita n'yo? Oh, grabe! Kita n'yo? Ang pagpanguwarta nga pamaagi, ang pagkamaliputan, aron maangkon ang bulawan sa kalibutan, ug ang mga bahandi, nga madala ngadto kaniya. Eksaktong matuman gayud kana. Mao kana ang nagpasugod sa pagpabayad para sa mga pag-ampo. Ug para . . . Naghimo-himo sila og usa ka dapit nga gitawag og purgatoryo, ug aron maiampo kono ang ilang mga katigulangan pagawas niana. Ug, oh, kinahanglan gyud ninyong itanyag ang inyong mga titulo ug tanan na, ang inyong katigayonan. Ang iglesia, ug ang estado kaniadto, pareho ra, ug kuhaon mismo sa iglesia ang inyong katigayonan.

154 Ug dili ba ninyo makita, nga ang pipila sa niining mga ebanghelista, niining panahona, aduna gihapon nianang mao ra nga dihog diha kanila? Ginailad ang mga tigulang tawo nga isurender ang ilang mga pensyon, ug ibalhin ang titulo sa ilang mga panimalay ngadto sa unsa mang mga butang. Aba, igsoon, ako—ayaw kong hisgotan pa kana, kita n'yo. Apan karon magpabilin lang ko niini mismo; tan-awon ko balik aron makita kon asa na ako padulong. Karon matikdi, sila nga mga tawo, anaa ra kana kanila. Anaa ra kana kanila. Kana—kana—wala kana'y kahilambigitan ni usa ka butang kanako. Responsibilidad ko lamang Kini dinhi.

155 Karon matikdi, ang—ang Mananap nga mitungha aron makigbatok niini, kaniadto, mao ang tawo. Ug nasayod kitang

tanang nga kini nga Mananap, ang tawo, kini nga gahum sa tawo, tungod sa iyang kaalam, naila niini nga kadatong kosher nga gigunitan ni Martin Luther diha sa iyang kamot, sa dihang nagakatkat siya niadtong hagdanan. . .

¹⁵⁶ Ang ingon nila, “*Kini mao ang Dugo ni Jesus Cristo. Kini mao ang lawas ni Jesus Cristo.*”

¹⁵⁷ Ug gibalibag kadto ni Luther, ug miingon, “Tinapay ra kini ug bino. Dili kini ang lawas ni Cristo; tungod, mikayab na man Siya, ug nagalingkod na sa toong kamot sa Dios, nagapangaliya.” Kita n’yo, kaalam; kita n’yo, ang tawo.

¹⁵⁸ Ug sa dihang miabot na si John Wesley, human nga miabot si Zwingli, ug si Calvin.

¹⁵⁹ Ug miabot na ang iglesia sa punto, sa kasiguradohan, hangtud nga ayaw na nila og dugang pang mga rebaybal. “Kung unsa man ang mahitabo nan mamahitabo.” Kana lang. Ug nagkinabuhi sila og bisan unsa na lang nga matang sa kinabuhi. Nangatuis na og ayo kaniadto ang iglesiang Lutheran, ug ang iglesiang Anglican! Oh, grabe! Ang tibuok nasud nahimo nang imoral, maingon sa kung unsa kini sa karon. Nangatuis og ayo ang mga kaiglesiahan. Sa dihang si King Henry nga—nga VIII, nahimong hari sa England, ug human nga ang madugoon nga si Maria, ug tanang niining mga butanga nangahitabo. Ug, niadtong panahona, ang iglesia puno kaayo og mga paglapas ug pagka-imoral. Daghan ang nanag-angkon og pagka-Cristiano, ug nakigpuyo diay og upat o lima ka mga asawa, o nanagbuhat sa unsa mang butang nga gustohon nila, ug kung unsa na lang ang ginapangbuhat, nga kahugawan.

¹⁶⁰ Si John Wesley, sa iyang pagtuon sa Kasulatan, og pagbantay Niini, napadayag kaniya nga ang Dugo ni Jesus Cristo ang mao’y nagabalaan sa magtotoo. Ug kamo . . . dili angay. . . Dayon unsa ma’y gibuhat niya? Mitungha siya diha sa usa na usab ka repormasyon. Giluwas niya ang kalibutan sa iyang adlaw kaniadto, sama sa gibuhat ni Luther. Kita n’yo? Unsa man kadto? Tawo, gahum sa Mananap, nga mitungha.

¹⁶¹ Gihatagan ang tawo og kaalam, og kahibalo, nga ang maong butang sayup. “Dili kana ang Dugo ni Jesus Cristo. Dili kana ang—ang lawas ni Jesus Cristo. Nagarepresentar ra kana sa lawas.” Kita n’yo?

¹⁶² Kana’y usa gihapon ka dakung lantugi tali sa Katoliko ug Protestante hangtud karon. Kana lang ang butang nga dili sila magkauyon sa karon. Sa tanang uban pa, magkauyon man sila, gawas lang niana; sa niining mga konseho nga aduna sila. Matikdi karon. Apan, ania, apan sila—dili gyud sila magkauyon niana. [Ginadukdok ni Igsoong Branham ang ibabaw sa pulpito sa makatulo ka higayon—Ed.] Kita n’yo?

¹⁶³ Moingon, “Kini ang Dugo, ug” ingon pa, “mao kini ang literal nga Dugo; nga may kagahum ang pari nga usabon kini

nga tinapay ngadto sa literal nga lawas ni Cristo.” Ingon niana ang gamay’ng tabernakulo, sulod sa—sa—sulod sa maong iglesia, kabalo na mo. Mao kana’y hinungdan nga nanaghimo sila og mga ilhanan ug bisan unsa na lang nga matang sa paganong halad samtang nagasulod sila, kabalo na mo, ug ginayukbo ang ilang kaugalingon, ug ginatangtang ang ilang mga kalo, ug uban pa. Dili kana tungod sa bilding; tungod kana nianang kosher nga anaa sa—sa tabernakulo. Ug matikdi kung unsa ka maliputon si Satanas nga napabuhat niya kana!

¹⁶⁴ Apan, kita n’yo, nianang panahona, diha sa kinaiyahan sa tawo, kita n’yo, nagbutang ang Dios og Espiritu sa kaalam diha sa tawo, aron masabtan nga sayup diay kadto. Karon, kana’y para pakigbatokan ang ikatulung mananap, nga mao’y nagpadautan sa iglesia, nga iyang ginasakyan, og pagkamakalilisang niadto. Ang mga repormador, unsa ma’y gipangbuhat nila kaniadto, sila niadtong kapanahonan sa mga repormador? Gidala nila balik ang Iglesia, gikan sa paganong mga seremonya niini sa pagsimba sa diosdios, balik ngadto sa Dios. Kita n’yo? Mao kana’y hinungdan nga mitungha ang Mananap, ang pagkamaalamon sa tawo, aron batokan, ang mangangabayon.

¹⁶⁵ Karon, apan, basaha ninyo karon ang bersekulo 3 ug... o, ang Pinadayag 3:2, sa makadiyut. Karon, gimarkahan ko na kini dinhi para sa usa ka rason. Karon kini, nagaabot na, ang kapanahonan sa Lutheran, diha sa kapanahonan sa mga repormador, Pinadayag 3:2.

¹⁶⁶ Ang gibuhat nila, nanag-organisa sila. Pagkahuman nga nasugdan na ni Luther ang iyang iglesia, giorganisa pud nila kini. Oo, mao gihapon ang gibuhat sa kang Wesley. Mao gihapon ang gibuhat sa Pentecostes, eksakto gayud, giorganisa kini. Ug unsa ma’y gibuhat nila? Gigamit nila ang mao gihapong sistema nga ilang gigikanan. Kita n’yo?

¹⁶⁷ Karon matikdi kining, Pinadayag, nga nagahisgot mahitungod niining iglesiang Sardis. “Ngadto sa manulonda sa iglesia,” mao’y unang bersekulo, siyempre. Kita n’yo? Okey.

Magmatinukawon ka, ug lig-ona ang mga butang nga nanghibilin,

¹⁶⁸ Kana’y, “Ang Pulong nga gikatudlo kanimo,” kita n’yo, “ang mga butang nga nanghibilin.”

...nga haduol na mamatay: . . .

¹⁶⁹ Siya’y andam na mismo kaniadto nga magsugod na pud og usa ka organisasyon sama sa iglesiang Katoliko nga iyang gigikanan. Kita n’yo?

...kay ang imong mga buhat wala ko makita nga hingpit sa atubangan sa akong Dios.

170 Mao kana. Atua ang. . .Atua siya, mismo nga nagabalik pag-usab. Dili ba ninyo makita kon nganong sayup ang mga sistemang pang-organisasyon? Kinsa ma'y nagpasiugda niana? Ang Dios ba? Ang mga apostoles ba? Ang iglesiang Romano Katoliko ang nagpasiugda niana. Karon kung pasagdan lang ang si kinsa mang magsasaysay lahi mismo ang ilang ginasulti. Wala kana dinha. Sila, ginaingon nila nga sila kono ang inahan nga iglesia, ug sila man gayud. Apan giorganisa nila ang maong butang, ug nagbutang og usa ka sistema, nga ang tawo ang pangulo niini. Ug wala kita nagkuha og usa ra ka tawo, sama sa gibuhit nila; nagkuha kita og tibuok konseho sa mga kalalakenan, tigumon sila, ug dayon aduna na mo'y kalibog. Husto kana. Unsa ba'y mahimo sa usa ka konseho, kung ingon-ana?

171 Sama ra kana, nga ginahunahuna nato nga husto ang demokrasya. Nagatoo man ko nga husto kana, usab, apan dili gyud kana makapamuhit og husto. Dili gayud. Tungod nianang pundok sa mga Ricky nga nagadumala niana, unsaon n'yo man kana nga mapahimong husto? Dili mo mahimo. Himatikdi, ang tinuod nga butang mao'y usa ka diosnon nga hari.

172 Matikdi ang Mananap, ang ikatulong Mananap, karon, mao ang pagkamaalamon sa tawo. Ug iyang girepresentar ang mga repormador nga nangabot.

173 Sa pagsimba sa mga diosdios, pananglitan, moingon, "*Kini* mao ang tinapay." [Ginapalalpak ni Igsoong Branham ang iyang mga kamot sa makaupat ka higayon—Ed.] "*Kini* mao ang bino." [Ginapalalpak ni Igsoong Branham ang iyang mga kamot sa makaduha ka higayon.] Kita n'yo, aduna gihapon ang anticristo og usa ka butang nga nagasimbolo sa Cristianismo. Kinahanglan niya, tungod nga siya'y "batok," man kita n'yo. Ug dayon, kung kinahanglan niyang mahimong batok sa usa ka butang. . .

174 Karon, kung moabot man siya kanunay, moingon, "Oh, usa ako ka Buddha." Bueno, wala gyud kana'y unsa man. Silang tanan. Kana'y usa lamang ka pagano, sa sugod pa lang.

175 Apan maliputon ang anticristo. Aduna siya'y tanan na nga matang sa mga butang dinha nga nagarepresentar og Cristianismo. Lamang, gipasimang niya kini paingon sa pikas bahin, butang nga batok sa orihinal nga Doktrina Niini. Kita n'yo, mao kana'y nakapahimo kaniya nga anticristo. Kita n'yo?

176 Busa, ang mga repormador, mitungha ang maong Mananap diha sa porma sa usa—sa usa ka tawo, aron pakigbatokan kadto!

177 Karon, ayaw n'yo kalimti kini, mga igsoon! Ayaw n'yo kalimti kini! [Ginadukdok ni Igsoong Branham ang ibabaw sa pulpito sa makaupat ka higayon—Ed.] Kita n'yo? Timan-i n'yo Kini, sa tanang mga adlaw sa inyong kinabuhi! Kita n'yo? Kini nga mga Mananap husto. Kini'y MAO KINI ANG GINAINGON SA GINOO. Kita n'yo?

Himatikdi, ang pagsimba sa dios-dios ang nagdala og. . .

178 Ang Mananap sa pormang-tawo mitungha pinaagi sa gahum sa Dios, dala ang kaalam nga gihatag sa Dios kaniya, ug gidala ang Iglesia gikan sa pagsimba og dios-dios, balik ngadto sa Dios. Apan sa . . .

179 Hingsayran nato, sa nianang mao gihapon nga kapanahonan sa iglesia, sa dihang nagsugod na silang maghimo og denominasyon, aron buhaton ang mao gihapong butang nga ilang gibuhat sa sinugdan kaniadto, nga gibuhat sa Roma, karon magaanak siya og mga anak nga babaye gikan niana nga iglesia. Ug unsa ma'y iyang ginasulti?

180 Miingon, “Karon nga ikaw . . . Wala Ko ikaw makita nga hingpit. Ug kinahanglan mong lig-onon kanang diyutay'ng kalig-on nga nahibilin kanimo.” Karon paminawa Siya nga ginapasidan-an sila, diha pag-usab sa Pinadayag, 3:3. Atong basahon . . . Bueno, nagtoo ko nga ako na kining nabasa, pipila pa lang ka minutos ang milabay.

Hinumdumi ang imong nadawat ug nadungog, ug tumana kini, ug paghinulsol.

181 Basta, sa laing pagkasulti, “Hinumdumi nga migawas ka gikan sa ingon nianang pagkadautan nga sama niana.” Kita n'yo? Ug tan-awa dinhi.

. . . Kay kon dili ka man ugaling magtukaw, moanha ako kanimo ingon sa kawatan, (uh-huh), ug imong mahibaloan . . . ug dili mo mahibaloan unsang taknaa pagaanhaon ko ikaw.

182 Kung ipadayon n'yo, Iyang pagakuhaon ang kandiliro, kita n'yo. Busa, mao kana. Unsa man kana? Ang Kahayag sa Iglesia.

183 Ug mipaingon siya pabalik ngadto sa mao gihapong sistemang pang-organisasyon sa paganong kangitngit nga iyang gigikanan, ug sa gihapon dinha siya nagapabilin hangtud karong panahona, nga adunay mga tawong anaa sa sulod niini nga matinuuron ang kasingkasing nagadahum nga mao kana ang Kamatuoran, sama ra sa mga Katoliko. Ug ginakataw-an sa mga Protestante ang Katoliko; sa dihang, sila mao man ang unom sa usa ka dosena, o mao ang pikas tunga ngadto sa usa pa ka tunga sa maong dosena, eksakto gayud, sumala sa Pulong. Ang kaalam sa tawo!

184 Karon matikdi. Oh, gusto ko kaayo Kini! Paminawa Siya karon nga ginapasidan-an sila. Karon, karon atong . . . Bug-os ba kamong nagauyon, ang matag usa kaninyo? Karon, kung dili man kamo uyon, pagsulat lang mo kanako og pangutana. Kana, kana nga mga Mananap eksaktong napaila sa matag kapanahonan, sama sa pagpaila sa Biblia kanila dinhi. Eksaktong ingon niana ang gibuhat nila kaniadto. Ginapakita sa kasaysayan kung unsa ang mga gibuhat nila. Gitan-aw nato dinhi mismo ug hingsayran nato kung unsa gayu'y gibuhat nila.

185 Ug dinhi, kini nga mga Mananap, ako—ako—wala ako nahibalo niini kaniadto. Nagalingkod lang ko didto. Nakita ko mismo kini nga nagalihok, sama ra nga nagatan-aw kamo kanako. Kita n'yo? Ug sigurado gyud kini nga husto, tungod ania kini mismo sa Biblia. Busa unsa pa'y ubang butang nga mahimo mo gawas sa pagsulti nga husto kini? Matikdi.

186 Karon, ang ikaupat nga Mananap, nga gipadala aron makigbatok sa anticristo, kining ulahing Mananap. Andam na ba mo? [Nagaingon ang kongregasyon, "Amen."—Ed.] Ang ulahing Mananap nga gipadala, o ang ulahing gahum aron makigbatok sa anticristo nga ginasupak ang Pagtulon-an sa Dios, ang anticristo, mao ang usa ka agila. Kita n'yo? Ang ikaupat nga buhing Binuhat mao ang usa ka agila. Karon, tun-i ninyo ang mga kapanahonan, tun-i ang mga Kasulatan. Mao gyud ang agila! Ug sa Biblia, ang ulahing kapanahonan mao ang kapanahonan sa agila. Ug ginapahisama sa Dios ang agila ngadto sa Iyang mga propeta. Kita n'yo? Kini. . . Karon matikdi. Ang ulahing kapanahonan, ang kapanahonan sa agila, usa—usa ka tigpadayag sa tinuod nga Pulong. Kita n'yo?

187 Sa dili pa molihok ang Dios aron mamuhat, sama sa gibuhay Niya sa mga adlaw ni Noe kaniadto, nagpadala Siya og usa ka agila. Kaniadtong gipahigawas Niya ang Israel, ug ang mga kasundalohan ni Faraon andam na nga mogukod kanila, nagpadala pud Siya og usa ka agila. Sa tanang panahon, nagapadala Siya og usa ka agila sa kaulahian, sa katapusan niini.

188 Ug dinhi nagpadala Siya og usa ka agila, usab. Eksaktong tukma kana sa Pulong. Busa unsaon man nga himoon mo pa kini nga uban pang butang? Nagapadala Siya og usa ka agila, (ngano man?) usa ka tigpadayag sa Kamatuoran nga nagakakunhod sa matag kapanahonan.

189 Busa unsaon man sa—sa laking-baka, o sa—o sa tawo, o sa unsa mang nagaabot nga Mananap, wala gyu'y paagi nga mapadayag kadto gawas kung moabot na ang agila? Aduna sila'y tagsa-tagsa nga katungdanan; sila'y mga iya sa Dios, gipadala nga mga Mananap, sama ra sa uban.

190 Ang leon, siya kadto ang orihinal. Dinha kon diin mitungha ang anticristo sa—sa pagpakigbatok.

191 Dayon nagpatungha siya og usa na usab ka gahum; nagpadala pud ang Dios og usa ka gahum aron pakigbatokan kini.

192 Dayon nagpatungha na pud siya og usa na usab ka gahum; nagpadala pud ang Dios og usa na usab ka gahum aron atubangon kini.

193 Ug dayon sa ulahing gahum, gipadala Niya ang agila, "Aron ipasig-uli ang mga anak balik ngadto sa orihinal nga Pagtoo pag-usab, sa ilang mga amahan." Ang kapanahonan sa agila!

Dayon, matikdi ninyo, wala na'y mga Mananap pa. Mao na kana tanan. Mao na kana ang katapusan. Karon, kung inyong basahon karon ang Pinadayag 10:1, 7. Kanunay akong nagapahinungod niana. Hinumdumi, sa kapanahonan sa kaulahiag mensahero, kita n'yo, unsa ma'y mahitabo? "Ang tanang mga tinago sa Dios igapadayag." Ang agila! Amen!

¹⁹⁴ Karon nakita n'yo ang upat ka mananap nga nangabayo. Kana'y ingon gayud ka eksakto. Nagatoo ba kamo niana? [Nagaingon ang kongregasyon, "Amen."—Ed.] Ug karon ania ang matag kapanahonan, o ang matag gahum nga nangabayo luyo niini. Ug anaa pud ang Kasulatan nga nagapakita kung unsay gibuhatsa mangangabayo sa kaaway. Napadayag kana sa niining Mga Selyo. Ug napadayag usab karon nga ang matag Mananap, ang matag gahum nga gipadala sa Dios, aron pakigbatokan kana, ingon ka hingpit usab nga nangabot, hangtud sa panahon sa agila. Karon, kung mao na kini ang kaulahiag panahon, aduna gyu'y moabot nga usa ka agila, oo, ug para niini. Karon, hinumdumi.

¹⁹⁵ Karon, niadtong mga adlaw nga miabot ang leon, ang orihinal nga Pulong, halos usa ra sa usa ka gatus kanila ang nagpatalinghug sa leon.

¹⁹⁶ Niadtong mga adlaw pud nga miabot ang—ang laking-baka, diyutay ra kanila ang nagpatalinghug sa mensahe sa laking-baka.

¹⁹⁷ Niadtong mga adlaw 'sab nga miabot ang—ang tawo, namuhatsiya taliwala sa mga tawo, nakita n'yo, busa Siya'y maalam gayud. Aduna siya'y napahigawas nga gamay'ng pundok.

¹⁹⁸ Ug unsa ma'y gibuhatsiya nila? Nakita kadto ni Satanas, ug napahibalik niya sila mismo ug gipaminyo sila pasulod niini.

¹⁹⁹ Ug hinumdumi, pagmoabot na sa katapusan ang agila, usa ra sa usa ka gatus sa usa ka porsyento ang magpatalinghug. Ingon niini ang kapanahonan sa agila. Hinumdumi, ang tanan niining uban pang mga mangangabayo... Ug bisan gani si Jesus nagtagna, "Kung dili Niya dalion ang Iyang Pag-abot, walay unsa man nga tawo, wala gayud, ang maluwas alang sa Pagsakgaw"...?... Kasulatan ba kana? [Nagaingon ang kongregasyon, "Amen."—Ed.] Nakita n'yo ba kon asa na kita kung ingon ana, dili ba, igsoong lalaki ug igsoong babaye? ["Amen."] Nakita n'yo ba kon asa na kita?

²⁰⁰ Dios, malipayon kaayo ko, ako—ako—wala ako kahibalo kung unsay buhaton! Apan ako... Dili lang ako ang nagatindog dinhi aron—aron manulti. Ania ako dinhi, usab. Ako, anaa ako sa inyong taliwala. Kita n'yo, ako, ako Kini. Aduna ko'y pamilya. Ug aduna pud ko'y mga igsoong lalaki ug mga igsoong babaye nga akong gihigugma. Ug ang Dios sa Langit, buutan gayud nga mikanaug ug—ug gipadayag kana nga butang, pinaagi

sa Iya Mismong... pinaagi sa mga panan-awon nga dugay nang napamatud-an sulod sa traynta ka tuig, nga mao ang Kamatuoran. Ania na kita dinhi. Kita'y... Miabot na kita. Kana lang. Napamatud-an na Kini sa siyentipikanhong pagtuki. Napamatud-an na Kini sa kapanghimatuoran sa Pulong. Ug ania na gyud kita dinhi! Ug kini nga Kapadayagan nagagikan sa Dios, ug Kamatuoran Kini!

²⁰¹ Aduna ba kamo'y nasabtan? [Nagaingon ang kongregasyon, "Amen."—Ed.] Naghunahuna lang ko kung nakasabot ba gyud mo. Kita n'yo? Oo, sir. Dili ko na siguro kinahanglan pang sultihan kamo kung ingon-ana, karong Dominggo. Matikdi. Matikdi. Pagkamaanindot! Karon, karon, matikdi karon.

²⁰² Ug dayon sumala sa—sa panahon kaniadtong pagaluwason sa Dios ang kalibutan sa wala pa ang paglunop, gipadala Niya ang agila.

Ug niadtong panahon nga pagaluwason Niya ang Israel, nagpadala pud Siya og agila.

²⁰³ Nagatoo ba kamo nga sa panahon, bisan niadtong panahon ni Juan, didto sa Isla sa Patmos, kini nga Mensahe ingon ka hingpit gayud nga dili Niya Kini mahimong isalig ngadto sa usa ka Manulonda? Kabalo na mo, nga ang manulonda usa ka mensahero. Apan nahibalo ba mo nga ang mensahero usa ka propeta? Nagatoo ba kamo niana? [Nagaingon ang kongregasyon, "Amen."—Ed.] Atong pamatud-an kini. Pinadayag 22, tan-awon nato kung usa ba gyud kadto ka agila. Oo. Kita n'yo, siya'y usa ka... Oo, usa siya ka manulonda, siya ang mensahero, apan usa kadto ka propeta ang nagpadayag niining tibuok Basahon sa Pinadayag ngadto kaniya.

²⁰⁴ Pinadayag, sa ika-22 nga kapitulo ug sa ika-19 nga bersekulo, nagatoo ko nga husto kana kung naisulat ko na kana dinhi... 22:19, basin sayup ko. Dili. [Adunay nagaingon, "Kana'y 22:9, man siguro."—Ed.] 22:9, mao gyud kana. Ginatan-aw ko na ang 22:9. Husto kana. Oh, oo, dinhi.

Ug miingon siya kanako, Magmatngon ka nga dili magbuhat niana: kay ako masigkaulipon mo, ug sa imong mga igsoon nga mga propeta,...

²⁰⁵ Matikdi kung unsay nakita ni Juan dinhi.

...ako nga si Juan mao ang nakakita niining mga butanga, ug nakadungog niini.

²⁰⁶ Karon patapos na siya. Mao kini ang ulahi nga kapitulo.

...Ug sa dihang akong... nadungog ug nakita, mihapa ako sa pagsimba sa atubangan sa mga tiil sa manulonda nga nagpakita niining mga butanga, nga nagpakita kanako niining mga butanga.

²⁰⁷ Ug, "siya," kung ingon-ana, "ang manulonda," kita n'yo.

Ug miingon siya kanako, Magmatngon ka nga dili magbuhat niana: . . .

208 Walay tinuod nga propeta ang mahimong simbahon, o unsa man nga matang sa mensahero, kita n'yo. Para lang kana sa Dios.

Ug miingon siya kanako, Magmatngon ka nga dili magbuhat niana: kay ako masigkaulipon mo, ug sa imong mga igsoon nga mga propeta, ug sa mga nagabantay sa mga pulong niining basahona: maoy simbaha ang Dios.

209 Kita n'yo? Karon, mahinungdanon kaayo ang Basahon, ingon nga, Kini mao ang Pulong sa Dios. Karon matikdi. Ug sa dihang igapahayag na ang Pulong sa Dios, Kini'y kinahanglang igapahayag pinaagi sa propeta, tungod kay kaniya man nagaabot ang Pulong sa Dios.

210 Nagapaabot ko nga aduna gyud ko'y madawat nga pangutana mahitungod niana, sa—sa niining kahon dinhi. Nahunahuna ko nga medyo unahan ko na lang sila, dinha, kabalo na mo. Nabati ko man gud nga adunay usa dinha nga sama niana, nga sama gyud niana. Ako—nahunahuna ko nga hisgotan na lang kana, kita n'yo. Kita n'yo?

211 Ang matag Pulong sa Dios ginapahayag. Wala ginausab sa Biblia ang maong sistema, wala gayud, kita n'yo. Mao ra gihapon. Kinahanglan moabot gyud kini ngadto niining magtatan-aw nga ginapaabot natong moabot, karon matikdi, Pinadayag 10:1, 7.

212 Karon basahon nato ang—ang ika-9 nga bersekulo pag-usab. Karon basahon nato . . . atong . . . Karon, sa dili pa nato basahon kana nga bersekulo, aduna sa ko'y gustong ipangutana kaninyo.

213 Nasabtan na ba ninyo, sa bug-os gayud, sa dili pa kita mobiya niining Mga Selyo? Karon hinumdumi, nga wala na'y mga gahum nga motungha human nianang agila, kita n'yo, wala na. Sa matag higayon nga adunay ginapadala ang anticristo, nagapadala pud ang Dios og usa ka gahum. Sa diha nga nagpadala ang anticristo og usa na usab ka gahum; nagpadala 'sab ang Dios og usa ka butang aron batokan kadto. Dayon nagpadala na pud siya og usa na usab ka gahum; nagpadala pud ang Dios og usa ka butang aron pakigbatokan kadto. Kita n'yo? Ug dayon sa dihang miabot Siya nganha sa agila, kana ang Iyang Pulong, nga sama sa kung unsa Kini sa sugod pa lang.

214 Karon matikdi. Dili ba ang propeta nga atong ginapaabot nga moabot, usa man ka tawo nga dinihogan sa—sa Espiritu nga sama ni Elias? Dili kana mismo si Elias, siyempre. Apan usa kana ka tawong, ingon niana, nga magaabot. Ug ang iyang pinaka-ministerio mao'y aron dalhon, aron ipasig-uli, kining nangahisalaag nga mga tawo tungod niining denominasyonghong mga pagtuis, pabalik ngadto sa orihinal nga Pagtoo sa mga

amahan. Karon, kung dili kana nagakatakdo sa Biblia, ako—wala na ko kahibalo kung asa kana nagakatakdo. Ako—ako—wala na ko’y masulti pa mahitungod niana, tungod kay mao na gyud kana. Miabot na kamo. Mao kana ang Kamatuoran. Pagkuhaan n’yo kana og unsa man, nan ginatuis n’yo na kana. Kita n’yo? Busa, kana, kinahanglan ingon niana lang gyud kana.

²¹⁵ Karon matikdi, karon, diha sa ika-9 nga bersekulo, “Mga kalag nga anaa ilalum sa halaran.” Karon, dinhi gyud ako makakuha og pipila ka mga dili-pag-uyon. Apan matikdi lang ninyo sa makadiyut. Ug basta . . . Kita n’yo? Ingon niana ang hunahuna ko kaniadto, usab, apan wala kana miabot sa ingon-nianang paagi. Atong . . . Kanunay kong gidahum nga kining mga kalag nga anaa ilalum sa halaran mao ang—ang—ang mga martir kaniadto sa nahaunang Iglesia. Ug sigurado ko nga, bisan, si Dr. Uriah Smith, ug ang matag usa kanila, nagaingon og ingon niana. Kita n’yo? Apan, ingon-ana pud ang pagdahum ko, mismo. Apan sa dihang gipakita na sa Balaang Espiritu ang panan-awon mahatungod niana, dili diay, dili kadto ang mga kalag.

Karon, karon moingon mo, “Bueno, karon, wala ako mahibalo niana.”

²¹⁶ Bueno, karon, sa makadiyut lang, atong hibalo. Tan-awa. Dili kini mga kalag sa—sa Pangasaw-onong Iglesia, dili gayud. Nagdahum kita nga ang Pangasaw-onong Iglesia kana nga nagahulat didto, mga kalag nga anaa ilalum sa halaran, nakita n’yo, nga nanagtuaw, “Unsa ba ka dugay, Ginoo, unsa pa ba ka dugay?” Basahon ko kini pag-usab karon, aron masabtan gyud nato kini sa husto.

Ug sa pag-abli niya sa ikalimang selyo, nakita ko sa ilalum sa halaran ang mga kalag sa mga gipamatay tungod sa pulong sa Dios, ug tungod sa pagpamatuod nga ilang gihimo:

²¹⁷ Kita n’yo, “Tungod sa Pulong sa Dios, ug tungod sa pagpamatuod nga ilang gihimo.” Karon, ayaw—ayaw sá kamo pagsibog dinha. Sa makadiyut lang, kita n’yo.

Ug sila nanagsinggit . . . Unsa ba ka dugay, . . . Ginoo, unsa ba ka dugay? . . . (kita n’yo?) . . . balaan ug tinuod, ang dili pa nimo . . . paghukom sa mga nagapuyo sa yuta ug pagpanimalus batok kanila tungod sa among dugo?

Ug ang matag usa kanila gihatagan og maputi ug tag-as nga bisti; ug giingnan sila, nga managpahulay una sa diyutay nga panahon, hangtud nga ang laray sa ilang isigkaulipon ug—ug . . . mga kaigsoonan, matuman na nga pagapatyon usab, maingon kanila.

²¹⁸ Karon, kay sila, niining panahona, kung namatikdan ninyo, sa niining Ikalimang Selyo nga giablihan, kita n’yo, gisakgaw

na ang Iglesia. Mao nga dili gyud mahimong, sila mao ang mga kalag nga anaa ilalum sa—ang nahaunang Iglesia.

²¹⁹ Karon, karon, palihog, kung mahimo n'yong hatagan kini og pagtagad karon, tungod usa gyud kini ka dakung kontrober-. . . kontrobersiya, busa gusto ko nga maminaw kamo pag-ayo karon. Ug aduna man kamo'y mga papel, ug mga butang nga masulatan. Karon, gusto kong matikdan ninyo.

²²⁰ Karon, dili mahimo nga sila mao kadtong mga kalag. Tungod kay, ang—ang mga kalag sa—sa mga matarung, nga mga gipamatay, ug ang matarung nga mga tawo, ang Iglesia, ang Pangasaw-onon, human nang gilalin, busa dili sila mamahimong anaa ilalum sa halaran. Atua na sila sa Himaya, uban ang Pangasaw-onon. Karon matikdi. Tungod kay, gilalin na sila diha sa Pagsakgaw, sa ika-4 nga kapitulo sa Pinadayag. Gisakgaw na sila.

²²¹ Karon, kinsa man kini nga mga kalag, kung ingon-ana? Mao kana ang sunod nga butang. Kinsa diay sila, kung ingon-ana, kung dili man sila mao ang nahaunang Iglesia? Kini mao ang Israel nga pagaluwason ingon nga usa ka nasud, tanan silang mga gipili-nang-daan. Ang Israel kana. Kana ang Israel, mismo.

²²² Moingon mo, “Oh, kadali lang.” Moingon mo, “Dili mahimo nga sila.” Oh, oo, kinahanglan man silang luwason.

²²³ Ania, ato kining han-ayon, sa makadiyut lang. Aduna ko'y upat o lima pa ka Kasulatan. Mobasa lang ako og usa. Ablihan nato ang Mga Taga-Roma, sa makadiyut lang, ug hibaloong kung sila ba gayud. Ablihan nato ang Basahon sa Mga Taga-Roma, ug moadto sa—sa ika-11 nga kapitulo sa Mga Taga-Roma, ug atong hibaloong. Igo lang. . . Basahon lang nato kini, ug pagkahuman tun-an nato kini sa atong kaugalingon mismo. Mga Taga-Roma, sa ika-11 nga kapitulo, sa ika-25 ug ika-26 nga bersekulo. Karon paminawa n'yo si Pablo dinhi.

²²⁴ Ug miingon si Pablo, “Kung adunay si kinsa man, bisan usa ka Manulonda, nga magwali og uban pa nga ebanghelyo,” (unsa man?) “pagatunglohon siya.” Himatikdi.

Kay dili ko buot, mga igsoon, nga dili ninyo hisayran ang tinago (uh!), aron dili kamo magpakamakinaadmanon sa inyong kaugalingon (tan-awa); nga nahitabo ang pagkabuta sa Israel, hangtud nga matuman, moabot ang kahupnganan sa mga Gentil.

²²⁵ Hangtud nga makasulod ang kaulahiing Gentil nga Pangasaw-onon, nga alang sa Pangasaw-onon, miabot ang pagkabuta sa Israel para niana nga katuyoan.

Ug mao nga ang tibuok Israel pagaluwason: ingon sa nahisulat na, Magagikan sa Sion ang usa ka Manluluwas, ug pagahinginlan niya ang pagkadilidiosnon tungod ni Jacob:

226 Husto! Karon, sila mao ang Israel, nga anaa sa ilalum nianang halaran. Matikdi. Gibutahan ang Israel alang sa mismong katuyoan nga maluwas kita. Nagatoo ba kamo niana? [Nagaingon ang kongregasyon, “Amen.”—Ed.] Karon, kinsa ma’y nagbuta kanila? Ang Dios. Gibutahan sa Dios ang Kaugalingon Niyang mga anak.

227 Dili ikatingala, nga si Jesus, samtang nagbitay didto sa krus, ug nanagsinggit silang mga Judio para sa Iyang Dugo! Iya Mismo kadtong mga anak. Ug Siya mao ang Kasulatan. Siya mao, Mismo, ang Pulong. Ug ania, Siya nga nasayod mismo nga malipayon gayud Siyang pagadawaton sa maong mga tawo! Mao kana ang hinungdan nga gibutahan sila, aron nga dili nila Siya maila. Miabot Siya sa ingon ka mapainubsanong paagi, ug gibutahan sila niini, aron dili nila madawat kini. Kita n’yo? Miingon ang Kasulatan nga dili gyud nila kini dawaton. Ug gibutahan gyud Niya. Gipangbutahan gayud! Ngani si Jesus naluoy kanila, og ayo, mao nga gisulti Niya, “Amahan, pasayloa sila. Wala sila mahibalo kung unsay ilang ginabuhat.” Kita n’yo? Mga buta sila. Miingon si Pablo nga gibutahan sila tungod sa usa ka katuyoan, alang kanato.

228 Matikdi. Karon gusto kong matikdan ninyo kini pag-ayo. “Gihatagan sila og bisti.” Wala man sila’y ingon niana. Gihatagan sila og bisti, maputi nga bisti, ang matag usa kanila. Karon, ang mga balaan nakaangkon na nianang panahona, aduna na og maong bisti; nga naangkon nila dinhi. Apan, didto, “Gihatagan sila og bisti.” Ug ang mga balaan aduna na og ilahang bisti, ug didto na. Kita n’yo? Kita n’yo? Sila wala—wala pa’y. . .

229 Ang mga Judio, kita n’yo, wala sila’y kahigayonan, tungod kay gibutahan man sila sa Dios, sa kaugalingon nilang Amahan; aron ang grasya sa Dios mamatuman, aron makuha ang Pangasaw-onon gikan sa mga Gentil. Husto ba kana? [Nagaingon ang kongregasyon “Amen.”—Ed.]

230 Tugoti—tugoti kong ipakita kaninyo ang usa ka maanindot nga tipo dinhi ni Joseph; si Joseph, ang Espirituwal nga tawo, ang agila. Gipanganak siya uban ang iyang mga igsoon, sama ra pud sa tinuod nga Iglesia nga gipanganak taliwala sa uban pa. Ug makahubad siya og mga damgo ug makakita og mga panan-awon. Ug gidumtan siya sa tanang uban pa kanila. Apan gihigugma siya sa iyang amahan.

231 Himatikdi, dayon, gipapahawa siya, gipalayas sa iyang mga igsoon, dili sa iyang amahan. Gipapahawa, sa iyang mga igsoon, ug gibaligya sa halos katloan ka buok nga salapi. Gitambog ngadto sa gahong, ug gitooan nga patay na.

232 Gihaw-as siya, ug gipalingkod sa tuong kamot ni Faraon. Ug tungod kay gipalayas man siya sa iyang mga igsoon, kita n’yo, gihatagan siya og usa ka Gentil nga pangasaw-onon, nga dili sa

kaugalingon niyang kabanay. Pinaagi niadto, gipanganak niya si Ephraim ug si Manases, nga gidugang ngadto sa Israel.

²³³ Sa dihang gipanalanginan ni Israel silang duha, nag-krus ang iyang mga kamot, nga dili unta sa kamanghuran kondili ngadto unta sa kamagulangan, mao nga mibalhin ang mga panalangin gikan sa Judio, mipaingon. . . o gikan sa Judio mipaingon sa Gentil. Kita n'yo? Gikrus ang iyang mga kamot, ngadto sa manghud nga bata, nga mao ang manghud nga Iglesia aron kini makasulod. "Ang—ang inahan nga iglesia didto ilalum sa adlaw; gihimugso niya kini nga bata." Ug matikdi, aron makuha kini, gikrus ni Israel ang iyang mga kamot, diha sa tipo. Ug si Joseph. . .

Mao ra nga mga anak, sa usa ka Gentil nga inahan.

²³⁴ Ang pangasaw-onon nga Israel, kaniadto, mitabok, gikan sa karaang Orthodox, paingon sa Cristohanong pamaagi, pinaagi sa Balaang Espiritu nga nagkrus sa mga kamot ni Israel. Ingon niya, "Gikrus sa Dios ang akong mga kamot." Wala siya'y unsa man nga kahilambigitan niadto.

²³⁵ Matikdi. Dayon, si Joseph, nga gisalikway sa kaugalingon niyang mga igsoon, sa kaugalingon niyang kabanay, mikuha og usa ka Gentil nga pangasaw-onon. Ingon ka eksakto mismo sa gibuhat ni Jesus; gisalikway sa mga Judio, ug mikuha og usa ka Gentil nga Pangasaw-onon.

²³⁶ Karon mobasa 'ta og usa ka butang dinhi. Aduna ko'y usa ka Kasulatan nga naisulat, Mga Buhat 15. Ug, oh, medyo kini man ang dapat natong itudlo, unta. Karon, nagatoo ko nga nasulat ko kini nga husto, basahon 'ta ang Mga Buhat 15:14. Oo. Nagalaum ko nga husto kini. Okey. "Nagsugilon si Simon sa paagi nga ang Dios. . ." Dili, magsugod diay 'ta sa ika-13 nga bersekulo.

Ug sa tapus sila mangahilum, mitubag si Santiago, . . .

²³⁷ Karon, nakita n'yo, kung unsay nahitabo kaniadto, miadto sila sa mga Gentil. Kita n'yo? Ug nagpadayon ang panaglantugi, tungod kay mga Judio man sila. Kita n'yo?

Ug sa tapus sila mangahilum, mitubag si Santiago, nga nagaingon, Mga igsoon, patalinghugi ninyo ako:

Si Simon (nga mao si Simon Pedro) nagsugilon sa paagi nga ang Dios miduaw pag-una sa mga Gentil, aron pagakuhaon gikan kanila ang usa ka katawhan alang sa iyang ngalan.

²³⁸ Huh! Kita n'yo, Broy ang apelyido kaniadto sa akong asawa. Sa diha nga ako na siyang gikuha, siya'y usa na ka Branham. Kita n'yo?

²³⁹ Gikuha pud ni Jesus ang Iyang Iglesia, o ang Iyang Pangasaw-onon, gikan sa mga Gentil. Kasulatan kini, nga gitipo, sama sa gibuhat kaniadto ni Joseph.

240 Karon matikdi n'yo kini, ha, kining mga kalag nga anaa ilalum sa halaran. Bueno, ang...kini, "Kining mga kalag," sa nahibaloan nato karon nga, "silang mga anaa ilalum sa halaran," aba sila'y mga gipang-martir kaniadto sa mga makasasalang tawo sama ni Eichmann. Kita n'yo? Padayon silang nanaghulat, minilyon sila, kita n'yo, apan nagpabilin sila ingon nga mga Judio.

241 Karon, hinumdumi. Unsa man kadto? "Gipamatay sila tungod sa Pulong sa Dios," dili tungod sa pagpamatuod mahitungod kang Cristo. Nasabtan ba ninyo kana?

242 Apan, hinumdumi, ang Iglesia gipangpatay, usab, ang mga martir sa Iglesia, tungod sa Pulong sa Dios ug sa pagpamatuod mahitungod kang Jesus Cristo. Pila man ang nasayod niana, dinhi sa...[Nagaingon ang kongregasyon, "Amen."—Ed.] Oo. Okey.

243 Karon, apan kini sila walay pagpamatuod mahitungod kang Jesus Cristo.

...tungod sa Pulong sa Dios, ug tungod sa pagpamatuod nga ilang gihimo:

244 Ang mga Judio! Ug gidumtan sila ni Hitler, ni Eichmann, ni Stalin usab, og sa tanang uban pa sa kalibutan. Kita n'yo? Apan nanagpabilin sila nga matinud-anon sa ilang gitooan. Ug gipamatay nila sila tungod nga sila'y mga Judio.

245 Nahibalo ba kamo nga si Martin Luther adunay ingon-niana nga ideya, usab? Tinuod kini. Miingon siya, "Ang tanang mga Judio kinahanglang papahawaon. Sila'y mga anticristo." Kita n'yo? Apan anaa man gud siya kaniadto ilalum sa laing dispensasyon, ug wala niya nakita kini, wala niya nakita ang Pulong.

246 Karon ang Pulong, ang Kamatuoran, migawas. Unsaon mo man nga padayong butahan ang Israel? Dili mo mahimo kana. Dili.

247 Oh, giunsa man pagbarug sa maong propeta didto, niadtong adlaw, ug miingon, "Sama ikaw sa usa ka bakang ihalas, Israel"? Bisan nga gipaningkamotan nilang ipakita kaniya ang pinakadautan nga bahin niini! Ingon niya, "Aba," ingon siya, "ang si kinsa man nga nagapanalangin kanimo pagapanalanginan, ug ang si kinsa man nga nagatunglo kanimo pagatungluhon." Husto kana. Oh, grabe! Unsaon mo man pagbuhat niana?

248 Usa niadto ka higayon naghunahuna sila nga basin mahikalimot ang Dios, sa dihang nakita sa maong propeta kadtong mangitngit nga butang nga moabotay para sa mga Judio. Mitindog kadto nga tawo, ug ang Pulong sa Dios gibubo kaniya. Ingon niya, "Oh Ginoo, isalikway Mo ba ang Imong katawhan?"

Ingon Siya, “Unsa man kanang anaa sa tupad nimo?”

Ingon niya, “Usa ka pangsukod nga sungkod.”

249 Miingon, “Unsa ka habog ang Langit? Sukda kini.” Uh-huh. “Unsa ka halawom ang dagat?”

Ingon niya, “Dili ko kini masukod.”

250 Miingon Siya, “Ni Ako man, dili ko usab mahikalimtan ang Israel.” Dili, sir. Dili gyud Niya mahikalimtan siya.

251 Ngani kinahanglan Niyang butahan ang Kaugalington Niyang anak. Karon, hunahunaa n’yo kana. Gibutahan ang Kaugalington Niyang anak, aron lang mahatagan kita og kahigayonan, ug ginabalibaran pa nato Kini. Karon, dili ba kana nagapabati og pagkagamay kaayo kaninyo nga mahimo ra ninyong mokamang ilalum sa usa ka konkreto nga bloke nga naka-kalo og pang-cowboy nga kalo, ug dili man lang matandog kana? Kana’y gamay na kaayo, kabalo na mo. Oh, grabe! Oo.

252 “Gikuptan nila ang Pulong sa Dios.” Sila’y mga Judio. Aduna sila og ilang mga balaod; og nagpabilin sila niini. Madumduman ba ninyo ang sa kagabii, karon? Kita n’yo? Nagpabilin sila dinha. Ug sila’y mga Judio, ug adunay sila’y balaod. Ug ang maong balaod mao ang Pulong sa Dios, ug nagpabilin gyud sila mismo niini. Husto kana. “Ug tungod sa pagpamatuod nga ilang gihimo, gipang-martir sila.” Ug ania ang maong mga kalag nga anaa ilalum sa halaran, human nga gisakgaw na ang Iglesia.

253 Karon matikdi. Sila, sa ilang pagkabuta, gipatay nila ang ilang Mesias, ug karon ginaani na nila kini. Naamgo nila kini. Naila nila kini, human nga nahitabo kini. Nakita nila Siya pagkahuman, sa dihang miduol sila atubangan sa halaran sa Dios. Apan karon ang grasya sa Dios para man kanila.

254 Matikdi. Karon, dili sila mamahimo, sa unsa mang paagi, nga mamahimong ang mga balaan, tungod kay ang maong mga balaan nabistihan na man. Apan ania sila karon, nga “mga kalag nga anaa ilalum sa halaran, tungod sa Pulong sa Dios, ug tungod sa pagpamatuod nga ilang gihimo,” ingon nga mga tawo sa Dios, ang mga Judio.

255 Apan karon, matikdi, ang grasya sa Dios nga miabot kanila. Ug gihatagan sila ni Jesus, ang matag usa, og usa ka maputi nga bisti, (oh, grabe, matikdi; nianang panahona, human nga gisakgaw ang Iglesia), tungod kay nagmatinud-anon man sila sa ilang kausa. Ug gibutahan sila, ug wala sila mahibalo niini. Wala gyud sila mahibalo niini. Gibuhat mismo nila sa ingon ka eksakto ang bahin nga gitagana-nang-daan sa Dios para kanila nga pagabuhaton. Ug ania, ania, si Juan nga mitan-aw ug nakita ang maong mga kalag nga anaa ilalum sa halaran. Karon matikdi, nakita niya kadto nga mga kalag. Matikdi kung unsay gitawag niya kanila.

Nanagsinggit sila, “Ginoo, unsa pa ba ka dugay?”

Matikdi, “Diyutay na lamang nga panahon.” Kita n’yo?

²⁵⁶ Hisgotan nato kana, samtang magapadayon kita, dinha mismo sa Kasulatan karon. Naamgo nila nga gipatay diay nila ang ilang Mesias. Kita n’yo? Ug wala sila mahibalo niini, apan pagkahuman niadto nakaamgo sila. Sila—sila gipamatay, usab, aron magbayad alang niadto: sa pagbuhat nila sa maong sayup. Ug karon tan-awa kung unsa nga butang ang nahitabo mismo kanila! Kita n’yo, sila’y sad-an gayud sa pagpatay, busa gipamatay pud sila. Kita n’yo? Nanagsinggit sila, “Ang Iyang Dugo ipapaningil lang kanamo!” Kita n’yo? Husto kana. Ug gibutahan man sila.

²⁵⁷ Karon, unsa kaha kung wala sila nabutahan; miingon ang Dios, “Pasagdi lang sila. Dili man sila takus.” Apan tungod kay gibutahan man sila sa Dios, nan ang Iyang grasya miabot kanila. Amen! Kung hisgotan lang gyud ang kahibulongang grasya! Ug gihatagan ang matag usa kanila og bisti, tungod kay ang tibuok Israel pagaluwason man, ang tanan nga ang ilang ngalan nahisulat na. Husto kana. Gihatagan sila ni Jesus og mga bisti.

²⁵⁸ Sama sa gibuhay ni Joseph ngadto sa iyang mga igsoon; ingon nga usa ka tipo. Tan-awa, sa dihang mitindog si Joseph didto, ug sa katapusan iyang . . . Gipaila na niya ang iyang kaugalingon didto sa may halaran, sa kaugalingon niyang halaran, sa iyang palasyo, og iyang trono. Ingon siya, “Ang tanan bumiya kanako.” Ang iyang asawa atua ra sa palasyo; kon diin maatua usab ang Pangasaw-onon.

²⁵⁹ Ug miingon siya ngadto kanila, ingon niya, “Wala ba mo makaila kanako?” Aba, nagasulti na siya og Hebreohanon niadtong higayona. “Ako mao ang inyong igsoon, si Joseph.” Oh, grabe!

Ingon sila, “Karon, oh, imo na kaming paninglon.”

²⁶⁰ Miingon, “Kadali lang. Kadali lang. Gibuhay kadto sa Dios alang sa usa ka katuyoan. Kinahanglan n’yo akong itambog, aron magluwas og kinabuhi.” Himaya! Ingon niana, ka eksakto. Miingon, “Ayaw, ayaw kamo og kasuko sa inyong kaugalingon.” Mahinumduman ba ninyo nga gisulti kana ni Joseph? Miingon, “Ayaw kamo og kasuko sa inyong kaugalingon. Okey na man ang tanan karon. Human na kini. Gipadala ako sa Dios dinhi, para mauna kaninyo.”

²⁶¹ Kabalo mo, miingon ang Biblia nga moingon sila Kaniya, pagmakita na nila Siya nga miabot, moingon, “Oo, Ikaw mao ang Mesias, nasayod na kami. Apan, apan, unsa man kanang mga ulat?” Kita n’yo?

²⁶² Moingon Siya, “Oh, nakuha Ko kini didto sa balay sa Akong mga higala.” Mga higala?

²⁶³ Ug dayon sa dihang maamgo na nila kadto, sila nga mga nahibilin, ang usa ka gatus kap-atan ug upat ka libo, miingon

ang Biblia nga ilang ihimulag ang ilang mga kaugalingon, ngadto sa tagsatagsa nilang mga balay. Ug mogahin og mga adlaw, aron lamang sa paghilak, ug pagdanguyngoy, ug maglakaw-lakaw; moingon, “Nganong gibuhat man namo kadto? Nganong gibuhat man namo kadto? Aba, gilansang diay namo ang amo mismong Mesias.” Gikaingon, nga managhilak sila sama sa usa ka panimalay tungod sa ilang bugtong anak, “Nganong gibuhat man namo kadto?”

²⁶⁴ Silang mga Judio, sila’y—sila mao ang pinaka relihiyoso nga mga tawo sa kalibutan; pinili sa Dios. Apan Iyang gibutahan sila, aron kuhaon kita, ug gisalikway nato Kini. Mamahimo kining grabe nga paghukom para sa Gentil nga iglesia! Mao kana. Kita n’yo? Gibutahan og tuyo, sa Dios, aron nga makuha Niya kita, ingon nga usa ka Pangasaw-onon para kang Jesus. Kuhaon sila gikan sa . . . Kita n’yo? Ug pasiunang gitipo kini, ug tanan na.

²⁶⁵ Karon nahibaloan n’yo na ba kung kinsa ang maong mga kalag? Dili sila ang gipang-martir nga mga balaan. Human na man silang gisakgaw. Husto kana. Matikdi, sila, sila’y human nang gisakgaw. Kita n’yo?

²⁶⁶ Busa, kini sila gihatagan og mga bisti, ang matag usa kanila. Ug karon gusto kong himatikdan ninyo. Apan karon miabot ang Grasya sa Dios para kanila. Gihatagan ni Jesus ang matag usa kanila og usa ka maputi nga bisti, sama sa gibuhat ni Joseph kaniadto, tungod sa iyang kalooy para sa iyang mga igsoon.

²⁶⁷ Karon matikdi. Bisan gipaningkamotan nilang mawala si Joseph, usab, apan gitunol niya sa gihapon ang iyang grasya ngadto kanila. Kita n’yo? “Oh, okey lang kana. Okey lang kana. Wala man ninyo tuyoa nga buhaton kadto. Apan, kita n’yo, ang Dios kadto mao’y nagbuhat niadto. Kita n’yo? Gitugotan kamong tanan sa Dios nga buhaton ang ingon-niadto aron Iya akong makuha didto, ug dalhon ako dinhi aron maluwas ko ang mga kinabuhi sa mga tawo, kining mga Gentil dinhi, kon diin ko nakuha ang akong asawa. Wala unta ako nakaangkon og asawa kung—kung nagpabilin lang ko didto. Bueno, gihigugma ko ang akong asawa. Gihatagan niya ako niini nga mga anak dinhi.” Ug miingon, “Ako—ako. . . Ug karon—karon mianhi ako aron kuhaon kamong tanan. Karon kamong tanan makaangkon niini nga kahamugaway, usab. Dalhon ko kamo dinhi. Magapuyo na kita nga magkauban, ingon nga usa ka dakung pamilya.” Kita n’yo? Kita n’yo? Kita n’yo? Ingon pa, “Adunay usa ra nga gusto kong ipangutana kaninyo. Buhi pa ba ang tigulang kong amahan?” Oh!

²⁶⁸ Ug matikdi siya, kung unsay gibuhat niya sa manghud nga si Benjamin, nga mao’y tipo sa usa ka gatus kap-atan ug upat ka libo, nga atong hisgotan pagkataud-taud. Kita n’yo kung unsay gibuhat niya? Midagan siya sa gilayon ngadto kang Benjamin, miakbo kaniya ug migakus kaniya. Ang manghud niyang lalaki

nga nahimugso sa ilang pamilya human nga nawala siya, kita n'yo; sa iyang inahan, ang unang iglesia, ang Orthodox nga iglesia. Nahimugso ang usa ka gatus kap-atan ug upat ka libo sa dihang wala Siya, samtang didto Siya sa halayo aron kuhaon ang Iyang Gentil nga Pangasaw-onon. Oh, grabe! Dili ba kana nakapadasig kaninyo! Mao kana. Busa nakita n'yo na kung kinsa sila? Mao kana sila.

²⁶⁹ Matikdi karon, bisan pa gipaningkamotan nila nga mawala si Joseph, pero miabot gihapon ang iyang grasya ngadto kanila.

²⁷⁰ Bisan pa gipaningkamotan pud nila nga mawala si Jesus, mibalik Siya sa gihapon, tungod mga buta man sila, ug gihatagan Niya sila, ang matag usa kanila, og usa ka maputi nga bisti. Pagadalhon Niya sila mismo, pauli, bisan pa man. Wala kana'y mahimo bisan gamay'ng kalahian, tungod gisulti na man Niya nga, "Pagaluwason Ko silang tanan, bisan pa man." Kita n'yo?

Karon bersekulo 10. Himatikdi, mihangyo sila og "pagpanimalus." Kita n'yo?

²⁷¹ Karon, kung sila pa unta ang Pangasaw-onon, nahimo unta kadtong sama kang Esteban: "Amahan, pasayloa sila," kabalo na mo. Kita n'yo?

²⁷² Apan mga Judio kini nga bag-ohay pa lang nakasulod, kita n'yo. Mihangyo sila og pagpanimalus. Matikdi pag-usab, kita n'yo, miingon Siya pag-usab... Matikdi, dili kini... Miingon Siya, "Kini'y ang imong mga igsoon," ang mga Judio. Ang usa ka gatus... Karon gusto nila og pagpanimalus. Miingon sila, "Oh, among... Kami, gusto namong ipanimalus Mo kami didto."

²⁷³ Miingon Siya, "Diyutay na lamang nga panahon, karon, diyutay na lamang nga panahon." Tungod, himatikdi, basahon ko kini dinhi. Anaa kini sa—sa ika-10 nga bersekulo. Sige.

Ug sila nanagsinggit sa makusog nga tingog, nga nanag-ingon, Unsa ba ka dugay, Oh Ginoo, balaan ug tinuod, ang dili pa nimo paghukom sa mga nagapuyo sa yuta ug pagpanimalus batok kanila tungod sa among dugo?

Ug ang matag usa kanila gihatagan og maputi nga bisti; ug giingnan sila, nga managpahulay una... sa diyutay nga panahon, kita n'yo, (unsa?) sa diyutay nga panahon, hangtud nga ang laray sa ilang isigkaulipon...

²⁷⁴ Kita n'yo? Karon unsa man kini? Ang mga propeta nianang tungora magawali na ngadto sa Israel. Kita n'yo?

...hangtud nga ang laray sa imong isigkaulipon... ang laray sa imong isigkaulipon ug usab ang imong mga kaigsoonan, nga pagapatyon...

275 Kita n'yo, ang mga gitagana-nang-daan nga pagabuhatan og ingon-ana. Nakita n'yo?

...matuman na nga pagapatyon usab, maingon kanila.

276 Kita n'yo, sa laing pagkasulti, kana'y gitagana-nang-daan para kanila. Kana'y sumala sa Kasulatan, nga kinahanglan nilang agian kana. "Ug managpahulay una kamo sa hamubo nga panahon. Karon aduna na kamo'y mga bisti; manguli na kamo; ug lingkod lang sa dinha sa hamubo nga panahon, kita n'yo, paghulat una sa makadiyut."

277 Karon matikdi. Karon matikdi, "Ang imong mga kaigsoonan." "Ang imong mga kaigsoonan pagapatyon pa lang," nagapahinungod kana ngadto sa usa ka gatus kap-atan ug upat ka libo nga pagatawgon sa panahon sa Kasakitan. Ang maong usa ka gatus kap-atan ug upat ka libo nga mga tinawag.

278 Unta aduna pa kita'y oras. Tingali'g mahisgotan pa nato kini ugma sa gabii, kon itugot sa Ginoo, kita . . . sa dili pa kita moadto sa usa na usab ka Selyo. Kita n'yo?

279 Usab, karon matikdi, nga kinahanglan silang paga-martiron sa anticristo. Bag-o lang natong nahisgotan; ug namatikdan, nga diha sa iyang ulahing pagpangabay, kon diin wala niya gituman—wala gituman ang iyang pakigsaad sa mga Judio didto. Ug mao kana. Kita n'yo?

280 Kini nga mga Judio, kining usa ka gatus kap-atan ug upat ka libo, pagatawgon sa duha ka mga saksi diha sa Pinadayag 11. Karon, timan-i ninyo, silang duha magapropesiya.

281 Nabasa na ninyo kana. Pila man ang nakabasa na niana? [Nagaingon ang kongregasyon, "Amen."—Ed.] Oo, nasayod na kitang tanan, pinaagi sa pagbasa sa Kasulatan.

282 Ug magapropesiya sila, kining duha ka mga saksi, sa panahon sa ikaduhang katunga nga bahin sa setenta ka semana ni Daniel. Kanang ulahing tulo ug tunga ka tuig.

283 Mahinumduman n'yo ba kung giunsa nato pagtuon ang setenta ka semana ni Daniel? Gikaingon ko na nga kinahanglanon nato kana pagmodangat na kita dinhi. Wala ko kahibalo kon ngano, ako lang. . . Adunay misulti kanako nga kinahanglanon nato kana, ug ania na kita. Oo. Kita n'yo?

284 Himatikdi, sa panahon ni Daniel. Karon hinumdumi, gisultihan si Daniel nga, "Ang Mesias moabot," ang principe, "ang Mesias," diay, "ug magapropesiya Siya. Ang Israel aduna pa'y setenta ka semana nga nahibilin. Ug sa tunga-tunga sa setenta ka semana, pagapatyon ang Mesias, ug pagawagtangon ang adlaw-adlaw nga paghalad." Husto ba kana? [Nagaingon ang kongregasyon, "Amen."—Ed.] "Apan aduna pa gihapon og tulo ug tunga, ka semana nga gigahin.

Sa niana nga panahon, gikuha na Niya ang Gentil nga Pangasaw-onon.

²⁸⁵ Bueno, mikayab na Siya. Ug pagmikayab na Siya, motungha pud ang duha ka propeta ngadto sa Israel. Kita n'yo?

²⁸⁶ Ug kadtong mga kalag nga gipang-martir, niadtong panahona, didto, matuod, og tinuod nga mga Judio; nga ang ilang ngalan nahisulat na sa Basahon, nga nagkinabuhi og matarang nga kinabuhi ug nanagbuhat og husto, bug-os gayud nga gikinabuhi ang Judaismo. Sila, gipang-martir sila ni Eichmann ug daghang uban pa. Matinud-anon nga mga tawo, minilyon kanila kaniadto! Ug silang mga German gipangpusil sila hangtud nga mamatay, ug gipangpuo sila, ug gipamatay sila, ug gipangbitay sila ibabaw sa mga paril, ug gipangsunog sila, ug gipangsunog ang ilang patay'ng lawas, ug tanan nang uban pa. Niadtong walay-kalooy, o mamumuno'g mga kasingkasing, ni Hitler, ug ni Stalin, ug ni Mussolini, ug silang tanang mga tawo nga nanagdumot sa mga Judio!

²⁸⁷ Siguro kini ang usa sa—usa sa mga butang nga padayong nagapalig-on niini nga nasud, tungod kay dugay na nilang ginatahud ang mga Judio, husto kana, og gihatagan siya og bahin. Tahura n'yo ang Judio, ug pagapasidunggan pud kamo sa Dios.

²⁸⁸ Karon, aduna usab og pundok sa mga mga Judio nga mga tampalasan, sama ra nga aduna usab ang mga Gentil og mga tampalasan.

²⁸⁹ Apan ang tinuod nga Judio, gisulat na sa Dios ang iyang ngalan sa Basahon sa wala pa ang pagkatukod sa kalibutan. Ug atua siya, nga gipatay niadtong panahona. Ug hinumdumi, hunahunaa kini karon, kung unsa ka hingpit kini. Pagkahuman nga gipamatay kadtong minilyon nga mga Judio, inosente nga mga tawo, sa mga kanasuran sa kalibutan; ania ang Kasulatan nga nagaingon, mismo niining panahona, nga ang matag usa kanila anaa ilalum sa halaran, hingsayran nila kung unsay nahitabo, ug gihatagan sila og maputi nga bisti.

²⁹⁰ Ug miingon sila, “Bueno, ngano man? Mahimo na ba kaming mobalik sa gingharian karon mismo?” Ang gingharian sa Judio pagatukoron sa yuta, kabalo na mo. Miingon si Juan nga didto ang gingharian, kita n'yo, pagatukoron.

Karon, kini sa karon ang Gingharian sa Ebanghelyo, nakita n'yo.

²⁹¹ Apan ang gingharian sa mga Judio igawali niining—niining duha ka propeta, busa matikdi ang—ang—ang maong gingharian dinhi sa yuta.

²⁹² “Ang Gingharian sa Langit giwali na,” . . . sa mga Judio, o ngadto sa . . . ang buut kong ipasabot, “ngadto sa Gentil.”

293 Ang gingharian dinhi sa yuta, pagatukoron sa Milenyum, pagkahuman, sa Milenyum ngadto sa mga Judio.

294 Karon matikdi. Matikdi kini karon, dinhi, samtang sila—samtang nagawali sila, kita n'yo.

295 Sa dili pa motungha kining—kining mga propeta; kining mga Judio nga kinahanglang mamatay ilalum ni Eichmann ug uban pa, ang matag usa kanila nga gitagana-nang-daan, gihatagan (pinaagi sa grasya) og usa ka maputi nga bisti. Ang matag usa kanila gihatagan og maputi nga bisti. Himatikdi.

Karon unsa ma'y nahitabo? Sa diha nga nahitabo kana . . .

296 Ginatan-aw ko kanang orasan dinha, ug kabalo ko nga kita'y—kita'y nagabhian na gyud. Apan dili ko gustong . . . Kita n'yo, ako—ako . . . Sila . . . makita silang luoy nga mga kaissoonan nga nagatindog lang dinha. Tabangan unta kamo sa Dios, mga igsoon. Nagalaum ko nga ang matag usa kaninyo mahatagan pud og maputi nga bisti nianang adlaw, kita n'yo. Nagatindog kamo, og nagabalhin-balhin, tungod nanakit na ang mga bitiis. Ug ang uban kaninyo nagtrabaho pa tibuok adlaw. Nasayod ko kung unsa kana. Ug tan-awa dinhi . . . Ug adunay pipila ka luoy'ng tigulang na nga mga babaye nga nanagtindog ra. Akong namatikdan ang pipila niining mga kalalaken-an nga gihatag ngadto sa mga kababayen-an ang ilang mga lingkoranan; ug adunay naghatag pud, ngadto sa usa ka luoy'ng inahan nga adunay bata. Ug ako—ako—ako—nakita ko kanang tanan, kita n'yo, ug sigurado ko nga nakita Niya usab. Matikdi. Apan dili ko gusto nga langanon mo pag-ayo. Kung mahimo ko lang unta nga masabtan n'yo dayon ang Mensahe, kana lang ang gusto kong buhaton ninyo, kita n'yo.

297 Karon matikdi kining mga Judio. Kinahanglan kong buhaton kini, aron maipakita kaninyo ang kapadayagan niini nga Selyo; og makita n'yo kung unsa kini, kining mga kalag nga anaa ilalum sa halaran, ug kung kinsa sila. Karon matikdi.

298 Sa panahon ni Daniel, kaniadto, sa ikaduhang bahin sa ika-setenta ka semana. Karon hinumdumi, “Ang Mesias pagapatyon sa tunga-tunga.” Mao kana ang sa tunga-tunga. Bueno, unsa ma'y tunga sa pito? [Nagaingon ang kongregasyon, “Tulo ug tunga.”—Ed.] Tulo ug tunga. Unsa man ka dugay nagwali si Cristo kaniadto? [“Tulo ug tunga.”] Husto kana. Karon, “Apan aduna pa'y gigahin, alang sa mga tawo,” (unsa man?) “usa pa ka tulo ug tunga ka tuig.”

299 Bueno, nianang panahona, aba, kita n'yo, ang mahitabo, maoy, pilion ang Gentil nga Pangasaw-onon diha sa pito ka mga kapanahonan sa iglesia, ug pagasagawon na.

300 Ug pagmahitabo na kana, ang tanan niining mga Judio nga gipang-martir kaniadto tungod sa pagkabuta, nga anaa ilalum sa halaran, moanha ang Dios ug moingon, “Nakita ninyo kung unsa kana? Karon hatagan Ko ang matag usa kaninyo og bisti.”

Ingon sila, “Unsa pa ba ka dugay, Ginoo? Ug mosulod na ba kami karon?”

301 Ang ingon, “Dili, dili, dili, dili. Ang inyong isigkalungsoranon, ang mga Judio, kinahanglan pang mag-antus og diyutay, ’una. Kinahanglan silang paga-martiron usab sama kaninyo nga gipang-martir. Kinahanglan nga patyon sila sa mananap sa dihang lapason na niya ang iyang pagpakigsaad.”

302 Karon matikdi. Ug karon matikdi, pag . . . Karon hinumdumi lang, nga magapropesiya kini nga mga propeta sumala sa Pinadayag 11. Inyong, gipataas ninyo ang inyong mga kamot, kamong mga nakabasa na niini. Kita n’yo? Ug gihatagan sila og gahum.

303 Ug atong hibaloong kung kinsa sila, sa makadiyut lang, kon itugot sa Ginoo. Karon matikdi kung kinsa kini nga mga propeta. Ug karon ginaingon kini sa Biblia dinhi. Oo, ginaingon Niya. Sigurado gayud! Kita n’yo?

304 Karon, matikdi, sa tunga-tunga niining, tulo ug tunga ka semana ha, nga magpropesiya sila dinhi ug miingon ang—ang Pinadayag dinhi . . . Ug sila—magpropesiya sila sulod sa usa ka libo ug tulo ka gatus ug kap-atan ka adlaw. Kung . . .

305 Karon, ang regular nga kalendaryo sa Judio, ang regular nga oras sa kalendaryo sa Dios, eksaktong traynta ka adlaw sa usa ka bulan. Ang Romanong kalendaryo, lang ang nagpalibog niini. Sa regular nga kalendaryo traynta ka adlaw ra sa usa ka bulan.

306 Karon, kung gusto ninyong gamiton ang traynta ka adlaw, ug kung kalkulahan mo ang tulo ug tunga ka tuig niini, ug makita n’yo nga kung gamit ang traynta ka adlaw, ug, bueno, unsa ma’y makuha ninyo? Usa ka libo ug tulo ka gatus ug . . . o duha ka gatus ug kan-uman ka adlaw. “Usa ka libo ug duha ka gatus ug kan-uman ka adlaw (saysenta ka adlaw),” eksaktong tulo ug tunga ka tuig.

307 Karon, nakita n’yo, wala gyu’y sayup niana. Mao kana, nga sibo gayud sama sa usa—usa ka pagtakdo. Matikdi, nga magwali kining duha ka propeta sulod sa tulo ug tunga ka tuig, ngadto sa mga Judio. Dinha na, tawgon pagawas, ang usa ka gatus kap-atan ug upat ka libo.

308 Ug dayon, matikdi, nga kining duha ka propeta eksaktong si Moises ug si Elias gayud. Kita n’yo? Kita n’yo? Karon tan-awa, tan-awa, ang ilang . . . Tan-awa ang ilang ministerio. Karon matikdi kung unsay buhaton niini nga mga propeta. “Sila may kagahum sa pagkastigo sa yuta pinaagi og hampak, bisan makapila sumala sa ilang gusto.” Kinsa ma’y nagbuhat niana kaniadto? Si Moises. “Sila may kagahum sa pagsira sa kalangitan, ug aron dili mag-ulan sa adlaw sa ilang ministerio.” Kinsa ma’y nagsira sa kalangitan sulod sa tulo ug tunga ka tuig? [Nagaingon ang kongregasyon, “Si Elias.”—Ed.] Sila kana. Sila gyud. Kita n’yo, kini’y . . .

309 Kita n'yo, ang tawo, pag namatay siya, wala niya ginausab ang iyang kahimtang. Wala niya ginausab ang iyang kinaiyahan, kita n'yo. Tan-awa, sa dihang—sa dihang, sa dili pa . . .

310 Sa dihang nag-backslide si Saul, ug walay mga propeta sa yuta kaniadto, wala siya mahibalo kung unsay buhaton—kung unsay iyang buhaton. Kinahanglan na niyang atubangon kadto. Paingon na siya niadto sa pagpakiggubat. Mao nga miadto siya sa espiritista sa Endor.

311 Karon, tungod nga kon dugo pa lang kadto sa mga toro ug mga kanding, mahimo pa kadto sa maong espiritista. Ug gitawag niya ang espiritu ni Samuel.

312 Ug sa dihang nagpakita na si Samuel, atua siya nagtindog, nga sul-ob mismo ang iyang pang-propeta nga bisti. Dili lang kana, kondili siya'y usa gihapon ka propeta. Miingon, “Nganong gitawag mo man ako gikan sa akong pagpahulay,” kita n'yo, ingon siya, “ingon nga ikaw nahimo nang usa ka kaaway sa Dios?” Miingon siya, “Niining mao ra nga oras, ugma sa gabii, mapukan ka sa gubat. Ug sa mao gihapong oras, ugma sa gabii, ikaw mahiuban na kanako.” Ug eksaktong ingon niana ang nahitabo. Kita n'yo? Dili lang. . . Siya'y usa gihapon ka propeta. Kita n'yo?

313 Ug kini nga mga lalaki mamahimong mga propeta sa gihapon. Karon medyo lawuman pa nato kana, sa pipila ka minuto, kon itugot sa Ginoo. Kita n'yo?

314 Oh, grabe, daw sa unsa ko gihigugma ang Pulong! Dili ikatingala nga, “Ang tawo dili mabuhi sa tinapay lamang. Kondili sa matag Pulong nga nagagula sa baba sa Dios!”

315 Kini nga mga propeta mao si Moises ug si Elias, sumala sa ilang mga buhat nga ginabuhat pag-usab. Kana, ingon na niana kaniadto pa ang ilang ministerio. Karon matikdi, sama sa gibuhat nila kaniadto. Wala kana nagpausab kanila. Hinumdumi, nga kini nga mga lalaki wala namatay. Matikdi sa makadiyut lang . . .

316 Karon, ayaw mo pagkalibog, sa dili pa kita mobiya gikan niini. Ayaw pagkalibog sa ikalimang-higayon nga ministerio ni Elias diha sa iyang ikaupat-nga-higayon nga ministerio. Dugay ko nang ginaingon kaninyo, nga ang Gentil nga Iglesia nagahulat para kang Elias. Oo.

317 Ug ania siya nga kauban ang mga Judio. Hinumdumi, dili siya puedeng moabot sa upat lamang ka higayon; kana'y—numero kana sa kaaway. Kinahanglan niyang moabot sa lima ka higayon.

318 Sa unang higayon nga miabot siya, siya mao si Elias, mismo. Sa sunod higayon nga miabot siya, siya mao na si Eliseo. Sa sunod higayon na pud nga miabot siya, siya'y (unsa man?) si Juan Bautista. Sa sunod higayon nga moabot siya, mao'y alang na sa

ikapitong manulonda. Ug sa ikalimang higayon nga moabot siya, kauban siya ni Moises didto, nga magawali sa mga Judio. Oo. Oo, sir. Ayaw mo pagkalibog kaniya, Uh-huh.

³¹⁹ Ang lima, kung nasayod kamo sa inyong—inyong mga numero sa Biblia, ang lima mao’y numero sa grasya nga nagahago. Ug ingon niana ang gibuhat sa Dios. Karon, matikdi, kon gusto ninyong mahibaloan kung asa kini. Si Jesus ba usa ka grasya sa paghago? J-e-s-u-s, lima, l-a-b-o-r [p-a-g-h-a-g-o—Trans.]. Husto ba kana? Paghago, tungod—tungod sa gugma alang kaninyo. Ug kung moduol ka Kaniya, unsaon man nimo pagduol, pinaagi sa unsa? F-a-i-t-h [p-a-g-t-o-o] sa l-a-b-o-r [p-a-g-h-a-g-o]. Husto ba kana? Ang paghago mao’y numero sa grasya, oo, para sa mga magtotoo.

³²⁰ Matikdi, ang unang Elias, mao kadto si Elias mismo. Ang ikaduha mao si Eliseo. Ang ikatulo mao si Juan. Ang ikaupat mao ang ikapitong manulonda, o ang kaulahiag mensahero sa Iglesia, sumala sa Malaquias 4 ug Pinadayag 10:7. Karon, sa ikalimang higayon, siya’y usa ka mensahero ngadto sa mga Judio, sa usa ka gatus kap-atan ug upat ka libo, nga mga Judio, human nga gisagaw na ang Iglesia.

³²¹ Ako—ako—mibati ako og medyo talagsaon, kita n’yo. Kita n’yo? Tan-awa, kung ang uban nagahunahuna . . . gusto kong masabtan ninyo kini karon, kita n’yo. Kung ang uban nagahunahuna gihapon nga si Malaquias 4, “ang magpasig-uli” sa mga tawo, mao ra gihapon ang pagabuhaton niya didto para sa mga Judio, ug ang hunahunaon nga managsama ra kini, gusto kong klarohon kini para kaninyo, sa makadiyut. Kita n’yo, mahimo man gud kana nga medyo makalibog. Tungod, hinumdumi ninyo, nga sa Malaquais 4, ginaingon, “Ipasig-uli ang Pagtoo sa mga amahan . . . o sa mga anak balik ngadto sa amahan.” Kita n’yo, pabalik ngadto sa amahan!

³²² Karon ipakita ko kaninyo ang kalahian sa maong ministerio. Kung moabot siya aron ipasig-uli ang Pagtoo sa mga anak balik ngadto sa mga amahan, nan igalimod niya si Cristo. Kung ingon-ana nagabalik siya sa kasugoan. Husto ba kana? Ang kasugoan man gud ang gisunod sa mga amahan. Nasabtan n’yo ba kini? [Nagaingon ang kongregasyon, “Amen”—Ed.]

³²³ Matikdi, si Elias, sa dihang miabot siya aron tumanon ang iyang ministerio sa Malaquias 4, kita n’yo, sumala sa Malaquias 4, nag-inusara lamang si Elias.

³²⁴ Apan sa diha nga moabot siya aron mag-alagad ngadto sa mga Judio, sumala sa Pinadayag 11, kauban na niya si Moises. [Ginapalalpak ni Igsoong Branham ang iyang mga kamot sa makaduha ka higayon—Ed.] Busa, wala gayu’y kalibog, wala bisan gamay. Kita n’yo? Nasabtan n’yo ba kini? [Nagaingon ang kongregasyon, “Amen.”]

³²⁵ Sa dihang moabot si Eliseo, sumala sa Malaquias 4, siya’y mag-inusara lamang. Si Elias ra ang moabot; dili nga si Elias ug si Moises. “Si Elias” ang motungha. Apan ang mao rang dihog, nga, gikaingon na nga moabot si Elias para sa ulahing bahin sa kapanahonan sa iglesia, “aron ipasig-uli ang Pagtoo sa mga anak balik ngadto sa orihinal nga Pagtoo sa mga amahan,” ang apostolikanhong Pagtoo, nga dinha mo kinahanglan mobalik. Ug gipasimang ra man gud sila sa anticristo kaniadto. “Aron ipasig-uli,” maingon nga ang tanang uban pa nga bahin sa Kasulatan nagakatakdo. Kita n’yo, moabot siya nga siya ra. Kita n’yo?

³²⁶ Apan sa diha nga moabot siya sa Iglesia, ang Biblia...o pagmoabot siya ngadto sa usa ka gatus kap-atan ug upat ka libo, klaro nga ginaingon sa Biblia nga siya...Adunay duha kanila, dili nga usa ra kanila. Duha mismo sila! Ug dili mahimo nga ipasig-uli sa iyang ministerio ang mga Judio pabalik ngadto sa kasugoan, og mahimong siya’y...tungod pagmoabot siya, igawali niya si Cristo ngadto sa usa ka gatus kap-atan ug upat ka libo, amen, “Mao kana Siya, kanang Mesias nga gipatay kaniadto.” Amen! Mao kana, busa ayaw kamo pagkalibog niini. Dili man kini kalibogan. Wala nagapamakak ang Kasulatan, wala gyud bisan gamay.

³²⁷ Himaya! Oh, pagkakita ko niana, naglukso-lukso gayud ako! Ingon ko, “Salamat Kanimo, Ginoo,” sa dihang makita ko kana nga nagakahitabo kaniadto. Nga makita kanang Elias nga miadto didto alang niadtong unang kapanahonan, nga siya ra, ug siya’y nag-inusara lamang. Dayon ang makita siya nga nagaabot na usab, didto sa lahi na nga lugar, og duha na sila pagmahitabo na kana. Miingon ko, “Mao kana. Kana, mao gyud kana, Ginoo. Amen! Nakita ko na karon! Alleluyah!” Eksakto gayud.

³²⁸ Kung wala ko pa gisulti kini, mamahimo unta kini nga diyutay’ng kalibog para kang kinsa man. Apan Siya—gisultihan Niya ako nga isulti kini, busa gisulti ko.

³²⁹ Himatikdi, kini nga mga lalaki gipapabiling buhi sa Dios, gikan sa ilang orihinal nga ministerio, alang sa umalabot nga buluhaton; ug gibuhat nila mismo kini og ayo. Kita n’yo? Hunahunaa lang, kanang espiritu ni Elias nangalagad mismo sa makalima ka higayon; si Moises, kaduha. Unsa? Gipabilin nga buhi alang sa dugang, dugang pa nga buluhaton.

³³⁰ Ang usa kono kanila namatay na kaniadto; ayaw ninyo toohi kana. Pareho silang nakita, nga buhi, og nagpakig-estorya kang Jesus didto sa Bukid sa Pagkabalhin. Apan, hinumdumi, nga kinahanglan pud nilang mamatay.

³³¹ Karon, karon, sa tinuod lang namatay na man si Moises. Apan nabanhaw siya, tungod usa man siya ka hingpit nga tipo ni Cristo. Kita n’yo? Walay si kinsa man ang nasayod kon asa siya gilubong. Miabot ang mga Manulonda og gikuha siya. Kita n’yo? Aduna siya’y mga Manulonda nga tigdala. Uh-huh. Ngano

man? Walay mortal ang makahimo sa pagdala kaniya kon asa siya paingon. Mitaliwan siya pinaagi lamang sa usa ka buhat, kana lang. Aduna siya'y mga Manulonda, ingon nga mga tigdala, kita n'yo, tungod gidala man Nila siya sa kon asa siya dapat mahiadto. Lugar nga walay si kinsa man ang nahibalo.

³³² Bisan si Satanas, wala gani nakahibalo. Nakiglantugi pa siya sa Arkanghel. Husto kana. Wala man gud niya mahisabti kung unsay nahitabo kang Moises. “Nakita ko man gud siya nga nagakurog didto. Ug naglantaw siya didto sa maong kayutaan, ug gilantaw usab ang mga anak, ug uban pa, nakita ko siya nga nagakurog. Apan mipatong siya sa Bato, ug mao na kadto ang ulahing higayon nga nakita ko siya.”

³³³ Mao kana ang Bato! Mao kana ang Bato! Tugoti akong mobarug ibabaw niana nga Bato, sa katapusan sa akong panaw! Oo, sir! Karon, ang. . . Nagatambong ang itum kong mga kaigsoonan kaniadto dinhi ug mokanta sila og usa ka hamubong awit, “Kung mahimo ko, mobarug gyud ko ibabaw nianang Bato kon diin mibarug si Moises.” Oo, sir! Oh, mao kana ang Bato nga gusto kong barugan, usab. Pinaagi sa pagtoo mobarug ako dinha.

³³⁴ Apan timan-i, nga si Elias, siya'y gikapoy mismo, tungod aduna pa siya'y daghang buluhaton sa unahan niya. [Mihunong una si Igsoong Branham. Nangatawa ang kongregasyon—Ed.] Tungod hago na man kaayo siya, mao nga gipadalhan na lang siya sa Dios og usa ka sakyanan Pauli, husto kana, gipadalhan og usa ka carro. Husto ba kana? [“Amen.”] Gidala siya paitaas. Wala gayud siya namatay, tungod kay gipapabilin man siya sa Dios nga buhi. Siya aduna ma'y usa ka umalabot nga buluhaton para kaniya. Magadihog pa siya og usa ka tawo, usab, kita n'yo, nga motungha pinaagi sa iyang Espiritu.

³³⁵ Apan kinahanglan pud nilang masinati ang kamatayon. Karon Pinadayag, sa ika-11 nga kapitulo. Karon, buksan nato, og ania na nabuksan ko na. Ato mismo kining basahon, Pinadayag 11. Matikdi ug tan-awa kung dili ba sila pareho nga namatay. Oo, sir. Kinahanglan nilang duha nga masinati ang kamatayon. Oo, sir. Pagkahuman sa ilang ministerio, masinati nila ang kamatayon. Pinadayag 11, ug sugdan nato sa 7.

Ug sa dihang sila...nahuman na sila sa ilang pagpamatuod, ang mapintas nga mananap nga mogula gikan sa kahiladman nga walay kinutoban... makiggubat batok kanila, . . .

³³⁶ Oh, grabe, dili man gud niya mapahanugotan kana; nga mibalik sila nga mga holy-holler pag-usab, kita n'yo. Oo. Sige.

. . .gikan sa kahiladman nga walay kinutoban... makiggubat batok kanila, ug modaug kanila, ug magapatay kanila.

337 Apan matikdi kung unsay mahitabo. Eksakto sila karon nga gitipo dinhi.

Ug ang ilang mga patay'ng lawas managhay-ad sa dalan—sa dalan nianang dakung siyudad, . . . sa espirituhanon . . . gitawag nga Sodoma ug Egipto, diin didto usab gilansang ang atong Ginoo, (Jerusalem, kita n'yo).

338 Karon kinahanglan nilang masinati ang kamatayon, (dili ba?) husto kana, human nga matapos na ang ilang ministerio.

339 Ngano man? Ang ministerio sa ikapitong manulonda, ang ministerio sa ikapitong manulonda, ang ministerio ni Elias ngadto sa ikapitong manulonda, dili . . . Nganong dili, nganong dili man, diay, ang ginapaninguhaan kong isulti, nganong dili man ang ministerio sa ikapitong manulonda mamahimo pinaagi ni Moises, kung imortal man siya, nga mao man pud si Elias? Nganong dili man sila . . . Nganong dili na lang ipadala sa Dios, miingon, “Elias, ikaw—grabe na man gud ang imong paghago, Akong . . . ug tanan na, sa tanan niining nagkalain-laing mga dapit. Ako—siguro Ako na lang ipadala si Moises didto?” Ngano man?

340 Tan-awa ang ministerio ni Moises. Si Elias usa ka propeta para sa tanang nasud; apan si Moises usa ka maghahatag-og-balaod ngadto sa mga Judio lamang. Amen. Maatua si Moises aron isulti nga . . . Ang hinungdan nga moadto siya didto uban ni Elias . . . Ang mga Judio moingon man gud, “Kadali lang, ang kasugoan ang ginasunod namo dinhi.” Apan maatua man si Moises mismo; ug ania pud si Elias nga kauban niya. Oh! Kita n'yo? Nagaadto siya sa mga Judio lamang. Kita n'yo? Miadto si Moises ngadto sa mga Judio lamang; si propeta Elias usab ngadto sa tanang kanasuran. Apan si Moises nahimo man nga propeta sa mga Judio, ug usa ka maghahatag-og-balaod. Kita n'yo? Mao kadto ang iyang mensahe, ang kasugoan.

341 Apan unsa man ang mensahe ni Elias? Para sa mga kababayen-an nga mugbo ang buhok; para sa mga denominasyon. Oo, sir. Ug iya mismo silang gipangbadlong. Kadtong mga pinintalan ang mga nawong; og giingnan sila, “Igapakaon kamo ngadto sa mga iro.” Gipangbadlong niya sila og ayo.

342 Ug dayon sa dihang ang iyang Espiritu mikunsad na usab kang Juan, mitungha siya didto nga gikan pa sa kamingawan ug gibuhat ang mao gihapong butang. Oo. Miingon, “Ayaw ninyo hunahunaa nga miyembro kami sa *ingon-niini* o *ingon-niana*. Makahimo ang Dios sa pagpatindog og mga anak kang Abraham bisan sa niining mga bato.”

343 Giatubang si Herodias, miingon, “Ug buut mo bang isulti kanako nga giminyoan mo ang imo mismong bayaw . . . ?” Ingon pa, “Dili uyon sa balaod alang kanimo nga buhaton kana!”

Oh, igsoon! Whew! Hum! Iya mismong gisultihan ang maong babaye. Oo.

344 Himatikdi, kini nga mga kalag kinahanglan pang maghulat og diyutay'ng panahon, alang sa usa ka gatus kap-atan ug upat . . . nga paga-martiron. Oh, dili ba kana, dili ba . . . ? Ginapatakdo niana mismo ang Biblia.

345 Karon tapos na ang akong oras, kung papaulion ko na kamo og sayo. Apan aduna pa ko'y diyutay'ng mga butang nga isulti, kung makapabilin pa kamo para niini. [Nagaingon ang kongregasyon, "Padayon!"—Ed.] Nasayod ko nga mainit gayud. Ug gipaningot na ko.

346 Apan, paminaw, aduna lang ko'y isulti kaninyo. Maayo kaayo kini, nagadilaab kini mismo sa kasingkasing ko. Nagalaum ko nga wala pa ninyo hikalimti kini, kita n'yo. Isulti ko kini, diha sa presensiya Niya. Pinaagi sa Iyang grasya, gitugotan usab Niya ako nga makita ang akong mga katawhan, dili pa lang dugay, nga nanagsul-ob og maputi nga mga bisti. Nahinumduman n'yo ba kini? [Nagaingon ang kongregasyon, "Amen."—Ed.] Nahinumduman n'yo ba? Nahinumduman ba ninyo ang maong estorya, dili pa lang dugay? ["Amen."] Ang Gentil nga Pangasaw-onon, atua sila niadtong higayona. Silang tanan nga nanagsul-ob og maputi nga mga bisti.

347 Nakamata ako. Gikan ako niadto sa usa ka panagtigum. Kini'y mga usa na ka tuig ang milabay, o sobra pa. Nakamata ako usa ka buntag, ug mibangon ko. Ug ingon ko, "Sweetheart?" ngadto sa akong asawa. Wala ra siya milihok. Ang mga bata . . . Kinahanglan na nga mangmata ug dalhon sila sa eskwelahan, dinhi mismo sa karaang lugar. Bueno, ako—mibangon ko sa higdaanan, kabalo na mo, ug misandig. Kabalo na mo kung unsa; molingkod ug isandig ang imong ulo sa may ulhanan sa katre. Aduna pa kami'y niadto og usa sa niining karaang mga higdaanan. Ug busa misandig ako nga naka *ingon-niana*.

348 Ug nahunahuna ko, "Aba, singkwenta'y-tres na ka. Kung aduna ka ma'y buhaton nga unsa mang butang alang sa Dios, mas maayo nga buhaton mo na kana, tungod mamahimo kang tigulang na kaayo—tigulang na kaayo, human sa pila na lang ka panahon." Kita n'yo.

349 Ug nahunahuna ko, "Abi nimo, husto kana, ha." Nahunahuna ko, "Aba, abi nimo, dili baya magdugay. Motaliwan ka na." Ingon ko, "Kana'y—milabay lang ko og usa ka tuig nga nagkinabuhi ang akong amahan." Kita n'yo? Nahunahuna ko, "Hapit na gyud kong motaliwan. Nakita ko na kini. Ug, ania ko, nga wala pa'y nabuhat og unsa man para sa Dios, hangtud karon." Nahunahuna ko, "Dugay ko nang gusto nga adunay buhaton para Kaniya." Nahunahuna ko, "Kihanglan ko nang magdali ug buhaton kana, kung buhaton ko man kana.

Ug wala man ko kahibalo kung unsaon pagbuhat niana, kana lang.”

350 Nahunahuna ko, “Aba, mabuhi pa unta ko hangtud nga makita ko Siya nga nagaabot. Dili ko gustong mamahimong multo, o usa man ka espiritu.”

351 Kita n’yo, kanunay akong mahadlok sa espiritu. Ug karon, kabalo na mo, kanang matang sa . . . kanunay kong mahunahuna, sama nianang makita ko si Igsoong Neville ug usa na siya ka gamay’ng puti nga panganod nga nagalibot-libot, kabalo na mo. Ug moingon ko, “Kumusta ka, Igsoong Neville.” Ug moingon pud siya, “Kumusta, Igsoong Branham,” pinaagi sa laing sensya; tungod dili man siya makasulti. Apan mahibaloan ko mismo nga si Igsoong Neville kana. Oo. Gusto kong lamanohon siya maingon sa kanunay ko nang ginabuhat. Tungod kay, kana lang ang nahibaloan ko, sa mga tawo. Kita n’yo, gusto ko gayud nga malamano siya, pero wala man siya’y kamot. Atua man kini nga kamot didto sa lubnganan, nga nadugta na. Kita n’yo?

352 Nahunahuna ko, “Aba, galaum ko nga dili ko na unta agian ang ingon-niana.” Karon, ako kaniadto. . . Karon sultihan ko kamo sa tinuod. Ako—nahadlok ako kaniadto nga mamatay; dili ingon nga nahadlok kay basin malaglag ako, apan dili ko lang gusto nga mamahimong espiritu. Gusto ko lang magpabilin ingon nga usa ka tawo. Gusto kong maghulat para sa Pagsakgaw, kita n’yo. Gusto ko lang magpabilin nga ingon-niana. Dili ko gusto nga mamahimong espiritu, nga nagalibot-libot lang. Didto ko nga nagasandig niadto, nga nagahunahuna niana.

353 Ug, sa kalit lang, adunay nahitabo. [Gipalagitik ni Igsoong Branham ang iyang tudlo sa makausa—Ed.]

354 Karon, kabalo na mo, ug tanan kaninyo nahibalo na man, mahitungod sa mga panan-awon. Ug kung kini’y usa man ka panan-awon, wala pa ko sukad nagkaaduna og usa nga sama niini, kita n’yo. Ug dugay na kong nakakita og mga panan-awon sukad niadtong usa pa ako ka gamay’ng batang lalaki.

355 Ug, sa kalit lang, adunay nahitabo. Ug nabati ko ang akong kaugalingon nga mitaliwan. Nahunahuna ko, “Uh-oh.” Ug ako—nahunahuna ko, “Ako—patay na ko, kita n’yo, ug ako’y—mitaliwan na ko.” Kita n’yo?

356 Ug miabot ako sa usa ka dapit, ug nahunahuna ko, “Siguro motan-aw sa ko og balik.” Kini’y ingon ka tinuod gayud, mga higala, sama nga nagatindog ako mismo dinhi. Kita n’yo? Ug milingi ako, aron mobalik. Ug atua ako, nga naghigda sa higdaanan. Ug didto ako, nga naghigda tupad sa akong asawa.

357 Nahunahuna ko, “Bueno, tingali usa kini ka atake sa kasingkasing.” Kita n’yo? Nahunahuna ko, “Bueno, kita n’yo, kalit lang kong namatay,” nga usa ka maayong paagi sa pagtaliwan. Busa, nahunahuna ko, “Kana’y atake sa kasingkasing. Dili ko na kinahanglan mag-antus.” Mitan-aw

ako ug nahunahuna ko, “Bueno, karon, talagsaon kana. Atua ako nagahigda, dinha mismo; ug ania pud ko nga nagatindog, dinhi.”

358 Busa, milingi ako. Mora kadto og usa ka daku kaayong—mora’g usa ka daku kaayong umahan, mora’g, ingon-niana, usa ka halapad nga umahan sa bughaw-nga-sagbot. Ug—ug miingon ko, “Bueno, unsa kaha kini?”

359 Ug, sa kalit lang, pagtan-aw ko, ania nagaabot ang linibo ka pilo nga mga batan-ong kababayen-an, ang tanan nanagsul-ob og maputi nga mga bisti, nakabuhayhay ang mga buhok hangtud sa ilang hawak, nakatiniil, ug nanagdagan sila paingon kanako. Nahunahuna ko, “Karon unsa man kini?”

360 Milingi ako, mitan-aw *didto* balik, ug atua ako; ug mitan-aw usab ko paingon *niini*, ania sila nga nagaabot. Gipaak ko ang akong tudlo. “Ako—ako—ako—dili man ko tulog, eksakto.” Ug, makabati man ko. Ug ingon ko, “Bueno, kung ingon-ana, aduna gyu’y butang dinhi, nga talagsaon.”

361 Ug ang tanan niining mga kababayen-an paingon kanako, nga nagadagan. Ug wala pa gayud ko nakakita sukad og ingon niadto ka maanyag nga mga kababayen-an! Ug silang tanan, nanagdagan paingon kanako. Ug sa pagdagan nila paingon kanako. . .

362 Kabalo na baya mo kung unsa ako kaniadto pa, medyo. . . Ginatawag nila ako nga usa ka madulomtanon-sa-mga-babaye, apan dili ako ingon-ana, kita n’yo. Apan, ako—nahunahuna ko lang, ang usa ka maayong babaye mao’y usa sa. . . usa ka mutya. Apan, sa tan-aw ko, ang usa ka babaye nga dili maayo, mao’y, sama sa ginaingon ni Solomon, “tubig sa imong dugo.” Busa makasigurado mo nga wala gyud ko’y maayong opinyon sa—sa mga babayeng mahugaw’g dungog o mga maalam kono.

363 Ug busa nanagduol kining tanan nga mga kababayen-an. Misugod silang migakus kanako. Karon, talagsaon ra kana. Kabalo na man mo nga dili ako nagatugot niana. Busa, ug sila’y. . .Karon, kinahanglan kong isulti kini sa paagi, nga, ako’y—anaa ako sa nagkasagol nga mga mananambong. Apan, sila, sila’y mga kababayen-an. Mga babaye sila. Ug sila—gigakus nila ako, ang matag usa, ug miingon, “Among—among bililhon nga igsoon!” Ug ang usa mogakus kanako, ug pagkahuman mogakus na pud kanako ang usa pa.

364 Nagtindog ra ko didto, og nagtan-aw. Sa hunahuna ko, “Bueno, karon, unsa man kini?” Kita n’yo? Ug nanagtindog pud sila didto. Sa hunahuna ko, “Unsa ma’y nahitabo?” Mitan-aw ko sa ubos. Atua ako, nga nagahigda mismo *didto*; ug ania ako, nga nagatindog pud *dinhi*. Sa hunahuna ko, “Karon, talagsaon kini. Ako—wala ko makasabot niini.”

365 Ug nanagsinggit silang mga kababayen-an, “Oh, bililhon namong igsoon,” ug nagagakus kanako. Karon, silang tanan, sa pagbati, mga babaye gayud.

366 Karon pasayloa ko ninyo, mga igsoong babaye, sa pagsulti ko niini, tungod . . . Apan paminaw kamo sa inyong doktor; ug kung wala ta’y hinlo nga mga panghunahuna, kung ingon-ana dili kita mga Cristohanon. Dili ko igsapayan . . .

367 Kanunay gyud kong nagkinabuhi nga putli. Nasayod ang Dios niana. Niadtong bata pa ako, gisultihan ako sa Manulonda sa Ginoo nga kinahanglan dili ko kono hugawan ang akong lawas, manigarilyo man, o maghubog-hubog. Ug tinuod kana. Pinaagi sa grasya sa Dios, natuman ko kana. Niadtong usa pa ako ka makasasala, wala gyud ako nakigrelasyon sa mga babaye. Ug busa . . .

368 Apan ang si kinsa mang lalaki nga tugotan ra ang usa ka babaye nga mogakus kaniya, ingon nga siya’y linangkoban og pang-lalaki nga mga selula, ug ang babaye usab, sa pang-babaye nga mga selula, aduna gyu’y sensasyon. Dili ko igsapayan kung kinsa ka man, ha, ayaw ko’g sultihi nga dili ka ingon-ana, kung usa ikaw ka mahimsog nga tawo.

369 Apan, dili ingon niana Didto; tungod wala na man kamo’y, unsa pa man, nga nagkalainlaing mga selula. Dili na kamo magpakasala Didto. Aduna na’y pagkausab. Wala na’y unsa man gawas sa gugmang ingsoon para sa maong mga kababayen-an.

370 Bisan, unsa pa katahum ang ilang hitsura; sa hunahuna ko, ang usa—usa ka babaye, ang usa ka maayong babaye nga tarung ang paggawi niya sa iyang kaugalingon, ug nagakinabuhi ingon nga usa ka gining, siya’y usa ka—siya’y usa ka ehemplo sa usa ka mutya sa yuta. Ako—gusto ko ang unsa man nga matahum. Sa hunahuna ko, ang usa—usa ka babaye nga nagapabilin diha sa iyang hustong puwesto, ug nagapaningkamot nga mahimong usa ka tarung nga babaye, siya’y—siya’y usa ka bantayog sa kadungganan. Nagatoo ko niana. Ug sa hunahuna ko, ang usa ka babaye usab nga dili tarung, sama lang sa—sa Cristo ug sa anticristo, mamahimo usab siyang ingon niana.

371 Ako—gusto ko ang unsa man nga natural. Sama sa usa ka matahum nga kabayo, o unsa man, ginapapabilin niini ang iyang bantayog ingon nga usa ka matahum nga kabayo. O, unsa man nga sama niana, usa ka maanindot nga bukid, matahum nga mga kababayen-an, ambongan nga mga kalalaken-an, og unsa man nga nagapabilin diha sa pagkalalang sa Dios kaniya, kanunay kong ginadayeg ang ingon-ana.

372 Ug kini sila’y mga hingpit mismo. Apan bisan unsaon man nila sa paggakus kanako, ug bisan sila’y mga babaye, kabalo na mo, apan wala gyud didto’y sala. Ang pang-lalaki nga mga glandula ug ang pang-babaye nga mga glandula, parehong, nawala na. [Ginapalapak ni Igsoong Branham ang iyang mga

kamot sa makausa—Ed.] Salamat sa Ginoo! Sila’y mga igsoon kong babaye, sa bug-os gayud.

373 Mitan-aw ko. Ug hinay-hinay kong. . . ako—gitan-aw ko ang akong mga kamot; nakita ko nga bug-os kining nahimong iya sa batan-on. Ug mitan-aw ko; ako’y batan-on na, usab. Ug ako. . .

374 Ug naupaw na ang akong buhok, niadtong usa pa ako ka batan-ong lalaki; tungod nabutangan man gud kini og carbolic acid, sa usa ka barbero, ug naupaw kining tanan niadtong batan-on pa ako. Ug dugay na kining usa—usa ka problema kanako, nga ako—ako—dali kaayo kong sip-onon, tungod kay humok kaayo ang panit sa akong bagolbagol, kabalo na mo. Ug anaa pa man unta ang mga ugat sa buhok ko, apan nasunog kini tungod sa carbolic acid, ug dili na makatubo ang buhok, kita n’yo.

375 Ug ako, ang akong asawa, niadtong ako’y. . . pipila na ka tuig ang milabay, ug gipalitan ko og peluka nga masul-ob, usa ka gamay’ng peluka, nga sul-obon, aron matabonan ang akong ulo. Apan kanunay man kong maulaw nga suoton kini, tungod kay mora man kini og butang nga mini. Ug ayaw ko man gud sa bisan unsa man nga mini.

376 Ug busa nahunahuna ko, “Magsul-ob na lang ko og stocking nga kalo.” Dayon, nagsul-ob ko niini, sa hamubo nga panahon. Kabalo ba mo kung unsay gibuhat nila? Gusto nila akong tawgon nga “obispo” kaniadto, miingon nga gusto ko kono nga mahimong. . . Kita n’yo? Miingon lang ko, “Pasagdi ra siya.”

377 Busa kanunay kong nag-antus og grabe nga sip-on, ug gipasagdan kini nga. . . Apan, ako. . . kamo. . . maablihan lang ang mga bintana, o unsa man, makasulod lang ang diyutay’ng hangin dinha nga sama niana, aba, sip-onon ko dayon.

378 Bueno nagpakonsulta ako sa doktor ug gipangutana siya, kung unsa kaha’y tan-aw niya. Ingon siya, “Bueno, kita mo, abli man gud ang mga lungag sa imong—imong panit. Ginapaningot pud ka, tungod sa pagwali. Mao nga nagasulod kanang hangin. Kana—ginapataput niini ang kagaw ngadto sa sip-on, ug nagapaingon kana sa imong tutunlan. Pagkasunod buntag pagaw ka na. Mao kana.”

379 Ug—ug busa, oh, aba, kamong mga lalaki nga aduna pa’y buhok, wala kamo nasayod kon daw sa unsa kamo angay’ng magpasalamat, nga aduna pa mo niana. Husto kana. Kita n’yo.

380 Bueno, karon, masayran ko na lang, taudtaud, nga ako—ako’y paingon na sa. . . Usa sa niining mga adlaw, kung wala na ko’y mga ngipon, kinahanglan kong magkaaduna og pipila niana, ug, o, mahimong sige na lang bisa’g wala na’y ngipon.

381 Busa kung ang usa ka lalaki—kung ang usa ka lalaki. . . Bueno, ayaw kong hunahunaon nga dili maayo para sa usa ka lalaki, kung gusto niya, magsul-ob og peluka, mao usab sa usa ka babaye nga magsul-ob og usa niining mga bugkot sa buhok,

o kung unsa ma'y ginabutang nila sa ilang buhok nga sama niana, aron hapsayon kana. Kita n'yo? Apan—apan, siyempre, kung buhaton ninyo kana, nagadepende ra kung para sa unsa nga ginabuhat n'yo kana. Kita n'yo? Nagadepende kana kung para ba sa unsa nga ginabuhat n'yo kana. Ug busa. . .

³⁸² Apan, bisan pa man, sa pagtindog ko didto, akong nabati, nga nagkaaduna na ko'y buhok pag-usab. Grabe! Mibat-an-on ako. Ug kini sila, tanan sila, mga batan-on usab! Ug nahunahuna ko, "Buena, pagkatalagsaon kini! Ania sila." Ug silang tanan nanagdagan. . .

³⁸³ Ug nakita ko, nga nagapadulong, ug akong—nakita ko si Hope nga nagapadulong. Mora siya'g. . . Kabalo na mo, namatay siya sa edad nga baynte-dos. Pagkatahum niya sa gihapon maingon kaniadto. Daghan kaninyo ang nakahinumdom kaniya; niadtong dagku og maitum nga mga mata. Siya'y usa ka German. Nakabuhayhay ang itum niyang buhok sa iyang likod. Sa hunahuna ko, "Karon, pagmakaabot na siya dinhi, siguradong moingon siya—moingon siya og, 'Bill.' Kabalo ko nga moingon gyud siya niana. Kabalo gyud ko nga moingon siya, 'Bill,' pagmakaabot na siya dinhi."

³⁸⁴ Nagtan-aw ra ko. Ug ang matag usa niini nga mga kababayen-an miduol ug migakus kanako, nagaingon, "Oh, minahal nga igsoon, nalipay kaayo mi nga makita ka!" Ug nahunahuna ko. . . Managsama ra ang pagpangbisti sa matag usa kanila, pero managlahi ang ilang mga buhok, kabalo na mo, dunay pula ang buhok, ug dunay itum ang buhok, ug duna pu'y bulagaw ang buhok. Ug—ug nangduol sila, ug mga batan-on silang tanan.

³⁸⁵ Ug sa nakaduol na siya kanako, nahunahuna ko, "Hibaloon ko lang kung unsay iyang isulti kanako."

³⁸⁶ Ug mitan-aw siya kanako, ug miingon siya, "Oh, bililhon namo nga igsoon!" Gigakus niya ako, ug milakaw na siya. Miduol 'sab ang uban pang babaye, gigakus ako, pagkahuman.

³⁸⁷ Ug nakadungog ko og kabanha. Ug mitan-aw ko sa *niini* nga direksyon, ug atua miabot pud ang pundok sa mga kalalaken-an, mga batan-ong kalalaken-an, tanan sila anaa sa pangidaron nga mga baynte. Aduna sila'y itum nga buhok, ug bulagaw nga buhok. Ug nanagsul-ob silang tanan og puti nga mga bisti, ug nakatiniil. Ug miduol sila kanako ug misugod sa paggakus kanako, nagahugyaw, "Bililhon nga igsoon!"

³⁸⁸ Nahunahuna ko. Ug milingi ako, ug atua ako, nagahigda gihapon didto. Ug nahunahuna ko, "Buena, aba, talagsaon kini."

³⁸⁹ Ug niadtong tungora may usa ka Tingog nga nagpakigsulti kanako. Wala ko nakita ang maong Tingog. Miingon Kini, "Nahiusa ka na, ikaw—nahiusa ka na sa imong mga katawhan." Ug dayon gialsa ako sa pipila ka mga lalaki, gipaitaas ako, diha sa usa ka dakung mahabog nga butang sama *niini*.

Ingon ko, “Nganong gibuhat man ninyo kini?”

Miingon, “Didto sa yuta usa ka ka lider.”

Ug ingon ko, “Bueno, ako—wala ko makasabot niini.”

³⁹⁰ Ug kadto nga Tingog nagpakigsulti kanako. Dili ko makita ang maong Tingog. Bueno, nagpaibabaw lang Kadto kanako, nga nagpakigsulti kanako.

³⁹¹ Ingon ko, “Bueno, kung ako—kung namatay na ko, gusto kong makita si Jesus.” Ingon ko, “Ako . . . Siya gayud . . . Siya ang tibuok kong kinabuhi. Gusto kong makita Siya.”

Ug busa miingon Siya, “Dili mo pa Siya makita sa karon. Anaa Siya sa mas hataas pa.”

³⁹² Kita n’yo, anaa kadto ubos sa halaran, pa lang, kita n’yo, sa ikaunom nga dapit, diin didto mahiadto ang mga tawo, kita n’yo; dili sa ikapito, kon diin atua ang Dios, sa ikapitong dimensyon. Kondili sa ikaunom!

³⁹³ Ug sila—ug atua silang tanan didto, ug nagapangagi sila. Ug ingon ko . . . Mora’g adunay minilyon kanila. Wala ko pa sila nakita sukad . . . Ug, sa paglingkod ko didto, kining mga kababayen-an ug mga kalalaken-an nangduol gihapon ug nagagakus kanako, ginatawag ako nga, “igsoon.” Ug milingkod ko didto.

³⁹⁴ Ug dayon miingon kadtong Tingog, “Nahiusa ka na sa imong mga katawhan, sama ni Jacob kaniadto nga nahiusa sa iyang mga katawhan.”

Ingon ko, “Kining tanan, akong mga katawhan? Ang tanan ba niini mga Branham?”

Ingon Siya, “Dili. Sila’y imong mga kinabig kang Cristo.”

³⁹⁵ Mitan-aw ko sa palibot. Ug adunay usa ka maanyag kaayo nga babaye nga miduol. Siya’y pareho ra gayud sa uban. Migakus siya kanako, ug miingon siya, “Oh, bilihon kong igsoon!” Mitan-aw siya kanako.

³⁹⁶ Sa hunahuna ko, “Grabe! Mora siya og Anghel.” Ug miagi siya.

Ug miingon kadtong Tingog, “Wala ka ba nakaila kaniya?”

Ingon ko, “Wala, wala ko kaila.”

³⁹⁷ Miingon, “Giagak mo siya kang Cristo niadtong lagpas nubenta anyos na siya.” Ingon pa, “Kabalo ba ka kon nganong nagahunahuna kaayo siya nimo?”

Ingon ko, “Kanang maanyag nga babaye lagpas nubenta anyos na diay?”

³⁹⁸ “Oo.” Miingon, “Dili na gayud siya mausab pa.” Miingon, “Mao kana’y hinungdan nga nagaingon siya, ‘Bililihong igsoon.’”

³⁹⁹ Nahunahuna ko, “Oh, grabe! Ug gikahadlok ko pa kini? Aba, tinuod kaayo kini nga mga tawo.” Sila, wala na sila’y

adtoan pa sa kon asa. Wala pud sila gipangkapoy, ingon nga atua Didto.

Ug miingon ko, “Bueno, nganong dili ko man makita si Jesus?”

400 Miingon, “Bueno, sa karon, Siya’y—moabot ra Siya sa umaabot nga adlaw. Ug moabot Siya kanimo, una, ug dayon pagahukman ka na.” Miingon, “Kini nga mga tawo mao’y imong mga kinabig nga imong giagak.”

401 Ug ingon ko, “Ang buut mo bang ipasabot, nga sa pagkahimong usa ka lider, ako . . . nga pagahukman Niya ako?”

Miingon, “Oo.”

402 Ug ingon ko, “Kinahanglan bang hukman ang matag lider sama niana?”

Miingon, “Oo.”

Ingon ko, “Unsa man usab si Pablo?”

Miingon Siya, “Pagahukman pud siya sa iyaha.”

403 “Bueno,” ingon ko, “kung nakasulod man ang iyang grupo, nan ang akoa usab, tungod giwali ko man ang eksaktong mao ra nga Pulong.” Mao kana. Ingon ko, “Ingon nga nagbautismo siya sa Ngalan ni Jesus, ako man, usab. Nagwali ko . . .”

404 Ug ang minilyon misinggit, og dungan, miingon, “Nakasalig kami Niana!”

405 Ug nahunahuna ko, “Aba! Kung nahibaloan ko lang kini sa wala pa ako nakaanhi, buhaton ko gayud nga makaanhi ang mga tawo. Dili puedeng masayloan nila kini. Aba, tan-awa kini!” Ug pagkahuman . . .

406 Ug miingon Siya, “Karon, sa umaabot nga adlaw moabot ra Siya, ug dayon . . . Karon, dinhi, wala na kami nagakaon, nagainom, o nagatulog. Usa ra kaming tanan.”

407 Bueno, dili kini hingpit; sobra pa kini sa pagkahingpit. Dili kini halangdon; sobra pa kini sa pagkahalangdon. Walay ngalan nga makahimo . . . Dili ka makahunahuna . . . Walay unsa mang mga pulong sa bokabularyo aron maisulti kini. Miabot ka na gyud, kana lang.

408 Ug nahunahuna ko, “Bueno, kini, pagkahingpit niini. Ug dayon unsa ma’y sunod natong buhaton?”

409 Miingon, “Dayon, pagmoabot na si Jesus, ug kita’y . . . ug pagahukman ka na Niya, o tungod sa imong ministerio, dayon mobalik na kita sa yuta ug mokuha og mga lawas.” Bueno, ako—wala ko nahunahuna ang mahitungod niana kaniadto. Eksaktong sumala kana sa Kasulatan. Miingon, “Dayon mobalik kita sa yuta ug mokuha og mga lawas, dayon makakaon na kita. Wala kami nagakaon dinhi, wala pud kami nagatulog.” Miingon, “Didto kita magakaon, apan mobalik kita sa yuta.”

410 Nahunahuna ko, “Grabe, pagkamaanindot niini! Oh, grabe! Ug gikahadlokan ko pa gyud kini. Nganong mahadlok man ko mamatay, kung ingon ani man diay kini? Bueno, kini ang kahingpitan, labaw pa sa kahingpitan, sobra pa sa kahingpitan. Oh, pagkamaanindot niini!”

411 Kita n’yo, atua kami mismo sa ilalum sa halaran. Kita n’yo? Mao kadto, kita n’yo, ilalum mismo sa halaran, nagahulat alang sa Pag-abot, kita n’yo, alang Kaniya aron kuhaon na ang mga nagakatulog sa . . . ang—ang mga lawas nga nagakatulog nga anaa sa abog, aron banhawon kita pag-usab; moabot, aron banhawon kita.

412 Maingon nga miadto si Jesus sa paraiso, ug gibanhaw si Abraham, si Isaac, ug ang tanan kanila, kabalo na mo, nga nanaghulat kaniadto sa unang pagkabanhaw. Misulod sila sa siyudad ug nagpakita sa kadaghanan.

413 Kini’y hingpit gayud nga sumala sa Kasulatan. Mao kadto ang panan-awon, o kung unsa man kadto, hingpit gayud nga sumala sa Kasulatan.

414 Ug miingon ko, “Bueno, pagkamaanindot niini!” Ug dayon nahunahuna ko, “Pagkamaanin- . . .?”

415 Dayon may nadungog ko nga pagbahihi, sama sa usa ka kabayo. Ug mitan-aw ako. Ug ang gamay kong kabayo nga akong ginasakyan kaniadto, ang gamay’ng si Prince, pirmi ko gayud siya mahinumduman. Atua siya, nga nagatindog didto tupad nako, ug gisandig niya ang iyang ulo sa akong abaga, aron mohangop kanako. Sama kaniadto nga hatagan ko siya og asukar, kabalo na mo, ug ipahimutang niya ang iyang . . . gigakus ko siya. Ingon ko, “Prince, nasayod ko nga maania ka dinhi.”

May nabati ko nga mitilap sa akong kamot. Atua pud diay didto ang iro kong igpangayam.

416 Sa dihang—sa dihang si Mr. Short, nga taga dinhi, gihiloan siya, nanumpa gyud ko nga akong patyon si Mr. Short tungod niadto. Mga dise-sais anyos pa ako kaniadto. Gihiloan niya siya, gihatagan siya og usa ka pang-hilo. Ug nasakpan ko sa akong amahan nga may dalang riple, nga moadto unta didto aron pusilon siya, didto mismo sa estasyon sa pulis. Ug ingon ko, “Patyon ko siya.” Ingon ko, “Bueno . . .” Miadto na lang ko sa lubnganan sa mga iro. Ako—gilubong ko siya didto. Ingon ko, “Fritz, nahimo ka nang suod ko nga kauban. Imo akong gibistihan ug ginahatud sa eskwelahan. Pagmatigulang na ka, atimanon pud unta ’ta ka. Karon gipatay ka nila.” Ingon ko, “Ginasaad ko kanimo, Fritz, nga dili siya mabuhi.” Ingon ko, “Ginasaad ko kanimo, dili gyud siya mabuhi. Masakpan ko ra siya sa kalsada usa ka higayon, nga nagalakaw, ligsan ko gyud siya sa gilayon, kita mo.” Ug ingon ko, “Patyon ko siya para kanimo.”

417 Apan kabalo ba mo kung unsa? Naagak ko baya ang maong tawo ngadto kang Cristo, gibautismohan siya sa Ngalan ni Jesus, ug gilubong siya niadtong namatay na siya. Oo, sir. Nakabig ako mga duha ka tuig human niadtong. Lahi na ang pagtan-aw ko sa mga butang pagkahuman niadtong, kita n'yo. Gihigugma ko hinoon siya imbis nga dumtan siya.

418 Busa niadtong tungora, apan, bisan pa niana, atua si Fritz nga nagatindog didto, ginatilapan ang akong kamot. Ug ako . . . Mitan-aw ako.

419 Wala ko nakahilak. Walay si kinsa man ang makahilak Didto. Kasadya ra tanan. Dili ka mahimong magmasulobon, tungod kalipay ra ang tanan. Dili ka puedeng mamatay, tungod Kinabuhi ra tanan Didto. Kita n'yo? Kita n'yo? Dili ka matigulang, tungod pagkabatan-on ra tanan Didto. Ug ingon niana . . . Pagkahingpit gayud. Nahunahuna ko, "Oh, pagkamaanindot niini!" Ug ang minilyon . . . Oh, grabe! Mora og taga-didto ako mismo, kita n'yo.

420 Ug—ug niadtong tungora nadungog ko ang usa ka Tingog. Ug misinggit Kini, miingon, "Ang tanan nga imong gihigugma . . ." ang ganti sa akong pagpangalagad. Wala man ko nagkinahanglan og unsa man nga ganti. Miingon Siya, "Ang tanan nga imong gihigugma, ug ang tanan nga naghigugma kanimo, gihatag sa Dios kanimo."

Ingon ko, "Dalaygon ang Ginoo!"

421 Mibati ko og pagkatalagsaon. Nahunahuna ko, "Unsa ma'y nahitabo? Mibati ko og pagkatalagsaon." Milingi ako ug mitan-aw. Ug didto sa higdaanan, nagalihok na ang akong lawas. Ingon ko, "Oh, dili ko na gustong mobalik, ayaw ko na. Ayaw, ayaw na ko pabalika."

422 Apan kinahanglan pa man nga iwali ang Maayong Balita. Sa usa ra ka segundo, anaa na ako sa higdaanan pag-usab, kita n'yo, sama niana.

423 Dili molapas sa duha ka bulan ang milabay, nga . . . Nadungog ninyo kini ug nabasa kini sa—sa *Business Men's Voice*. Ngani mikaylap kini sa tibuok kalibutan, kita n'yo. Ug si Igsoong Norman, dinhi, siguro ania siya dinhi sa kon asa man karong gabhiona. Gisulat niya kini gikan sa teyp, ug gipatik kini ngadto sa mga pampleta. Mikaylap kini sa bisan asa. Ug misulat ang mga ministro, daghan kanila, ug miingon . . .

424 May usa dinhi, isulti ko lang kining usa mismo. Aduna ma'y daghan kanila, siyempre. Misulat kining usa, miingon, "Igsoong Branham, ang imong panan-awon nga nasulat diha sa *Business Men's Voice* . . ."

425 Ug ginapasalamat ko si Tommy Nickels, bisan dili na siya konektado, sa *Business Men*. Wala ko nasayod kon ngano, apan wala na siya. Apan gisulat niya kini dinha nga eksakto gayud,

sumala sa akong pagkasulti. Dinha mismo nianang trinitarian nga magasin, ang ingon niya, “Ingon nga ako... Ingon nga nagbautismo si Pablo sa Ngalan ni Jesus, ug gimandoan ang mga tawo nga mao usab ang buhaton, mao usab ang akong gibuhat.” Kita n’yo, gisulat niya kini sa kung unsa gayud ang pagkasulti ko. Kita n’yo? Ug busa pagkahuman ako—ako—nahunahuna ko, “Grabe!”

⁴²⁶ Misulat kini nga ministro, ang ingon, “Igsoong Branham, ang imong panan-awon . . .”

⁴²⁷ Nga, tingali’g usa kadto ka panan-awon. Miingon . . . Karon, dili ko gustong isulti nga kadto’y, “paglalin.” Kung si Pablo . . . Kung gilalin man ako paingon niining unang langit ug nakita kadto, unsa man usab si Pablo nga gilalin usab paingon sa ikatulong kalangitan? Unsa man kana? Ingon niya nga dili gani siya makasulti mahitungod niini, kita n’yo, kung gilalin ba gyud siya. Kung usa gyud kadto ka paglalin, wala ko kahibalo. Dili ko makasulti. Dili ko masulti kaninyo.

⁴²⁸ Apan kini nga ministro miingon, “Igsoong Branham, ang imong panan-awon mora’g sumala gayud sa Kasulatan ug husto tanan hangtud nga naghisgot ka mahitungod sa usa ka kabayo nga atua didto.” Miingon, “Usa ka kabayo didto sa Langit?” Miingon . . . Karon nakita n’yo kanang eklesiastikal nga tawo, eklesiastikal nga kaalam, og panghunahuna? Kita n’yo? Ingon pa siya, “Gihimo ang Langit para lang sa mga tawo, dili sa mga kabayo.”

⁴²⁹ Bueno, milingkod ako. Si Billy, ang akong anak dinhi, gibutang niya ang maong sulat dinhi mismo sa karaang opisina sa iglesia, mga tulo o upat na ka bulan ang milabay.

⁴³⁰ Ingon ko, “Bililhon kong igsoon, nakurat ko sa imong kaalam, apan, ug, sa imong kahibalo mahitungod sa Kasulatan. Wala ko man gisulti nga atua ako sa Langit. Ang ingon ko nga didto kini sa usa ka dapit nga sama sa paraiso, tungod kay anaa pa man si Cristo sa itaas, kita mo. Apan,” ingon ko, “kung makapalipay man kini kanimo, ablihi sa Pinadayag 19. Ug sa diha nga migula si Jesus gikan sa mga kalangitan sa Langit, nagasakay man Siya sa usa ka puti nga kabayo, ug ang tanang mga balaan nga kauban Niya nagasakay pud sa mga kabayo.” Oo. Sigurado. Oo, tinuod gayud.

⁴³¹ Ug didto usab niadtong mao ra nga Dapit, adunay usa nga mora’g agila, ug usa nga mora’g laking-baka, ug usa . . . Bueno, aba, asa man diay gikan kadtong mga kabayo nga miabot ug mikuha kang Elias? Nagapakita lang, nakita n’yo, nga ang hunahuna sa tawo gusto lang og usa ka butang nga mabugalbugalan. Husto kana.

⁴³² Karon matikdi. Apan gihunahuna ko lang, kining bililhon, diosnon nga igsoong, si Juan . . . Nahunahuna ko lang nga mahimong usa ka maayong butang nga iapil kana og hisgot,

sa dili pa ang pagtapos, kita n'yo. Kung gipatan-aw si Juan Didto, ug makita sila nga iyang mga kaigsoonan, kita n'yo, iyang mga kaigsoonan nga kinahanglan pang mag-antus og diyutay; kung ingon-ana, kita n'yo, gitugotan pud ko sa Ginoong Dios nga makita ang akong mga kaigsoonan ug ang mga balaan nga nanaghulat sa Pag-abot sa Ginoo. Himatikdi, wala sila sa ilalum sa altar sa paghalad; ang mga akoa wala didto. Kondili, kini sila, kini silang mga martir. Kita n'yo? Ang mga akoa wala sa ilalum sa halaran sa mga martir.

⁴³³ Karon gusto kong maminaw kamo og ayo. Ug tapuson ko na gayud, sa tinuod, mga diyes minutos na lang, para mag alas diyes, kinahanglan ko nang undangon kini ug tiwason na lang ugma.

⁴³⁴ Tan-awa. Sila, sila dili ang akong...ang mga gipakita kanako sa Ginoo, ang Pangasaw-onon, wala didto ang Pangasaw-onon ilalum sa dapit nga iya sa mga martir, wala, altar kadto sa paghalad sa mga martir; nga nanagpakadawat og puti nga mga bisti, tungod nadawat nila ang grasya sa pagpasaylo sa buhi nga Pulong. Gihatagan sila ni Cristo og puti nga bisti. Dili ko sigurado, sa pag-abli...

⁴³⁵ O, sa hunahuna ko, diay, tungod sa pag-abli niining Ikalimang Selyo, ingon nga nagatoo ko, nga giablihan Kini para kanato. Gibuhat ko kini nga may maayong kaisipan, nga may klarong kapadayagan sa atubangan sa Dios. Dili nga naninguhang maghimo og akoang mga tinumotumo, og ideya, tungod kay dugay na akong batok sa organisasyon, og dili lang gayud ako magpahisakop kanila. Apan giablihan gyud Kini kanako karon.

⁴³⁶ Ug usa pa ka butang ang sa hunahuna ko. Tungod sa pag-abli niining Ikalimang Selyo, sa niini nga adlaw, nahitul-id ang usa ka doktrina dinhi mismo, nga mahimo kong hisgotan, ang mahitungod sa nagakatulog-nga-kalag. Karon, nasayod ko nga adunay mga tawo dinhi nga nagatoo niana, kita n'yo, sa nagakatulog nga kalag. Sa hunahuna ko ginapanghimakak Niini kana. Wala man sila nagakatulog. Sila'y mga buhi. Ang ilang mga lawas, ang nagakatulog. Apan, ang kalag, wala diha sa lubnganan, sila'y anaa sa Presensiya sa Dios, kita n'yo, ilalum sa halaran.

⁴³⁷ Dinhi ako wala miuyon sa usa ka bililhong igsoon, nga usa ka magtutudlo. Ug, namatikdan ko, kabalo ko ug nakita ko ang pipila sa iyang mga sumusunod nga ania dinhi nagalingkod. Tungod, nasayod ko nga usa siya ka bantugang magtutudlo. Usa siya ka doktor, ug usa ka—usa ka Doktor sa Divinidad, ug usa ka Ph., LL.D. Ug siya'y usa ka—siya'y usa ka maayo mismo nga tawo, usab. Siguro wala na siya, niining panahona. Apan siya'y usa ka maayo nga tawo, ug usa ka maayong manunulat. Ug kini mao si Igsoong Uriah Smith, ang tagsulat sa *Daniel*

and Revelations. Karon, kaninyo nga mga sumusunod sa iyang mga pagtulon-an, kita n'yo, karon dili ko...dili ko lang...dili ko gustong isulti kini sa mapahitas-ong pamaagi, apan ako lamang...Kita n'yo?

⁴³⁸ Apan, si Igsoong Smith, ug sa pagpaningkamot nga pamatud-an, kita n'yo, ug sa pagpaningkamot nga pamatud-an ang nagakatulog-nga-kalag, gihisgotan niya dinha nga kono, "Ang kalag nagakatulog. Ug walay altar sa paghalad didto sa Langit. Nga, ang altar lamang nga nahisgotan mao'y," iyang—iyang gitooan nga anaa kono sa Langit, "mao ang altar sa incienso." Apan kaninyo nga minahal nga mga tawo...Ug dili ingon nga aron lang malahi sa akong igsoon. Ako tinga...nagalaum kong makita siya sa pikas dapit, kita n'yo. Dili ingon nga aron lang nga malahi sa nianang bantugan nga magtutudlo.

⁴³⁹ Kondili ang ipakita lang kaninyo kung giunsa Niini pagpahisayup kana, kita n'yo. Gipahisayup Niini kana. Ang pag-abli niini nga Selyo, sa niining kaulahiing adlaw, ginapakita niini nga sayup kanang nagakatulog nga kalag. Kita n'yo? Sila'y mga buhi. Dili sila patay. Kita n'yo? Matikdi.

⁴⁴⁰ Matikdi n'yo kini ha. Karon, kung wala ma'y altar sa paghalad sa Langit, asa diay napahimutang ang halad para sa sala kung ingon-ana, nga mao ang Cordero? Kinahanglan aduna gyu'y dapit kon diin kanang gipatay nga Cordero, dugoan, mapahimutang dinha, kon diin ang Dugo...kana.

⁴⁴¹ Karon, ang incienso mao ang mga mahumot, mahumot nga butang nga ilang gisunog, nga ang gikaingon sa Biblia mao "ang mga pag-ampo sa mga balaan." Kung walay unsa man nga halad ibabaw sa altar, nan dili madawat ang maong mga pag-ampo. Kana'y pinaagi lang sa Dugo, ibabaw sa altar sa paghalad, nga nagatugot sa mga pag-ampo nga makaabot ngadto sa Dios.

⁴⁴² Sayup si Igsoong Smith, kita n'yo. Dili sa pagsupak kaniya; siguro gipaklaro ko na ang akong kaugalingon, nga may gugmang inigsoon ug pagtahud para sa iyang halangdon nga buhat, kita n'yo. Apan sayup gayud siya.

⁴⁴³ Ang Ikalimang Selyo ang nag-abli niana, kita n'yo, kita n'yo; og daghan pang uban nga mga butang, kung nasabtan ninyo kini. Kita n'yo? Nagahulat na ko og mga pangutana kanako, kita n'yo, kung ako...Sige.

⁴⁴⁴ Karon, asa man ang arka; asa man napahimutang ang gipatay, gisamaran, nagdugo, og dugoan nga Cordero alang sa pagbayad-sa-sala, para sa niining mahumot nga mga pag-ampo?

⁴⁴⁵ Matikdi, nagaingon ang Biblia, "Kung kining yutan-on nga tabernakulo nga atong ginapuy-an matun-as man, aduna na kita'y usa nga nagahulat." Dinha ko nakita kadtong mga balaan. Kita n'yo?

446 Matikdi pag ang usa ka bata...Pasayloa ko pag-usab, mga igsoong babaye, tungod niining diretsahan nga pagsulti sa atubangan sa mga batan-ong babaye. Apan, tan-awa. Sa dihang magsamkon na ang inahan, ug kanang gamay'ng bata nga nagatuyok-tuyok ug nagalihok-lihok, kabalo na mo, usa kana ka natural nga lawas. Ug kung ginaunsa pagporma sa kinaiyahan ang natural nga lawas. . .

447 Namatikdan ba ninyo ang inyong asawa sa dili pa mahimugso ang mga gamay'ng masuso? Siya sa kanunay, nagapadayon, langitud sa kaulahian, nagakahimo mismong buutan, og malulot. Kung dili man siya ingon-niana sa una, sa tibuok niyang kinabuhi, mamaingon niana gyud siya nianang panahona. Namatikdan ba ninyo kung unsa ka buutan kaayo, o ang medyo ingon-ana nga pagbati, ang inyong mamatikdan sa inahan?

448 Ug pag may makita kamong makakasala dinha, nga ginabiaybiayan ang inahan nga usa—usa ka mabdos nga babaye. Sa hunahuna ko pagbugalbugal kana. Kinabuhi baya na nga moabot sa kalibutan.

449 Apan namatikdan ba ninyo, diha nianang inahan daw sa may malumo nga pagbati? Unsa man kana? Usa kana ka gamay'ng espirituhanong lawas, espirituhanong kinabuhi, nga nagahulat nga mosulod nianang gamay'ng lawas dihadiha sa pagkahimugso niana. Karon kana'y gipanganak lamang; apan, sa dihang gipakatawo na kana, natawo na gyud kana. Ang espirituhanong lawas nga nahimong usa sa natural nga lawas.

450 Ug, dayon, nagatudlo ang Biblia nga kita karon mga gipanganak na sa Dios. Gipanganak kita sa Balaang Espiritu, ingon nga, sa sulod nato mao si Cristo, usa ka anak sa Dios nga naporma sa sulod nato. Ug sa dihang kining yutan-ong lawas matun-as man, kining espirituhanong lawas nga nagagikan mismo sa yuta, aduna na'y usa pa ka lawas nga nagahulat nga modawat niini. “Kung kining yutan-on nga tabernakulo matun-as man, aduna na'y usa pa ka lawas nga modawat niini.” Kining lawas nga mamatay pagailisan og dili na mamatay. Kining yutan-on pagailisan na og langitnon. Kini, nasabtan n'yo ba ang buut kong ipasabot? Adunay natural nga lawas nga makasasala; apan, sa pagkaporma niini, nga sama gayud niini, mao ang usa pa ka lawas nga atong paingnan.

451 Ug mapasalamaton gyud kaayo ko sa Dios nga masulti ko, ingon nga inyong pastor ug igsoon, nga nakita ko kadto nga mga tawo, nga nakatabang gyud kanako, nga atua sila sa ingon-niana na nga lawas, ug nahawiran ko mismo sila. Husto kana. Matikdi.

452 Matikdi. Tan-awa si Moises, si Elias. Human nga mamatay si Moises, ug gidala si Elias paingon sa Langit, mitindog siya didto sa Bukid sa Pagkabalhin nga aduna mismo og iyang mga sensya sa pagpanulti, pandungog, panabot, ug nagpakigsulti kang Jesus

sa wala pa ang pagpalansang sa krus. Karon, unsa man nga matang sa lawas ang aduna kaniya?

⁴⁵³ Tan-awa 'sab si Samuel, human nga namatay sulod sa halos duha ka tuig. Gitawag siya pabalik didto sa—sa langub niadtong gabhiona, sa espiritista sa Endor, ug nagpakigsulti kang Saul pinaagi og pinulongan; nadungog niya si Saul, nga mitubag, ug daan nang nahibaloan ang mga butang nga mahitabo. Sa gihapon, wala mausab ang iyang espiritu. Usa gihapon siya ka propeta.

⁴⁵⁴ Pagmoabot na ang espiritu ni Elias diha sa tawo, pabuhaton siya niini nga sama ni Elias. Moadto pud siya sa kamingawan. Magustohan niya ang kamingawan. Mamahimo siyang suko sa imoral nga mga kababayen-an. Mamahimo pud siyang batok sa organisasyon. Dili siya magpugong-pugong sa pagsaway bisan kang kinsa man. Ug ingon niana gayud. . . Kana'y, mamaingon niana ang iyang espiritu. Mamahimong ingon niana gyud, sa matag higayon nga nagaabot kana, kita n'yo.

Si Moises mamahimong mao ra sa gihapon nga tawo.

Karon, ug atong mahibaloan, diha sa Pinadayag 22:8, ang mao gihapong butang.

⁴⁵⁵ Karon, o aron mahan-ay kini, para niadtong mga. . . Kadtong mga kalag (karon matikdi kini) nga anaa ilalum sa halaran, sa pagkaabli niini nga Selyo, nga mga gipamatay niadtong panahon tali sa pagkamatay ni Cristo ug sa paglalin sa Iglesia; kadtong sa grupo nga gipamatay ni Eichmann, ug tanan niadto, kadtong tinuod nga mga Judio nga ang ilang mga ngalan anaa sa Basahon. Kung imong matikdan, igsoon ko, sumala sa Kasulatan, makasulti man sila, makapagtuaw, makaistorya, makadungog, ug aduna sila og tanan niining lima ka mga sensya. Dili nga nagakatulog sa lubnganan, nga walay-panimuut. Sila'y mga nagmata gayud, ug makasulti, makaistorya, makadungog, og unsa pa man. Husto ba kana? [Nagaingon ang kongregasyon, "Amen."—Ed.] Oh, tabangan unta kita!

⁴⁵⁶ Dos minutos na lang. Amen. Ako. . . pasayloa ko nga napalangan ko kamo og tunga sa oras. Wala, wala ko, wala ko na lang unta gisulti kana, kita n'yo. Kita n'yo? Husto kana, kita n'yo.

⁴⁵⁷ Apan, tan-awa, mao kini ang kutob sa pinakamaayo kong, nasabtan. Ug sumala sa kapadayagan nga gikahatag kanako, ni Ginoong Jesus Cristo, kaganinang buntag sa wala pa nagbanag-banag, mao kana ang giablihan nga Ikalimang Selyo, nga motakdo sa upat pa. Pinaagi sa Iyang grasya, gihatag Niya kini kanako, tungod sa Iyang grasya para kaninyo ug kanako. Ginapasalamatan nato Siya tungod Niini. Ug, pinaagi sa Iyang tabang, ginatinguha kong magkinabuhi nga mas haduol. . . nga mahimo kong ikinabuhi, nga nagatudlo sa uban nga buhaton ang mao usab nga butang, hangtud nga matagbo ko na Siya, uban

kamo, didto sa Kahimayaan, pag matapos na ang tanang mga butang. Gihigugma ko Siya tungod niini, ug mao kini ang kutob sa akong nahibaloan Niini.

⁴⁵⁸ Ug nagatoo gayud ako, sa tibuok kong kasingkasing, nga ang tinuod nga mga kapadayagan sa pagpadayag sa Una, Ikaduha, Ikatulo, Ikaupat, ug Ikalimang Selyo, abli na para kanato karon.

I love Him, I love Him
Because He first loved me

[Si Igsoong Branham mahilumon nga nagapakig-estorya sa usa ka tawo—Ed.]

On Calvary's tree.

[Si Igsoong Branham nagasugod na sa paglaylay og *I Love Him*—Ed.]

⁴⁵⁹ Karon, mapahilumon, magmatinahuron gayud, sa atubangan sa Dios! Ingon nga makita na nato nga abli na kini nga Selyo para kanato, nga kinahanglan himoon pa sa Dios ang Kaugalingon Niyang minahal nga mga anak nga mabutahan ang ilang mga mata, ug ipadala sila didto, tungod kay ang Kaugalingon Niyang hustisya—hustisya nagkinahanglan man nga hukman ang sala. Hunahunaa n'yo kini. Ang Iyang hustisya, ug ang Iyang pagkabalaaan nagkinahanglan og hustisya. Ang balaod nga walay silot dili kini balaod. Ug ang Kaugalingon Niyang mga balaod, Mismo, dili Niya mahimong supakon ug sa gihapong magpabilin nga Dios.

⁴⁶⁰ Mao kana'y hinungdan nga ang Dios kinahanglan magpakatawo. Dili man Siya puedeng mokuha og usa ka pangpuli, usa ka anak nga dili...usa ka ordinaryong anak lamang para Kaniya, o ingon niana. Ang Dios nahimong parehong, si Jesus nahimong parehong Anak ug Dios, ang bugtong paagi lang nga makatarunganon Niyang mahimo kana. Kinahanglan angkonon sa Dios ang silot, Siya mismo. Dili man gud makatarunganon, nga ipahamtang kini ngadto sa kang kinsa pa man, sa ubang tawo. Busa, ang Persona ni Jesus mao ang Dios, nga nadayag diha sa unod, og gitawag nga Emmanuel.

⁴⁶¹ Ug aron mahimo kana, ug aron makakuha og usa ka Pangasaw-onon, ug aron maluwas ang usa ka nahisalaag nga pundok sa paganong mga Gentil, kinahanglan Niyang butahan ang Kaugalingon Niyang mga anak. Ug dayon silotan sila tungod niana, diha sa unod, tungod sa pagsalikway. Apan naghatag ang Iyang grasya og mga bisti. Apan, ang Kinabuhi, tan-awa kung unsay nahitabo.

⁴⁶² Ug kung kinahanglan Niyang buhaton kana, aron lang nga magkaaduna kita og kahigayonan, nganong isalikway man nato kana nga kahigayonan sa gugma? Kung aduna man sa niini nga bilding, karong gabhiona, og ingon niana nga tawo, batan-on man o tigulang, nga hangtud niining panahona gisalikway pa

kanang kahigayonan nga nagpabayad sa Dios og ingon niana nga bili, ug gusto ninyong dawaton kana nga tanyag gikan sa Dios, karong gabhiona; nga dili na ninyo kinahanglan, nga mamahimo pang martir, kutob sa atong nahibaloan, bisan pa man nga posibleng mamaingon niana pud kamo. Apan may gikatagana na nga puting bisti para kaninyo. Ug kung nagatuktok man ang Dios sa inyong kasingkasing karon, nganong dili man ninyo dawaton kana! [Ginadukdok ni Igoong Branham ang ibabaw sa pulpito sa makatulo ka higayon—Ed.]

Karon iduko nato ang atong mga ulo pag-usab.

⁴⁶³ Kung kana nga tawo, o mga tawo, ania man dinhi, nga nagatinguha niana, o gustong dawaton kana basi sa inyong pagtoo sa giula nga Dugo nga giula sa Dios para kaninyo, ug nag-antus og labaw pa sa unsa mang butang nga giantus ni bisan kinsa man nga mortal. Wala gayu'y usa ka tawo sukad nga nakapag-antus og sama niana. Hangtud nga, ang Iya Mismong kasakitan ang nagpahimulag sa Iyang tubig gikan sa Iyang Dugo, diha sa Iyang mga kaugatan. Sa wala pa Siya miadto sa Kalbaryo, aduna na'y mga tulo sa Dugo ang nagadagayday gikan sa Iyang lawas, gumikan sa kasakitan ug kaguol sa kasingkasing tungod sa kinahanglan Niyang buhaton. Apan, mahimo baya Niyang balibaran kadto, usab. Apan, kinabuboton Niyang gibuhat kadto para kanimo ug kanako. Mahimo ba nimong isalikway ang ingon nianang walay-sama nga gugma?

⁴⁶⁴ Ug nakita ninyo kana karon, tungod sa pag-abli niining Mga Selyo; nakita n'yo kung unsay mga nabuhat ninyo, ug kung unsay gibuhat sa Dios para kaninyo. Ug kon andam na kamong isurender ang inyong kinabuhi nganha sa Dios, ug aron maagaw Niya kamo gikan sa mga kamot sa anticristo kon diin anaa kamo karon, mahimo n'yo bang dawaton ang Iyang tanyag, pinaagi sa pagpataas sa inyong kamot nganha Kaniya, magaingon, "Dios, pinaagi niini, ginapakahulogan ko, nga ginadawat ko na kanang tanyag sa grasya"?

⁴⁶⁵ "Ug, Igoong Branham, ginatinguha ko ang imong mga pag-ampo, nga magapabilin na gyud akong matinud-anon."

⁴⁶⁶ Ipataas lang ang inyong kamot, ug igaampo ko kamo. Panalanginan ka sa Dios. Panalanginan ka sa Dios. Tinud-a n'yo kana karon. Ayaw—ayaw n'yo buhata kana gawas kon tininuod gyud kana. Ug dinha mismo kon diin kamo nagalingkod, dawata ninyo kana dinha mismo. Tungod, hinumdumi, dili man ninyo maipataas ang inyong kamot gawas lamang kon Adunay nagsulti kaninyo nga buhaton kana. Ug wala na'y unsa pa man ang makapahimo ninyo niana kondili ang Dios lamang.

⁴⁶⁷ Busa, karon, sa dihang nakita ninyo ang mga Kasulatan nga bug-os gayud nga nahipadayag! Nakita ninyo kung unsay nangahitabo, sa tanang mga kapanahonan, sa nangaging pipila ka mga tuig, baynte o traynta ka tuig. Nakita n'yo kini nga bug-

os gayud nga gipanghimatud-an. Nakita n'yo ang Kasulatan nga eksaktong ginasulti kung unsay nahitabo ug kung unsay andam nang mahitabo. Dayon, sumala sa basihan sa pagtoo ngadto sa buhat ni Cristo, kon diin kamo nagalingkod karon mismo, ug gipataas ang inyong mga kamot, moingon, "Sugod niining taknaa mismo, nasulbad na kini. Ginadawat ko na si Cristo karon ingon nga akong Manluluwas. Ug magkinabuhi na ko alang Kaniya, sa tibuok kong kinabuhi. Ug ginatinguha ko nga pun-on ako sa Dios sa Balaang Espiritu." Ug kung wala pa kamo nabautismohan sa Ngalan ni Jesus Cristo, nagahulat ra kaninyo ang bautismohan.

Mag-ampo kita.

468 Ginoong Dios, adunay daghang mga kamot sa taliwala sa mga tawo, ang naipataas. Sigurado ko nga Ikaw ang mao ra mismong Ginoong Jesus nga naghimo sa pagbayad-sa-sala para kanamo, daghang mga katuigan na ang milabay. Ug sa pagkakita namo nianang Mga Selyo nga nahipadayag, ug sa mga dagkung butang nga nangahitabo sa niini mismong nangaging pipila ka mga tuig, nagatoo ko sa tibuok kong kasingkasing nga ang pultahan sa kalooy hinay-hinay nang nagasira, ug andam Ka nang moanhi sa Imong panaw karon aron tubuson ang Imong mga katawhan. Samtang aduna pa'y lawak, ug usa ka abling pultahan, maingon kaniadto sa mga adlaw ni Noe, hinaut nga kining bililhong mga kalag nga nagakinabuhi sa lawas sa niining tabernakulo nga matunas ra sa umaabot nga adlaw, nga nagpataas nianang mortal nga kamot, diha sa kinasuloran nila; tungod sa ilang—ilang kombiksyon ug sa ilang pagpahayag, nga nagatoo sila ug gustong dawaton ang Imong tanyag para kanila, alang sa kaluwasan, nga anaa niining abli na nga selyado-nga-Basahon nga giablihan para kanamo. Ihatag kanila, karong gabhiona, Ginoo, ang bisti sa pagkamatarung ni Jesus Cristo, ug bistihi ang ilang kalag niana, aron nga makabarug sila sa Imong atubangan, sa nianang haduol na gayud nga Adlaw, ingon nga mga hingpit na, tungod sa Dugo ni Cristo.

469 Ginoong Dios, kung wala pa sila mabautismohi sa Ngalan ni Jesus Cristo! Ug sumala sa kapadayagan nga gikahatag Mo kanako mahitungod niini; ug hingsayran nga gimandoan ni Pablo ang mga tawo kaniadto nga bisan gibautismohan na ni Juan Bautista, kinahanglan nga magpabautismo pag-usab sa Ngalan ni Jesus Cristo, aron nga madawat ang Balaang Espiritu, diha sa Mga Buhat 19. Ginapangamuyo ko nga Imong danihon sila, Ginoo, mahitungod sa maong Kamatuoran, ug hinaut nga sundon Ka nila.

470 Ug dayon ingon nga pagtubag sa ilang pagdawat, ug pagtubag sa ilang pagsugid, ug ngadto sa tubig; hinaut nga Imong, pun-on sila sa Espiritu Santo, ingon nga ganti, alang sa gahum sa pagpangalagad, sa tibuok nilang kinabuhi.

Ginatugyan ko sila Kanimo karon, sa Ngalan sa gihalad nga Cordero sa Dios, si Jesus Cristo. Amen. Amen.

I love Him, I love Him
Because He first loved me
And purchased my salvation
On Calvary's tree.

⁴⁷¹ Karon, kamo nga nagpataas sa inyong mga kamot. Tumana ninyo ang sugo sa Espiritu, nga maganunot sa—sa kinatibuk-an sa Pulong, alang sa usa ka naghinulsol na nga makasasala. Sunda kini, sa matag buhat. Ug ang Dios sa Langit magaganti kaninyo tungod sa inyong pagbarug para Kaniya. Panalanginan kamo sa Ginoo.

⁴⁷² Ugma sa gabii, dalha ninyo ang inyong mga lapis ug mga papel, ha, maingon sa dugay na ninyong ginahimo. Ginalauman nato nga maania kita dinhi sa mao gihapon nga oras, sa alas siete-traynta, impunto, kon itugot sa Ginoo. Ug pinaagi sa . . . iampo ninyo ako, nga pagaablihan sa Dios ang Ikaunom nga Selyo para kanako, ugma, aron mahimo kong dalhon Kini nganha kaninyo sumala sa Iyang pagkahatag Niini kanako. Hangtud nianang panahona, mag-awit kita pag-usab. Dili lamang pinaagi sa mga himno, kondili pinaagi sa mga pagdayeg usab para Kaniya nga namatay puli kanato ug nagtubos kanato. *I Love Him*. "I . . ."

Ania ang inyong pastor karon.

. . . love Him, I love Him
Because He first loved me.



ANG IKALIMANG SELYO CEB63-0322

(The Fifth Seal)

SERYE SA KAPADAYAGAN SA PITO KA MGA SELYO

Kining Mensahe ni Igsoong William Marrion Branham, unang giwali sa Ingles niadtong Biyernes sa gabii, Marso 22, 1963, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apod-apod sa Voice of God Recordings.

CEBUANO

©2019 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org